

曹魏天竺三藏康僧鎧譯經
隋京師淨影寺沙門慧遠撰疏

佛說無量壽經義疏




發菩提心。一向專念阿彌陀佛。修諸功德。願生彼國。
此等眾生臨壽終時。無量壽佛與諸大眾現其人前。即隨彼佛往生其國。
便於七寶華中自然化生。住不退轉。智慧勇猛。神通自在。

釋淨空題



佛說無量壽經義疏

曹魏天竺三藏康僧鎧譯經
隋京師淨影寺沙門慧遠撰疏



目錄

佛說無量壽經義疏卷一	262
佛說無量壽經義疏卷二	222
佛說無量壽經義疏卷三	176
佛說無量壽經義疏卷四	128
佛說無量壽經義疏卷五	89
佛說無量壽經義疏卷六	45
同音義字、古今字、本俗字、同義字對照參考表	1

南無本師釋迦牟尼佛（三稱）

開經偈

無上甚深微妙法

百千萬劫難遭遇

我今見聞得受持

願解如來真實義

佛說無量壽經義疏卷一

原疏離經別行
今將經疏合刻

曹魏天竺三藏康僧鎧譯經

隋京師淨影寺沙門慧遠撰疏

△聖教不同。略要唯二。一聲聞藏。二菩薩藏。教聲聞法。名聲聞藏。教菩薩法。名菩薩藏。聲聞藏中。所教有二。一聲聞聲聞。二緣覺聲聞。聲聞聲聞者。是人先來求聲聞道。常樂觀察四真諦法。成聲聞性。於最後身。值佛為說四真諦法。而得悟道本聲聞性。今復聞聲而得悟道。是故名為聲聞聲聞。經言為求聲聞者說四諦法。此之謂也。緣覺聲聞者。是人本來求緣覺道。常樂觀察十二因緣。成緣覺性。於最後身。值佛為說十二緣法。而得悟道。本緣覺性。以最後身聞聲悟道。



佛說無量壽經義疏

是故號曰緣覺聲聞。經言為求緣覺者說十二緣。據此為言。

成二雖殊。同受小法。並於現在聞聲悟道。是故對斯二人所說。為聲聞藏。菩薩藏中。所立亦二。一漸。二頓。言漸入者。是人過去曾學大法。中間習小。證得小果。後還入大。大從小來。稱之為漸。故經說言。除先修習學小乘者。我今亦令人是法中。此是漸入。言頓悟者。有諸眾生。久習大乘相應善根。今始見佛。則能入大。大不由小。目之為頓。故經說言。或有眾生。世世已來。常受我化。始見我身。聞我所說。即皆信受。入如來慧。此是頓悟。漸入菩薩。藉淺階遠。頓悟菩薩。一越解大。頓漸雖殊。以其當時受大處一。是故對斯二人所說。為菩薩藏。聖教雖眾。不出此二。故龍樹云。佛滅度後。迦葉阿難。於王舍城。結集法藏。為聲聞

藏。文殊阿難。於鐵圍山。集摩訶衍。為菩薩藏。地持亦云。佛為聲聞菩薩行出苦道。說脩多羅。結集經者。集為二藏。以說聲聞所行。為聲聞藏。說菩薩行。為菩薩藏。故知聖教。無出此二。此二亦名大乘小乘。半滿教等。名雖反改。其義不殊。今此經者。二藏之中。菩薩藏收。為根熟人頓教法輪。云何知頓。此經正為凡夫人中。厭畏生死。求正定者。教令發心。生於淨土。不從小大。故知是頓。

△已知分者。次釋其名。今言佛說無量壽經者。蓋乃標經部別名也。諸經所以皆首題其名。為示所明法。此經宗顯無量壽佛所行所成。及所攝化。故始舉之。但彼諸經得名不同。或但就法。如涅槃等。或唯就人。如提謂經。太子經等。或單就事。如枯樹經等。或偏就喻。如大雲經。寶篋經等。或有



就時。如時非時經。或就處所。如楞伽經。伽耶山頂經等。或人法雙題如維摩經。勝鬘經等。或事法並舉。如彼方等大集經等。或法喻並彰。如華嚴經。法華經等。或人法雙舉。如舍利子問疾經等。如是非一今此經者。就人為名。初列人。凡有四種。一舉說人。如維摩等。二舉問人。如文殊問等。三舉所說之人。如太子經等。四舉所化之人。如須摩提女玉瑤經等。今此經首。通舉能說及所說人。初言佛者。舉能說人。無量壽佛者。舉所說人。起說不同。凡有五種。如龍樹說。一佛自說。二聖賢說。三諸天說。四神仙等說。五變化人說。此經佛說。為簡餘四。是故舉佛。佛者。外國語也。此翻名覺。覺有兩義。一覺察名覺。對煩惱障。煩惱侵害。事等如賊。唯聖覺知。不為其害。故名為覺。此之一義。如

涅槃釋。二覺悟名覺。對其智障。無明眠寢。事等如睡。聖慧一起。朗然大悟。如睡得悟。故名為覺。所對無明。有其二種。一是迷理性結無明。迷覆實性。對除於彼。變妄契真。悟實名覺。二事中無知。迷諸法相。對除於彼。悟解一切善惡無記三聚等法。故名為覺。故持地云。於義饒益聚。非義饒益聚。非非義饒益聚。平等開覺。故名為佛。義益是善。非義是不善。非非義是無記。於此悉知。故名為覺。既能自覺。復能覺他。覺行窮滿。故名為佛。言自覺者。簡異凡夫。導言覺他。別異二乘。覺行窮滿。分異菩薩。是故獨此偏名為佛。口音陳唱。目之為說。無量壽者。是其所說。此經宣說無量壽佛所行所成及所攝化。言所行者。宣說彼佛本所起願。本所修行。言所成者。說今所成法身淨土二種之果。言



所攝者。普攝十方有緣眾生。同往彼國。道法化益。名為所攝。又今一切諸菩薩等。學其所行。得彼所成。同其所攝。名所攝矣。此等差別。不可備舉。攝德從人。是故但云說無量壽。佛名有二種。一通。二別。如來應供等。是其通名。釋迦彌勒無量壽等。是其別稱。別中立名。乃有種種。或從種性。如釋迦佛。迦葉佛等。或從色身。如身尊佛。身上佛等。或從音聲。如妙音佛。妙聲佛等。或從光明。如普光佛等。或從內德。或就譬說。如是非一。此佛從其壽命彰名。壽有真應。真即常住。性同虛空。應壽不定。或長或短。今此所論。是應非真。於應壽中。此佛壽長。凡夫二乘不能測度知其限算。故曰無量。命限稱壽。云何得知是應非真。如觀世音及大勢至授記經說。無量壽佛壽雖長遠。亦有終盡。

彼佛滅後。觀世音大勢至次第作佛。故知是應。經者。外國名脩多羅。此翻名綻。聖人言說。能貫諸法。如綻貫華。故名為綻。而言經者。綻能貫華。經能持縛。其用相似。故名為經。若依俗訓。經者常也。人別古今。教儀常楷。故名為常。經之與常。何相關顧。將常釋經。釋言經者。是經歷義。凡是一法。經古歷今。恆有不斷。是其常義。故得名常。

△此經始終。文別有三。序。正。流通。初至對曰願樂欲聞。是其由序。佛告阿難乃往過去久遠已下。是其正宗。佛語彌勒其有得聞彼佛名號歡喜已下。是其流通。化必有由。故先明序。由序既興。正陳所說。故次第二辨其正宗。聖者說法。為利群品。說經既竟。歎勝勸學。付屬傳持。故次第三辨其流通。



佛說無量壽經義疏

△序中文義。雖復眾多。義要唯二。一發起序。二證信序。佛
將說經。先託時處。神力集眾。起所說宗。名為發起。與說
為由。名發起序。證信序者。佛說經竟。阿難稟承。將傳末
代。先對眾生。言如是法。我從佛聞。證成可信。名為證信。
以此證與傳經為由。名證信序。以何義故立此二序。由經二
故。經唯是一。何曾有二。經體雖一。約人隨時。故得分二。
一如來所說經。二阿難所傳經。如來所說。益在當時。阿難
所傳。傳之末代。對此二經。故立兩序。對如來所說。立發
起序。對阿難所傳。立證信序。然此二序。更多義。備如
常釋。

△文中初言如是我聞。是證信序。一時以下。義有兩兼。若取
本事起發之義。判屬發起。阿難引來證成可信。名為證信。

義既兩兼。不可偏取。

如是我聞。

藏本作我聞如
是今依疏本

證信序中。三門分別。一釋如是我聞有之所由。二明立意。
三釋其文。有所由者。何緣經首悉有如是我聞之言。由佛教
置。佛何緣教。阿難請故。彼何因請。由彼阿泥樓陀教故。
阿泥樓陀何緣故教。由見阿難心憂惱故。阿難比丘何故憂惱。
由見如來般涅槃故。佛將滅度。在於雙林北首而臥。是時阿
難以佛將滅。悲啼涕泣不能自勝。阿泥樓陀開覺阿難。汝傳
法人。何不請佛未來世事。徒悲何益。阿難對曰。我今心沒
憂海。知何所問。阿泥樓陀遂教阿難請問四事。一問世尊滅
後。諸比丘等以何為師。二問世尊滅後。諸比丘等依何而住。



三問惡性比丘。云何共居。四問一切經首。當置何字。阿難被教。心少惺悟。遂依請佛。佛隨答之。諸比丘等以何為師者。當依波羅提木叉為師。若我住世無異於此。木叉是戒。比丘所學。故說為師。言諸比丘依何而住者。當依四念處住。何謂四念處。所謂比丘依內身修身觀。精慤除世貪愛。如是依外身。內外身。受心法亦如是。是謂比丘所依住處。故經說言。若住四念處。名目境界。不為魔縛。若住五欲。名魔境界。為魔所縛。惡性比丘云何共居者。梵檀治之。梵檀是其默不共語。若心調伏。為說離有無。言一切經首置何字者。當置如是我聞佛在某方聚林等六事。由佛教故。一切經首得著如是我聞。此初門竟。次辨立意。佛本何意教置此語。為生物信。如是。云何得生信也。其如是者。阿難彰已信順佛。

語。遵佛所說如。言佛所說是。令他眾生同已生信。其我聞者。若為生信。阿難自是不足之人。若言此法是已所說。人多輕謗。由言此法從佛聞故。人皆歸信。信有何義。須立此言而生信乎。釋言。信者。入法初門。攝法上首。凡入佛法。要先起信。故華嚴中說信為手。如人有手。至珍寶處隨意採取。若人無手。空無所獲。如是入佛法者。有信心手。隨意採取道法之寶。若無信心。空無所得。信有此義。故立如是我聞之言。以生物信。立意如是。此兩門竟。次釋如是我聞之言。其如是者。解有兩義。一約法釋。阿難遵佛所說之言。如於諸法。故名為如。說理如理。說事如事。說因如因。說果如果。凡所論者。皆如前事。故名為如。如法之言。是當道理。故名曰是。良以乖法。名為非是。故如法之言。得稱

為是。二約人解。阿難遵今釋迦所說。如於過去一切佛說。

故名為如。故涅槃經云。如過去佛所說不變。故名如來。乖諸佛說。其言則非。如諸佛說。其言則是。故曰如是。言我聞者。阿難對彼未來眾生。陳已餐說。故曰我聞。聞實是耳。何得云我。諸根之別。皆我用具。就主以彰。故云我聞。法中無人。何處有主。而言就主稱說我聞。釋言。法中雖無定主。非無假名綰御。亦得稱我。故涅槃云。譬如四兵。合以成軍。雖無定主。亦得稱言。我軍勇健。我軍勝彼。此亦如是。問曰。阿難得理聖人。以何義故同凡說我。釋言。阿難雖復說我。不同凡夫。云何不同。說我有三。一見心說我。謂諸學人。我見雖亡。慢心猶在。我慢心中稱說為我。三世流布

我。謂無學聖人。見使久亡。慢使亦盡。隨世流布假名說我。

然今阿難結集法時。身居無學。見慢亡除。隨世流布假名說我。故不同凡。問曰。我者假名世諦。無我真諦。真諦是勝。何不就勝宣說無我。乃從世諦假名說我。釋言。化我凡夫法須如是。若不說我。何由可得標別彼此。令人識知。故須說我。是故乃至諸佛為化。亦常說我。智者不怪。

△一時已下。義雖兩兼。對前一向證信序故。自下偏就發起以釋。於中有三。一明佛化主。二從與大比丘已下。辨其徒眾。三爾時世尊諸根悅下。如來現化而為發起。阿難啟請。

一時佛住王舍城耆闍崛山中。

前中一時。舉佛化時。言其佛者。舉佛化人。住王舍等。舉



佛化處。言一時者。人有異釋。今正論之。為化之辰。因之為時。於佛一代。化時眾多。簡別餘時。是故言一。一時之言。經中大有。如涅槃說。我於一時在王舍城。與彌勒菩薩共論世諦。我於一時在恆河岸。我於一時在尸首林。此言似彼。佛如前釋。住王舍者。約城通舉。此城古昔多有王住。名王舍城。耆闍崛山。隨處別指。遶王舍城。具有五山。皆有精舍。簡別餘處。是故須言耆闍崛山。此翻名為靈鷲山也。此山多有靈仙居住。故名為靈。亦有鷲鳥居止此山。故名為鷲。又亦名為鷲頭山矣。多有靈鷲居此山頂。名鷲頭山。又此山頂似鷲鳥頭。名鷲頭山。遊化處中。目之為住。法身平等。實無棲託。示化在方。故云住耳。何不就實。乃託化乎。為通化教。故須從化。

△第二眾中。先列聲聞。後彰菩薩。諸經多爾。何故而然。凡釋有四。一近遠分別。諸聲聞人。多近如來。故明佛後。隨近先列。菩薩之人。多不近佛。為是後列。聲聞何故偏近如來。菩薩不近。解有兩義。一聲聞之人。習道未久。未閑道法。雖得聖果。進止威儀。常順佛教。如律經中。制阿那律不聽與彼女人同宿。制娑伽陀不聽飲酒。制十七童子不聽在於水中戲等。皆是羅漢順佛教制。乃至如來般涅槃。制諸聲聞不聽食完。為是近佛。菩薩之人。久閑道法。不假佛教。故不近佛。二聲聞之人。現蒙佛度。捨凡成聖。荷恩深重。雖得聖果。常隨如來。圍侍供養。故多近佛。菩薩之人。雖荷佛恩。化眾生事。隨緣攝化。多不近佛。以彼聲聞多近如來。故先標列。菩薩不爾。故在後列。此是第一近遠分別。



佛說無量壽經義疏

二就威儀形相分別。聲聞人等。執持威儀。形相似佛。世共尊敬。故在先列。菩薩隨化。形儀不定。故在後列。如彼文殊一夏之中。三處安居。即是事也。三就治分別。亦得名為約教分別。如龍樹釋教有二種。一者顯示。二者祕密。依顯示教。羅漢辟支。同佛漏盡。故舉佛後。先列聲聞。菩薩隨化。現處諸漏。示為凡夫。世人若聞在羅漢上。人多驚怪。是故後列。諸經之中。先列聲聞。多皆據此。若依甚深祕密之教。菩薩德尊。宜在先列。聲聞德劣。須在後列。故華嚴經。先列菩薩。至後祇洹重閣會中。方列聲聞。四多少分別。如涅槃說。一切眾中。少者先列。多者後列。於彼經中。聲聞眾少。故在先列。菩薩眾多。故在後列。此後一義。局在涅槃。餘通眾經。今此且依前之二義。先列聲聞。後彰菩薩。

△聲聞眾中。文別有四。一標其眾別。二辨其數。三歎其德。四列其名。

與大比丘衆。

初標其眾。此乃約佛以明其眾。以身兼彼。稱之為與。大者。外國名曰摩訶。義翻有三。一名為眾如世多人。名為大眾。二名為勝。勝過餘學。於彼九十五種道中。最為勝上。故曰摩訶。三名為大。曠備高德。過餘近學。故名為大。比丘胡語。此翻有五。一名怖魔。初出家時。發心廣大。令魔戰怯。故曰怖魔。如涅槃說。魔云何怖。魔性妬弊。忌他勝已。見彼勝已。故懷恐怖。又懼其人多化眾生。同出生死。空其境界。故生恐怖。此之一義。就始彰名。二名乞士。既出家已。



無所貯畜。乞求自活。故曰乞士。三名淨命。於乞求時。正命乞求。離於邪命。故曰淨命。此之兩義。據中立名。四名淨持戒。既出家已。精持禁戒。無所毀犯。名淨持戒。五名破惡。以持戒故。離犯戒過。故曰破惡。此後兩義。據終立稱。人多名眾。

萬二千人俱。

二辨其數。共集稱俱。

一切大聖神通已達。

三歎其德。一切大聖。歎其人高。舉一例餘。故云一切。鈍根近學不能過故。名之為大。大有二義。一位高名大。如下

所列了本際等。皆是究竟無學聖人。過餘近學。故名為大。二德勝名大。此等皆是利根聲聞。成就勝德。故名為大。會正名聖。神通已達。歎其德勝。所為神異。故名曰神。無壅曰通。通別有六。所謂身通。天眼。天耳。他心。宿命。及與漏盡。廣如別章。此應具論。此諸比丘。於小乘中修成畢竟。故曰已達。問曰。阿難於佛在世。身居學地。未得漏盡。云何得名一切大聖神通已達。釋言。阿難雖居學地。未名大聖神通已達。從多以歎。是故說言一切大聖神通已達。問曰。阿難德實未周。何須在此眾中列之。釋言。阿難此會請主。應須並列。又復阿難增上利根。雖居學地。而成無量勝妙功德。故曰大聖於神通中解了畢竟。亦名已達。上來歎德。



其名曰。尊者了本際。尊者正願。尊者正語。尊者大號。尊者仁賢。尊者離垢。尊者名聞。尊者善實。尊者具足。尊者牛王。尊者優樓頻螺迦葉。尊者伽耶迦葉。尊者那提迦葉。尊者摩訶迦葉。尊者舍利弗。尊者大目犍連。尊者劫賓那。尊者大住。尊者大淨志。尊者摩訶周那。尊者滿願子。尊者離障。尊者流灌。尊者堅伏。尊者面王。尊者異乘。尊者仁性。尊者嘉樂。尊者善來。尊者羅云。尊者阿難。皆如斯等上首者也。

四列其名。於中初言其名曰者。經家總舉。次別列之。此等皆悉有德可尊。故曰尊者。了本際者。憍陳如是姓。阿若是字。阿之言無。若之言智。證無。成智。故曰無智。無是一

切諸法本性。名為本際。於此本際知見明了。名了本際。餘者。經中或有曾聞。有不聞者。於彼一萬二千人中。今此且列三十二人皆如斯等上首者也。總以結歎。

△下次列其菩薩之眾。於中有四。一標其眾別。二普賢等。列其名字。三具諸菩薩無量德行下。讚歎其德。四如是之等不可稱下。總辨其數。

又與大乘衆菩薩俱。

初中又者。復重之辭。前列聲聞。更明菩薩。故云又也。與義同前。辨佛兼彼。故云與耳。言大乘者。舉法別人。乘是行用。行能運通。故名為乘。乘別有三。簡別餘二。餘二不如。是以稱大乘。眾菩薩俱。約法舉人。非一稱眾。菩薩胡



佛說

無量壽經義疏

語。具則名為菩提薩埵。傳者略之。但云菩薩。此方翻之。
名道眾生。菩提名道。薩埵名眾生。良以此人內心求道。備
有道行。以道成人。名道眾生。問曰。聲聞緣覺人等。斯皆
求道。並有道行。同以道成。何故獨此名道眾生。釋言。賢
聖名有通別。通則義皆。如涅槃說。故彼文云。須陀洹等亦
名菩薩。求索盡智無生智故。亦名為佛。正覺共道不共道故。
但今為分賢聖之別。是故偏名大乘眾生以為菩薩。等分賢聖。
何故偏名大乘眾生以為菩薩。解有三義。一就願心望果分別。
唯此眾生求大菩提。餘悉不求。是故獨此名道眾生。故地論
云。一心決定願菩提。獨言菩薩故。二就解心望理分別。凡
夫著有。二乘住無。不會中道。是故不得名道眾生。唯有菩
薩。妙捨有無。契會中道。是故其人名道眾生。三就行分別。

入佛法中。凡有三種。一教。二義。三者是行。教淺義深。行為最勝。聲聞鈍根。從教為名。聲者是教。餐聲悟解。故曰聲聞。緣覺次勝。就義立名。緣者是義。於緣悟解。故稱緣覺。菩薩最上。就行彰名。以能成就自利利他俱利之道。是故其人名道眾生。故地持云。聲聞緣覺。但能自度。菩薩不爾。自度度他。故名道勝。以道勝故名道眾生。共集稱俱。

普賢菩薩。妙德菩薩。憇氏菩薩等。此賢劫中一切菩薩。又賢護等十六正士。善思議菩薩。信慧菩薩。空無菩薩。神通華菩薩。光英菩薩。慧上菩薩。智幢菩薩。寂根菩薩。願慧菩薩。香象菩薩。寶英菩薩。中住菩薩。制行菩薩。解脫菩薩。皆遵普賢大士之德。



次列其名。於中先列賢劫之中成佛菩薩又賢護下。別餘劫中成佛菩薩。就賢劫中。普賢妙德與慈氏三人別列。妙德。文殊。慈氏。彌勒。姓慈。故曰慈氏。字阿逸多。此云無勝。等者。於賢劫之中其餘菩薩。此賢劫中一切菩薩。約時總分。就明餘劫諸菩薩中。隨勝略舉十六正士。又賢護等十六正士。舉初格後。總以標列。善思議等。就其所等。隨別以列。皆遵普賢大士行者。彰其所習。亦得名為簡下異上。

△下歎其德。於中分二。第一歎其權實二德。二其所修行清淨已下。歎其自利利他二德。前中有三。一就自分略歎其德。二入佛法下。就其勝進廣歎其德。三具足功德微妙已下。雙以結歎。

具諸菩薩無量行願安住一切功德之法。遊步十方。行權方便。

就初略中。先歎實德。遊步以下。歎其權德。實中。具諸無量行願。修行具足。行。謂六度四攝等行。願。謂無量菩提行願。如華嚴說。此等皆具。安住一切功德之法。成德圓備。德成無退。故曰安住。有德斯成。故曰一切。功謂功能。諸行皆有利益之功。故名為功。此功是其善行家德。故名功德。如清冷等。水家之德。故名功德。經說功德。有通有別。通則一切諸行皆是。別則宣說慧行為智。餘戒施等名為功德。今就通矣。德體名法。權中初言。遊步十方。身形無礙。行權方便。化行善巧。隨物所宜。種種異現。名權方便。上



來就其自分略歎。

△下就勝進廣歎其德。於中還初歎其實德。於無量界現成佛下。
歎其權德。

入佛法藏。究竟波岸。

實中初言。入佛法藏。證會名入。究竟彼岸。彰果畢竟。涅槃彼岸。到名究竟。

於無量世界現成等覺。

歎權德中。於無量界現成正覺。總以歎之。此歎勝進。故舉成佛為權德耳。

△處兜率下。別以顯之。於中具論。應有十相。一昇兜率天。

二來下入胎。三住胎中。四者出生。五童子相。六娉妻相。七出家相。八成佛道相。九轉法輪相。十般涅槃相。今此文
中。少一住胎。有餘九相。

處兜率天。弘宣正法。

就初相中。處兜率天。身昇兜率。兜率兜術。本是一名。傳之音異。此云妙足。亦名知足。是欲界中第四天也。何故生此。如涅槃釋。兜率天勝。為是偏生。彼云何勝。經自釋之。上天闇鈍。下天放逸。彼無此過。故得名勝。又修施戒。得上下天。修施戒定。生兜率天。故彼天勝。問曰。兜率欲界亂地。云何修定而生彼天。釋言。此非八禪地定。蓋乃欲界思慧心中。修念佛三昧。生彼天中。名依定往生。如地論。

捨波天宮。降神母胎。

無量料簡。不可具論。弘宣正法。口業化也。此初相竟。

此第二相。問曰。何故捨上天樂。為欲使彼閻浮眾生。咸荷佛恩。生敬重心。故須捨之。是義云何。由捨天樂。閻浮眾生咸皆念言。佛捨天樂。來生閻浮。慈我等故。生敬重心。問曰。於彼四生之中。何故如來偏受胎生。釋言。於彼四生之中。卵生濕生。果報卑劣。故佛不生。化生雖勝。備有多義。故佛不生。如涅槃說。略有八義。一劫初時。眾生化生。爾時眾生其病未發。不假佛化。故佛不出。佛出世時。眾生胎生。為欲增長同生之力。故受胎生。二寄生上族。表彰法勝。故受胎生。三生王種。假之護法。故受胎生。四欲教人。

敬父母之業。故受胎生。五生上族。為息物慢。故受胎生。
六受胎生。為息物謗。是義云何。若佛化生。人多誹謗。言
佛是幻化。非是真實。為息是謗。故不化生。七為留身益於
後世。故受胎生。是義云何。若佛化生。還復化滅。如電光
盡。無復遺餘。佛為留於殘身舍利。而益於後。故受胎生。
八為同諸佛。故受胎生。三世諸佛。化胎眾生。法受胎生。
故須同之。具此多義。故受胎生。第二相竟。

準餘經論。是中少一住胎之相。通此所少。第三相竟。

從右脅生。現行七步。光明顯耀。普照十方。無量佛土
。六種振動。舉聲自稱。吾當於世為無上尊。釋梵奉侍
。天人歸仰。



此是第四出生之相。於中有三。一生處異常。二現行下。所現奇特。三釋梵下。天人敬養。初中從母右脅生者。世人生處。不淨臭弊。佛為異之。故右脅生。雖從右脅生。如出雲霧。母身安適。無為無苦。第二所現奇特之中。初先明其身現奇特。舉聲已下。口現奇特。身中有三。一於十方各行七步。示現丈夫奮迅之力。於十方界獨出無畏。二身光普照。令人覺知。三無量下振動大地。使魔怯伏。六種動者。如地經說。所謂動踊振覺吼起。動如車掉。踊如泉涌。亦如釜沸。振謂下也。如世空物。振之則下。覺者動勢。令人心覺。乃至空居眾生亦知。吼者發聲。地如麪起。上來明其身相奇特。舉聲已下。口現奇特。自唱尊號。令人歸趣。上來第二所現奇特。第三段中。天人敬養。文顯可知。佛德深重。故使釋

梵咸來奉侍。人天歸仰。第四相竟。

示現算計文藝射御。博綜道術。貫練群籍。

此是第五童子之相。於中有二。一身具眾伎。謂示現算計文藝等事。佛已久知。隨化始學。故曰示現。二博綜下。知解寬廣。博綜道術。知事寬廣。博謂廣博。綜謂綜習。仙通祕術。無不博學。名博綜道術。貫練群籍。知教寬廣。貫謂貫通。練是委練。世俗異典。名為群籍。於此悉知。名貫練群籍。第五相竟。

遊於後園。講武試藝。現處宮中色味之間。

此是第六娉妻之相。於中初言。遊於後園講武試藝。娉妻前



佛說無量壽經義疏

事。如本起說。槃馬角力。名為講武。共射金鼓。說為試藝。現處宮中色味之間。娉妻後事。佛實離愛。隨化示居。故曰現處。問曰。何故示現此相。釋言。先受後捨。彰欲可厭。第六相竟。

見老病死。悟世非常。棄國財位。入山學道。服乘白馬。寶冠瓔珞。遣之令還。捨珍妙衣。而著法服。剃除鬚髮。端坐樹下。勤苦六年。行如所應。

此是第七出家之相。於中六句。合為三對。其六句者。見老病死。悟世非常。棄國財位。是第一句。明其所捨。如本起說。出城遊觀。東門見老。南門見病。西門見死。將斯類已。悟身非常。故生厭離。棄國財位。入山學道。是第二句。彰

其所習。北門見沙門。由見沙門。故求學道。文略不舉。此二一對。服乘白馬。寶冠瓔珞。遣之令還。捨珍妙衣。是第三句。重明所捨。而著法服。是第四句。彰其所受。此二一對。剃除鬚髮。是第五句。重明所捨。端坐樹下。是第六句。

△自下第八成佛道相。於中隨事。次第有五。一沐湯形垢。二靈禽下。行詣道場。三吉祥下。受草安坐。四奮大下。神力降魔。五得微妙下。現成佛道。

現五濁刹。隨順群生。示有塵垢。沐浴金流。天接樹枝。
○得攀山池。



佛說無量壽經義疏

初中三句。一居濁刹。示有塵垢。言五濁者。一者命濁。報命短促。二眾生濁。人無善行。三煩惱濁。諸結增上。四者見濁。邪見熾盛。五者劫濁。饑饉疫病刀兵競起。穢土有此。名五濁刹。佛現處中。隨順群生。示有塵垢。二沐金流。金沙河中。沐湯形垢。名沐水流。三天按樹枝。攀之出池。

靈禽翼從。注詣道場。

第二段中。靈禽翼從詣道場者。如經中說。五百青雀。隨從佛後。名禽翼從。此皆神鳥。故曰靈禽。佛得道處。名曰道場。如治麥處。名為麥場。治穀之處。說為穀場。如是一切。

吉祥感激。表章功祚。哀受施草。敷佛樹下。跏趺而坐。

第三段中。初感吉祥而為徵瑞。其吉祥者。是刈草人。經中亦名為吉安也。安祥義同。佛將成道。感見此人而為徵瑞。

知已定當成吉祥果。是故名為吉祥感徵。即以此人。表已所成因果福祚。是故名為表彰功祚。次從受草。佛心哀憐。身從受草。是故名為哀受施草。後敷而坐。依樹得佛。名為佛樹。敷此樹下。跏趺而坐。蓋乃隨人見聞不同。若論菩薩。見佛如來。從金剛際。起金剛坐。上至道場。處之成佛。如涅槃說。凡夫二乘。唯見如來吉安取草。敷而為坐。如此中說。

奮大光明。使魔知之。魔率官屬而來逼試。荆以智力。皆令降伏。

第四段中。初奮大光使魔知之。奮。猶放也。次魔來逼試。



下佛降之。言以智力者。是降魔德。智謂正智。知邪不從。力謂通力。神力伏魔。亦可慈力。慈心伏魔。皆令降伏。是降魔能。魔羅。胡語。此云殺者。害人善故。汎論有四。涅槃說八。言其四者。一煩惱魔。謂貪瞋等。能害善法。二者陰魔。謂五陰身。共相摧滅。三者死魔。能壞命根。四者天魔。於彼第六他化天上。別有魔天。好壞他善。四中初一。是生死因。末後天魔。是生死緣。中間陰死。是生死果。此之四種。大小通說。言其八者。前四種上。更加無為四倒之心。於佛真德。常計無常。樂計為苦。我計無我。淨計不淨。以此四種。近壞正解。遠障真德。故名為魔。此後四種。小乘法中。未以為患。不說為魔。大乘為過。故說為魔。通論此八。並須降伏。何故如是。煩惱陰死。無為四倒。妨違自此八。

行。故須降伏。伏法不同。彼煩惱魔。小乘多用諦觀降伏。
大乘多用空慧降伏。陰魔死魔。小乘多以無餘涅槃而降伏之。
得滅捨故。大乘多用常住法身而降伏之。無為四倒。於大因
中。正解降伏。於大果中。菩提涅槃真德降伏。天魔一種。
妨於自行。亦妨化他。故須降伏。用法不同。自行因中。正
智降伏。知邪不從。彼自退散。自行果中。十力降伏。十力
牢固。不為魔邪所傾動故。自行如是。化他之中。用法不定。
若在因中。自身降魔。利益眾生。多用神通。教他降魔多用
神咒。彼無神力能降伏故。若在果中。自身降魔。利益眾生。
多以慈心。於彼憐愍。即便退散。教他降魔。亦用神呪。彼
無慈力能降伏故。今此所論。偏降天魔。違其自行。正智降
之。違其利他。通力伏之。故云智力皆令降伏。



佛說無量壽經義疏

得微妙法。成最正覺。

第五段中。正現成佛。理是妙法。由得此法。故成正覺。第八相竟。

△自下第九轉法輪相。先請。後說。

釋梵祈勸。請轉法輪。

此初請也。

△自下因請起說。於中有二。一身口起化。二光明普照無量土
下。身口攝益。

以佛遊步。佛吼而吼。扣法鼓。吹法螺。執法劍。建法
幢。震法雷。曜法電。澍法雨。演法施。常以法音覺諸

世間。

前中初言以佛遊步。身業起化。現佛威儀。遊行化物。名佛遊步。佛吼已下。口業起化。於中十句。佛吼而吼一句。是總。一切聖教。是佛所吼。菩薩用之為物吼也。扣法已下八句是別。約喻顯法。於中前四。聞思修證四種法也。扣法鼓者。說聞慧法。益眾生也。嚴鼓誠兵。說教誠人。吹法螺者。說思慧法。利眾生也。吹螺應時。說理應機。執法劍者。說修慧法。益眾生也。劍能破裂。修能斷結。建法幢者。宣說證法。證法高勝。如幢上出。後四是其四無礙智。起說被物。震法雷者。法無礙智化眾生也。天雷一動。卉藝生芽。法音一聞。闡道快成。曜法電者。義無礙智益眾生也。電光一發。



有物斯睹。義言一宣。諸義悉見。澍法雨者。辭無礙智化眾生也。以辭宣說。如雲注雨。演法施者。樂說無礙利眾生也。

隨人所樂。宣說授與。名演法施。此八是別。常以法音覺諸世間一句。總結。上來第一身口起化。

△自下第二身口攝益。於中有四。一身業伏魔。令離邪業。二擗裂下。口業破邪。令離煩惱。此二一對。三入國分下。身業受供。生人福善。四欲宣法下。口業說法。令修出道。此二一對。

光明普照無量佛土。一切世界六種震動。總攝魔界。動魔宮殿。衆魔懾怖。莫不歸伏。

初中有四。一放光普照無量佛土。二以神力令一切界六種振

動。三由前放光。總攝魔界。令皆歸伏。四由前振動。動魔宮殿。使之懼怖。

摶裂邪網。消滅諸見。散諸塵勞。壞諸欲塹。嚴護法城。開闔法門。洗濯垢汙。顯明清白。光融佛法。宣流正化。

第二口中。文亦有四。一能摧邪。摶裂邪網。為破邪法。消滅諸見。教斷邪心。此二除見。散諸塵勞。為破欲境。五欲境界。皆能塵坌。勞亂眾生。名曰塵勞。說空破遣。目之為散。壞諸欲塹。教捨欲心。愛欲之心。深而難越。故說為塹。教斷名壞。此二除愛。此之兩對。合為第一。明能摧邪。二嚴護下。明能通正。嚴護法城。遮人毀謗。法能遮防。說之為

城。讚善息謗。名嚴名護。開闡法門。演說正教。法有通入趣入之義。故名為門。披演令人。名開名闡。三洗灌下。結前第一摧邪之義。見愛煩惱。名為垢汙。教除名洗。四顯明下。顯前第二通正之義。顯明清白。光融佛法。顯前文中嚴護法城。除邪顯正。故曰顯明。所顯之法。出離邪謗。名為清白。光揚正法。出於邪妄。故名為光。融治使淨。名融佛法。宣流法化。顯前文中開闡法門。宣流化人。故曰開闡。此初對竟。

入國分衛。獲諸豐饍。貯功德。示福田。

第三身中。入國分衛。始行乞食。胡言分衛。此云乞食。獲諸豐饍。因乞得食。貯功德下。受用生福。貯。謂積也。貯

積多德。名貯功德。現受物供。故名為示。生世福善。如田
生物。故云福田。

欲宣法。現欣笑。以諸法藥救療三苦。顯現道意。無量
功德。授菩薩記。成等正覺。

第四口中。欲宣現笑起說方便。下正說之。於中初言以諸法
藥救療三苦。令出生死。苦苦。壞苦。及與行苦。是其三苦。
義如別章。此應具論。授法教斷。名法救療。顯現已下。使
人入道。於中初言顯現道意。教人發心。顯現菩薩所發道意。
使人發矣。無量功德。教人發行。授菩薩下。終令得果。授
菩薩記。得果方便。行因剋果。如心記物。故名為記。聖說
示人。目之為授。成等正覺。正顯成佛。第九相竟。



佛說無量壽經義疏

示現滅度。拯濟無極。消除諸漏。植衆德本。

此是第十般涅槃相。示現滅度。正顯取滅。下彰其益。拯濟無窮。彰益寬廣。消除漏等。彰益具足。消除諸漏。因其現滅。令人厭有。斷生死因。植眾德本。因其現滅。使人欣寂。修涅槃因。第十相竟。上來廣歎權實二德。

具足功德。微妙難量。遊諸佛國。普現道教。

第三雙以結之。具足功德。微妙難量。結前實德。遊諸佛國。普現道教。結前權德。上來結其權實二德。

佛說無量壽經義疏卷一

佛說無量壽經義疏卷二

曹魏天竺三藏康僧鎧譯經

隋京師淨影寺沙門慧遠撰疏

自下第二歎其自利利他功德。行能益己。名為自利。行能兼潤。說為利他。菩薩所行。要不出此。故讚歎之。於中初略歎。菩薩經典究暢下。廣歎。

其所修行。清淨無穢。譬如幻師。現衆異像。為男為女。無所不變。本學明了。在意所為。此諸菩薩亦復如是。學一切法。貫綜縷練。所住安謐。靡不感化。無數佛土。皆悉普現。未曾慢恣。愍傷衆生。如是之法。一切



佛說

無量壽經義疏

具足。

略中初別。後總結之。別中有四。一自行清淨。二譬如下。化行善巧。先喻。後合。喻中初言譬如幻師。喻起化人。現眾異像。為男為女等。喻起化相。本學明等。喻起化德。本學明了。喻習化法。學為化本。故名為本。於佛化法。習之委善。名學明耳。在意所為。學成起用。成在於心。故名在意。任意為化。故曰所為。下合顯法。菩薩如是。合前幻師。學一切等。合起化德。學一切法。合本學也。謂學一切化他之法。貫綜縷練。合明了也。貫通綜習。知法委審。故曰縷練。所住安諦。合在意也。於所住法。安心審諦。靡不致化。合所為也。靡謂無也。致。謂運致。於一切處無不運化。又

復致者。是其感致。令一切眾無不感化。無數佛土。皆悉普現。合前化相。合現眾像為男女等。此是第二化行善巧。三未曾下。顯前第一自行清淨。以於所得。未曾擣高而自縱恣。故行清淨。四愍傷下。顯前第二化行善巧。愍傷。悲也。心有悲心。愍傷眾生。故能為物種種起化。上來別歎。如是之法。一切具足。總以結之。上來略歎。

下廣歎之。於中有四。一依菩薩法修自分行。二無量佛咸共護下。明依佛法修勝進行。三供養佛下。依前自分廣修成德。四受持如來甚深法下。依前勝進辨修成德。

菩薩經典。究暢要妙。名稱普至。道御十方。

就初段中。先修自利。後起利他。菩薩經典。究暢要妙。是



自利也。於菩薩法。窮究通暢。得其宗要。知其妙旨。是故名為究暢要妙。名稱普至。導御十方。是利他也。

無量諸佛咸共護念。佛所住者皆已得住。大聖所立而皆已立。如來道化各能宣布。為諸菩薩而作大師。以甚深禪慧開導衆人。通諸法性。達衆生相。明了諸國。

第二段中。亦先自利。如來道化各能宣下。是其利他。就自利中。無量諸佛護念。上德攝下。行入佛境。故為諸佛同共護念。護使離惡。念令增善。佛所住等。下修順上。於中初言佛所住者皆已得住證行同佛。佛所住法。菩薩同住。亦可諸佛住於如行。菩薩同住。大聖所立而皆已立。教行同佛。大聖是佛。法界諸度是佛所立。菩薩同立。下利他中。初利

他相。通諸法下。明利他德。利他相中。如來道化各能宣布。為菩薩師。教法利人。如來道化各能宣布。說法同佛。為諸菩薩而作大師。益人同佛。現行佛化。故為菩薩而作大師。以深禪慧開導眾人。證法益物。以深禪慧。化行同佛。禪止慧觀。證行雖眾。要不出此。開導眾人。益人同佛。利他德中。明具三種自在之行。故能化物。通諸法性。是智正覺自在行也。謂能通達二諦法性。達眾生相。眾生世間自在行也。眾多生死。故曰眾生。眾法成生。亦名眾生。若形若體。種種相狀。一切悉知。明了諸國。是器世間自在行也。初句云通。第二言達。第三說明。語左右耳。此三廣如他經中說。

△自下第三依前自分廣修成德。於中有四。一攝修方便。二亦無作下。因修成德。三住深定下。重明起修。四超過世間所



有已下。重明所成。

△初中復四。一修自利。二壞裂下。明其利他。三超越下。復明自利。四善立下。重明利他。初段自利。明修教行。第二利他。教人離過。第三自利。明修證行。第四利他。教令修善。故有四別。

供養諸佛。化現其身。猶如電光。善學無畏之網。曉了幻化之法。

初自利中。供養諸佛。化現其身猶如電光。明修福行。供養諸佛。興福廣也。化身如電。起行疾也。一念之間。化身徧至。供養諸佛矣。善學已下。明修智行。善學無畏。修習方便。曉了幻化。智行成就。又學無畏。於人不怯。曉了幻化。

於法能知。簡邪取正。名為善學。達正過邪。所以無畏。以無畏智統攝諸法。故名為網。亦可學此擬用攝人。故說為網。明見諸法離有無性。猶如幻化非有非無名為曉了幻化法矣。法若定有。不名幻有。法若定無。不名幻無。無法為有。方名幻有。有法為無。方名幻無。無法為有。有則非有。有法為無。無則非無。幻法如是。故取為喻。化亦如是。經說十喻。具舉斯耳。上來自利。是初段竟。

壞裂魔網。解諸纏縛。

次約利他。壞裂魔網。令離邪業。解諸纏縛。令離煩惱。纏謂十纏。無慚。無愧。睡。悔。慳。憊。掉。眠。忿。及覆。是其十也。纏眾生故。纏縛心故。名之為纏。縛謂四縛。欲

縛。有縛。無明縛。見縛。是其四也。欲界諸結。除無明見。
名為欲縛。上二界中。一切煩惱。除無明見。名為有縛。三
界無明。名無明縛。三界諸見。名為見縛。縛眾生故。繫縛
心故。名之為縛。亦可一切諸煩惱結。通名纏縛。菩薩教人
斷離。名解。此兩段竟。

超越聲聞緣覺之地。得空無相無願三昧。

第三重明自利。超越聲聞緣覺之地。所修殊勝。此明所出聲
聞名義。汎解有三。一如來所說言教名聲。餐聲悟解。故曰
聲聞。二我眾生等。但名無實。故說為聲。如地論說。觀斯
之解。義說為聞。三佛所說大乘法音。名之為聲。以佛道聲
令一切聞。故曰聲聞。如法華釋。前二小乘。後一大乘。今

論小矣。名義如是。體相如何。分別有二。一聲聞聲聞。二緣覺聲聞。義如上釋。其緣覺者。名義有三。一十二緣法。名之為緣觀。此得覺。故名緣覺。如彼十二因緣經說。二現在世事相因緣。名之為緣。藉斯得悟。故名緣覺。如辟支佛得道經說。三如來藏緣起法界。名之為緣。於中悟迷。故名緣覺。三中前二是其小乘。後一大乘。今論小矣。名義如是。相狀如何。分別有二。一緣覺緣覺。二聲聞緣覺。緣覺緣覺者。是人本來求緣覺道。常樂觀察十二緣法。成緣覺性。於最後身。不值佛世。藉現事緣而得悟道。是故名為緣覺緣覺。聲聞緣覺者。是人本來求聲聞道。成聲聞性。值佛為說四真諦法。得悟初果。以鈍根故。不得漏盡。天上人中。七返受生。於最後身。不值佛世。藉現事緣而得悟道。本聲聞人。



於最後身。藉現事緣而得覺故。說之以為聲聞緣覺。此等一切。菩薩悉過。故言超越。得空無相無願三昧。所得淵深。此明所入眾生及法。悉無自性。故名為空。乃至因緣。相亦不有。說為無相。此離所取。遠離妄想能取之心。故名無願。三昧。胡語。此云正定。於此三空正住不亂。故名三昧。就此得名。義有多門。廣如別章。此應具論。此三段竟。

善立方便。顯示三乘。於此中下而現滅度。

第四重明利他。善立方便。是化他智。方便之義。汎論有四。一進趣方便。如見道前七方便等。進趣向果。故名方便。二施造方便。如十波羅蜜中。方便波羅蜜巧修諸行。故曰方便。三權巧方便。如二智中。方便智等。權巧攝物。故名方便。

四集成方便。諸法同體。巧相集成。故曰方便。故地論云。此法巧成。名為方便。又他經中。說六相門。以為方便。此亦是其集成方便。今此所論權巧方便。於權巧中方便有三。一身業方便。權形異現。如觀世音。方便之力。其事云何。應以佛身得度者。即現佛身而為說法。如是一切。二口業方便。隨化眾生。種種異說。名為方便。如無二乘。權以說之。如是一切。三意業方便。謂方便智。隨化眾生。種種異解。今此所論。是其權中意業方便。善立三業。巧便度物。故曰方便。顯示三下。是化他行。顯示三乘。說三乘因。就大分小。名示三乘。於此中下而現滅度。說小乘果。緣覺名中。聲聞名下。於此二中說有涅槃。名現滅度。此等即是口業方便。上來四段。合為第一攝修所行。



△自下第二因修成德。於中初明自利功德。宣揚已下。明利他

德。初中有四。一所證平等。二具足下。所成眾多。三廣普
下。所證深廣。四得佛下。所成殊勝。

亦無所作。亦無所有。不起不滅。得平等法。

所證等中。亦無所作。無因可作。亦無所有。無果可有。言
不起者。無淨可起。言不滅者。無染可滅。此舉道理。得平
等法。約理辨證。名前無作無所有等。為平等法。證會名得。

具足成就無量總持。百千三昧。諸根智慧。

所成多中。具足成就無量總持。得陀羅尼行德多也。如他經
說。百千三昧諸根智慧。餘德多也。信進念等。名為諸根。

若通論之。一切善法。悉名諸根。如涅槃說。

廣普寂定。深入菩薩法藏。

就明所證深廣之中。廣普寂定。所證廣也。一切法中不起妄想。名廣寂定。深入法藏。所證深也。於真法藏能深入矣。

得佛華嚴三昧。

所成勝中。得佛如來華嚴三昧。故德勝也。華嚴三昧。如華嚴說。彼一三昧。統攝法界一切佛法悉入其中。上來自利。

宣揚演說一切經典。

宣暢一切。利他可知。



住深定門。悉覩現在無量諸佛。一念之頃。無不周遍。
濟諸劇難。諸閑不閑。分別顯示真實之際。得諸如來辯
才之智。入衆言音。開化一切。

第三重明起修。住深定門。悉覩現在無量佛等。修起自利。
住深定門。起行所依。無心往來。直以三昧法門力起。故須
住定。下明起行。悉覩現在無量諸佛。攝行寬廣。由見多佛。
供養生福。受法生智。一念之頃無不周徧。起行速疾。下明
利他。濟諸劇難諸閑不閑。扶人離苦。難別有八。三塗為三。
人中有四。一盲聾喑啞。二世智辨聰。三佛前佛後。四鬱單
越界。天中有一。謂色界中長壽天也。此八難中。三塗為劇。
菩薩濟之。人天苦微。名曰諸閑。菩薩勤化。故曰不閑。分

別顯等授人善法。分別顯示真實之際。證法教人。理性真實。得處名際。授人名示。得諸如來辯才智等。教法利物。得諸如來辯才之智。謂得如來四無礙智。解了諸法。入眾言音。起說之解。入。謂解也。謂解眾生種種言音。用之起說。開化一切。正明起說。

超過世間諸所有法。心常諦住度世之道。於一切萬物而隨意自在。為諸庶類作不請之友。荷負群生。為之重擔。

第四重明所成。於中初明成就自德。於一切下。成利他德。自中初言超過世間諸所有法。所成殊勝。心常諦等。所成不動。又過世間。明成斷德。謂過分段變易世間一切法也。心常諦住度世之道。明成智德。諦謂安諦。謂常安住真實無為

度世之道。下利他中。於一切萬物隨意自在。成利他德。由成勝通。於一切物變化隨意。故能利物。名為自在。為諸庶等。起利他用。為諸庶類作不請友。化益方便。庶謂凡庶。類謂品類。不請有二。一宿無道根惱感菩薩名為不請。二無現樂欲不知求聖。名為不請。菩薩於此強為作友。荷負群生為之重擔。正明化益。聲聞捨物。不將眾生以為重擔。菩薩荷負。故用眾生而為重擔。擔別有四。如勝鬘說。此第三竟。
△自下第四依前勝進辨修成德。於中初先辨其所修。一切善本皆度已下。明其所成。

受持如來甚深法藏。護佛種性。常使不絕。興大悲。愍衆生。演慈辯。授法眼。杜三趣。開善門。以不請之法

施諸黎庶。猶如孝子愛敬父母。於諸衆生視之若己。

前所修中。初明自利。二興大悲下。明修利他。就自利中。受持如來甚深法藏。明修勝解。如來藏性。是佛如來甚深法藏。闇障既除。明現己心。故曰受持。護佛種性常使不絕。明修勝行。法界諸度。是佛種性。護使離障。起善無間。名常不絕。下利他中。先法後喻。法中四句。初興悲愍。明起悲心。二演慈辨下。明起慈心。依慈心起說。名演慈辨。教法生解。名授法眼。三杜三趣開善門者。顯前悲益。杜謂塞也。教人離惡。故杜三趣。教人修福。故開善門。四以不請法施黎庶者。顯前慈益。喻中兩句。初如孝子愛敬父母。彰前慈厚。於諸眾生已下。顯上悲深。上明所修。下明所成。



一切善本皆度彼岸。悉獲諸佛無量功德。智慧聖明不可思議。

一切善本皆度彼岸。明其所成。度猶到也。涅槃彼岸。行因到之。故因成矣。悉獲佛等。明其果成。兼有福智。悉獲諸佛無量功德。明得如來福德莊嚴。智慧聖明不可思議。明得如來智慧莊嚴。智慧深廣。情緣莫測。口量不及。名不思議。上來歎德。

如是之等菩薩大士。不可稱計。一時來會。

如是之等不可稱計。是第四段彰其數量。此等悉為影響顯法。故皆來會。為法心同。故來一時。上來第二辨列徒眾。

△自下第三如來現相而為起發。阿難啟請。於中文六。攝為三對。言文六者。第一如來現相起發。二阿難請問。此為初對。三如來審問汝為自請為受教請。四阿難實答我自請問。此是兩對。五如來讚歎勅聽許說。六對曰下。阿難奉勅彰已樂聞。此是三對。

爾時世尊。諸根悅豫。姿色清淨。光顏巍巍。

初中爾時。舉現相時。言世尊者。舉現相人。佛備眾德。為世欽仰。故號世尊。若論胡音。樓伽陀伽。此云世尊也。諸根悅等。明所現相。諸根悅豫。示現喜相。眼等五根。同現喜相。名之悅豫。姿色清淨。示現喜色。色無慘憾。故曰清淨。言光巍巍。重顯喜色。言顏巍巍。重顯喜相。巍巍是其

高勝之貌。佛何故喜。喜有兩義。一念彌陀佛所成行德可慶。故喜。二念眾生得益時至。故生歡喜。

尊者阿難。承佛聖旨。即從座起。偏袒右肩。長跪合掌而白佛言。

第二段中。尊者阿難。舉能請人。承佛聖旨。彰所請依。旨謂意旨。此承如來意力加被。故興諸問。即從座等。啟請方便。而白佛等。正宣諸辭。

△辭中有三。一申己所見。二唯然下。彰己所念。三何故下。結問所為。

今日世尊。諸根悅豫。姿色清淨。光顏巍巍。如明鏡淨。

影暢表裏。威容顯耀。超絕無量。未常瞻覩殊妙如今。

初中。先法。次喻。後合。未常瞻下。怪今異昔。法中還舉
向前所現。喻中如鏡影表裏者。鏡光外照。名為影表。外照
之光。明顯鏡內。名為影裏。佛身如是。光明外照所放之表。
顯曜佛身。名影表裏。合喻可知未常瞻覩殊妙如今。怪今異昔。
顯曜佛身。名影表裏。合喻可知未常瞻覩殊妙如今。怪今異昔。

唯然大聖。我心念言。今日世尊住奇特之法。今日世雄
住諸佛所住。今日世眼住導師之行。今日世英住最勝之
道。今日天尊行如來之德。去來現在佛佛相念。得無今
佛念諸佛耶。

第二彰已所念。於中初言唯然大聖我心念言。總宣己心。唯。



是專義。彰已專念。故曰唯矣。然。謂爾也。彰已心中所念實爾。故曰唯然。啟佛令知。故云大聖。自宣己心。名我念言。下別顯之。於中初先念佛所得。去來現下。念佛所為。前中五句。相隱難識且以言之。初句是總。餘四是別。總中初言今日世尊。表別所念。為簡餘佛。故云今日。下餘句中今日例爾。住奇特者。佛所得法。超出餘人。在世所無。故云奇特。下四別顯。初句自德。第二利他。第三自德。第四利他。第一第三自德何別。前是涅槃。後是菩提。第二第四利他何別。前者是其利他之行。謂四攝等。後者是其利他之德。所謂十力四無礙等。初中世雄。佛之異名。佛於世間最為雄猛。故曰世雄。住佛住者。涅槃常果。諸佛同住。今日世雄住彼所住。住大涅槃。能起化用。故今念之。第二句中。

今日世眼。佛之異稱。能開世人眼。令見正道。故名世眼。
住導師行者。四攝法等。是佛導師化人之行。今佛住之。由
住此行。今欲導人令人佛法。所以念之。第三句中。今日世
英。佛之別號。佛於世間最為英勝。故云世英。住勝道者。
無上菩提。是最勝道。內證真道。是菩提道矣。佛今住之。由
住此道。知諸佛德。故今念之。第四句中。今日天尊。是佛
異名。天有五種。如涅槃說。一者世天。謂世人王。名為天
子。二者生天。謂四王天。乃至非想。三者淨天。謂須陀洹。
至辟支佛。四者義天。謂諸菩薩。以解諸法空寂義故。五者
第一義天。謂佛如來。解知佛性不空義故。佛於如是五天中
上。故曰天尊。行如來德者。十力無畏十八不共五眼六通四
無礙等。是佛功德。遊入名行。由入此德。堪任度物。故今

念之。上來一段。念佛所得。下念所為。念諸如來。是所為也。去來現在佛。佛相念。舉餘類此。得無今佛念諸佛耶。測此念餘。耶者。是其不定之辭。以理測度。未敢專決。是故言耶。

何故感神光。光乃爾。

結問所為。此初對竟。

於是世尊告阿難曰。云何阿難。諸天教汝來問佛耶。自以慧見問。感顏乎。

第三如來審問。告曰云何。是總問也。諸天教汝。自以慧見。是別問也。

阿難白佛。無有諸天來教我者。自以所見問斯義耳。

第四阿難實答。無天教我。對佛前言。自以所見問斯義矣。此兩對竟。

△自下第五如來歎問。勅聽許說。於中初先歎其所問。阿難當知如來正覺下。舉佛功德。勅聽許說。

佛言。善哉阿難。所問甚快。發深智慧。真妙辯才。愍念衆生。問斯慧義。如來以無盡疏本
作益大悲矜哀三界。所以出興於世。光闡道教。欲拯濟群萌。惠以真實之利。無量億劫難值難見。猶靈瑞華。時時乃出。今所問者。多所饒益。開化一切諸天人民。



歎中初言。善哉阿難。所問甚快。是總歎也。善謂好耳。哉是助辭。稱機。當法。合時。名快。發深下別。發深智慧。歎其問智。向前念佛五種功德。名發深智。真妙辯才。歎其問辭。向前歎佛住於五德。名真妙才辯。辯實名真。言巧稱妙。言能辯了。語能才巧。故曰辯才。愍生問義。歎其問心。亦得名為歎問所為。阿難向前舉佛五德而為請問。此之五德。以慧為主。名問慧義。如來已下。歎問利益。於中有四。一如來彰己悲心憐生。佛悲殊勝。餘不能加。不能蓋上。名無蓋悲。亦有經本治為無盡。無蓋是正。不須治改。以此大悲矜哀三界。矜猶憐也。欲。色。無色。是其三界。二所以下。如來彰己出世為物。所以出興。問以起發。下對顯之。光闡道教。欲拯群萌。教法利人。惠以真利。證法益物。理是真

實。教人名利。三無量億下。明佛難值。先法。後喻。四今所問下。約對三界明問有益。今問多益。總明有益。開化一切。別明益也。上來歎其所問。

△下舉佛德。勅聽許說。於中初先廣舉佛德。述前所歎。阿難諦下。勅聽許說。說已所念。又復前段廣舉佛德。明已能說。後勅聽許說。明已欲說。就前段中。先明果勝。所以者下。辨因顯果。

阿難當知。如來正覺。其智難量。多所導御。慧見無礙。無能過絕。以一餐之力。能住壽命億百千劫。無數無量渡過於此。諸根悅豫。不以毀損。姿色不變。光顏無異。



佛說

無量壽經義疏

就明果中。初先對上阿難所念。明佛慧勝。以一餐下。對前
阿難所見諸根悅豫等事。明佛身勝。明慧勝中。如來正覺。
總舉佛智。其智難等。別以顯勝。其智難量。明智深也。窮
證涅槃甚深法性。故智難量。此則是前住佛所住。難量之智。
證法名住。多所導御。明智廣也。此則是前住導師行。慧見
無礙。彰智自在。於諸法門知見無礙。此則是前行如來德。
無能遏絕。顯其智勝。不為他人之所遏絕。顯其勝相。名無
遏絕。此則是前住最勝道。下明身勝。以一餐力能住壽等。
約化顯實。明佛體常。以實常故。隨化現受一餐之力。能住
多劫身無衰損亦得名為約實顯化。文中初言以一餐之力能住
壽命億百千劫。彰命常也。諸根悅等。明身常也。諸根悅豫
不以毀損。就上所現諸根悅豫。明其常德。姿色不變。就上

所現姿色清淨。明其常命。光顏無異。就上所現光顏巍巍。明其常定。上來就果明佛身慧二種俱勝。下次舉因顯成前果。

所以者何。如來定慧。究暢無極。於一切法而得自在。

所以者何。徵問發起。所以如來得此勝慧常身者何。下對釋之。如來定慧究竟暢無極。明其所修成滿故勝。定止。慧觀。此二行主。以是偏舉。餘皆從之。故隱不論。定慧究竟。故名為究。通暢自在。故名為暢。寬廣無邊。稱曰無極。此則是其心自在行。於一切法而得自在。明其所學自在故勝。此則是其法自在行。善入一切法界之門。法門之力無所不現。名為自在。上來廣舉佛德。述前所歎。

阿難諦聽。今為汝說。



勅聽許說。說已所念。謂念西方無量壽佛。諦聽。勅也。為汝。許也。此第五竟。

對曰。唯然。願樂欲聞。

第六阿難奉教聽受。文顯可知。上來序竟。

△就正宗中。文別有三。一明所行。二阿難白佛法藏比丘為已成佛而取滅下。明其所成。三告阿難其有眾生生彼國者住正定下。明其所攝。此三皆就彌陀佛說。言所行者。彰彼如來本昔所修無量行願。言所成者。彰彼如來現今所得身土之果。

言所攝者。彰彼如來現今攝取十方國土無量眾生。同往彼國教化利益。此三即是經之大宗。

△就所行中。初列多佛。明起行緣。時有國王聞佛說下。彰彼

法藏依之起行。

佛告阿難。乃注過去久遠無量不可思議無央數劫。錠光如來興出於世。教化度脫無量衆生。皆令得道乃取滅度。次有如來名曰光遠。次名月光。次名栴檀香。次名善山王。次名湧彌天冠。次名湧彌等曜。次名月色。次名正念。次名離垢。次名無著。次名龍天。次名夜光。次名安明頂。次名不動地。次名瑠璃妙華。次名瑠璃金色。次名金藏。次名炎光。次名炎根。次名地種。次名月像。次名日音。次名解脫華。次名莊嚴光明。次名海覺神通。次名水光。次名大香。次名離塵垢。次名捨厭意。

。次名寶炎。次名妙頂。次名勇立。次名功德持慧。次名蔽日月光。次名日月瑠璃光。次名無上瑠璃光。次名最上首。次名菩提華。次名月明。次名日光。次名華色王。次名水月光。次名除癡冥。次名度蓋行。次名淨信。次名善宿。次名威神。次名法慧。次名鸞音。次名師子音。次名龍音。次名處世。如此諸佛皆悉已過。爾時次有佛名世自在王。如來。應供。等正覺。明行足。善逝。世間解。無上士調御丈夫。天人師佛世尊。

前中合舉五十四佛。初五十三。一處並舉。末後一佛。法藏親承。一處別舉。就前五十三佛之中。乃往過去不思劫等。

彰其時分。定光出等。次第辯列。如此諸佛皆悉已過。結前
生後。下次列其自在王佛。名世自在。是其別名。如來應等。
是其通號。佛德無量。依德施名。名亦無限。經隨一數。略
列十種。十中前五。是佛自德。後五利他。就前五中。初二
一對前一道圓。後一滅極。後三一對。初二因圓。後一果極。
就初對中。言如來者。彰其道圓。乘如實道。來成正覺。故
名如來。言應供者。顯其滅極。證滅相應。故名為應。又證
滅故。合應供養。故云應供。就後對中。初二因圓。於中初
言等正覺者。彰其解圓。餘經中亦名正徧知也。正者是理。
於理窮照。故名徧知。今言等者。是徧知也。稱理名等。正
者還是餘經正也。言其覺者。是彼知也。明行足者。明其行
圓。明是證行。證法顯了。故名為明。分別有三。如涅槃說。



一菩薩明。所謂般若波羅蜜多。二諸佛明。所謂佛眼。三無
明明。謂十一空。彼非智解。故曰無明。能生智明。故復名
明。前二能證。後一所證。又龍樹說。佛具宿命。天眼。漏
盡。故曰三明。行是教行。如地持說。正觀名行。又龍樹說。
戒定慧等。名之為行。此二圓具。故名為足。言善逝者。明
其果極。善名為好。逝稱為去。如來好去。故曰善逝。佛德
滿足。更何處去。而言好去。雖無去處。非不能去。如劫盡
火。雖無所燒。非不能燒。故得云去。就後五中。前四是別。
後一是總。前四別中。世間解者。是化他智。善解世間。名
世間解。無上士調御丈夫。及天人師。此之兩號。是化他能。
彼無上士調御丈夫。能調物心。自調調他。調御中極。故曰
無上。士者。是其人之別稱。此無上士能善方便調伏眾生。

名調御。丈夫。天人師者。能授與法。能以正法近訓天人。
名天人師。六道俱化。天人益多。以是偏舉。佛者。是其化
他之德。此翻名覺。自覺覺他。覺行窮滿。故名為佛。言世
尊者。此號是總。佛備眾德。為世欽重。故號世尊。上來
明佛之起行緣。

△下明法藏依之起行。於中初明世間之行。佛告阿難法藏比丘
說此頌下。明出世行。地前所行。名為世間。地上出世。

△世間行中。次第有三。一聞法發心。二出家修道。三詣佛所
禮讚發願。

時有國王。聞佛說法。心懷悅豫。尋發無上正真道意。

初中。時有國王。舉起行人。聞佛說法心懷悅豫。聞法心喜。



尋發道意。正明發心。菩提心義。廣如別章。此應具論。

棄國捐王。行作沙門。號曰法藏。高才勇哲。與世超異。

第二段中。棄國捐王。明其所捨。行作沙門。彰其所為。此翻名息。息諸惡故。號曰法藏。列其名諱。高才勇等。辨其性行。才謂才巧。才德過人。故曰高才。志強名勇。心明稱哲。此德孤出。名世超異。

詣世自在王如來所。稽首佛足。右遶三匝。長跪合掌。
以頌讚曰。

第三段中。初詣佛所。次到已敬。稽首。敬也。屈尊接卑。
故用表敬。右遶。愛也。旋遶不捨。故用表愛。長跪已下。

讚歎發願。長跪合掌。興讚方便。以偈頌曰。經家總舉。何故言偈頌。言義妙美。諸讚歎者。多用偈頌。又偈巧約。少字之中。能攝多義。法藏比丘。欲以約言廣收佛德。故以偈頌。

△下出偈辭。初有七偈。讚歎佛德。明其所求。後十三偈。發願求佛。明其能求。

光顏巍巍 威神無極 如是炎明 無與等者

日月摩尼 珠光燄耀 皆悉隱蔽 猶如聚墨

如來容顏 超世無倫 正覺大音 響流十方

戒聞精進 三昧智慧 威德無侷 殊勝希有

深諦善念 諸佛法海 窮深盡奧 究其涯底

無明欲怒 世尊永無 人雄師子 神德無量



功勳廣大 智慧深妙 光明威相 震動大千

前七偈中。初五偈半。正歎佛德。後一偈半。結歎佛德。前正歎中。初兩偈半。歎佛身業。次有半偈。歎佛口業。後兩偈半。歎佛意業。就歎身業中。言光巍巍。歎佛光勝。以為一門。言顏巍巍。歎佛身勝。復為一門。巍巍之言。已如上釋。復有七句。顯光巍巍。威神無極。光發所依。由佛威德。神力無極。故能放光。如是炎明。正舉光體。無與等者。對人顯勝。餘人身光無與齊等。日月摩尼至若聚墨。對事顯勝。此等諸光。若對佛光。皆悉隱蔽。猶如聚墨在珂貝邊。下有兩句。顯顏巍巍。如來容顏超世無倫。故顏巍巍。倫謂匹矣。次歎口業。正覺大音響流十方。下歎意業。於中初有兩偈之

文。歎佛行德。後之半偈。歎佛斷德。行是菩提。斷是涅槃。
前中初偈。歎佛德勝。後之一偈。歎佛德深。勝是教行。深
是證行。前歎勝中。戒聞精進三昧智慧。舉其德體。威德無
侶。殊勝希有。就德顯勝。威德無侶。他不能齊。殊勝希有。
佛德過彼。後歎深中。深諦善念諸佛法海。趣證方便。諦謂
審諦。深思諦觀。念佛法海。故能得證。如來藏性。是佛法
海。窮深盡奧究其涯底。證行成就。此歎行德。下歎斷德。
無明是癡。欲者是貪。怒者是瞋。佛斷永無。故斷勝矣。上
來別歎三業功德。自下結歎。人雄師子神德無量。總以結歎。
功勳廣等。隨別結歎。功勳廣大。智慧深妙。結歎前意。前有多德。
十方。故佛化他功德廣大。智慧深妙。結歎前意。前有多德。
偏結其慧。以行主故。深結前深。妙結前勝。光明威等。結



歎前身。上來歎竟。

△自下發願求前所歎。於中初有十偈之文。正起願心。後之三偈。請佛證知。前十偈中。初之五偈。求佛法身。後之五偈。求佛淨土。

願我作佛 齋聖法王 過度生死 靡不解脫
布施調意 戒忍精進 如是三昧 智慧為上
吾誓得佛 普行此願 一切恐懼 為作大安
假令有佛 百千億萬 無量大聖 數如恆沙
供養一切 斯等諸佛 不如求道 堅正不郤

求法身中。初之一偈。願求佛果。次有兩偈。願求佛因。後

之兩偈。校量顯勝。就求果中。願我作佛齊聖法王。求佛自德。過度生死靡不解脫。求利他德。就求因中。初有偈半。求自利行。下有半偈。求利他行。求自利中。初偈舉彼六度之行。布施調意。是其檀度。修施治慳。名為調意。戒是戒度。忍是忍度。精進進度。三昧禪度。智慧智度。慧勝名上。下對起願。吾誓得佛。起行所趣。普行此願。求因趣向。下求利他。文顯可知。上來求因。自下兩偈。校量顯勝。堅其願心。假令有佛百千億萬。舉其佛寶。無量大聖數如恆沙。舉其僧寶。供養一切。供前僧寶。斯等諸佛。供前佛寶。不如自如求下。對願比校。彰其不及。卻猶退也。雖供多聖。不如自己求道不退。故重堅發。經中如此比較大多。不可具說。供養有限。求道之心無齊限故。



譬如恆沙 諸佛世界 渡不可計 無數刹土
光明悉照 遍此諸國 如是精進 威神難量
令我作佛 國土第一 其衆奇妙 道場超絕
國如泥洹 而無等雙 我當愍哀 度脫一切
十方來生 心悅清淨 已到我國 快樂安隱

求淨土中。初三偈半。自求淨土。後一偈半。求土攝他。就自求中。初有兩偈。汎舉多土。次有半偈。明已所求。於諸土中。最為第一。後之一偈。顯第一相。前汎舉中。如恆沙等。廣舉多土。光明照等。就彼多土明莊嚴相。光徧此國。

明佛如來光明莊嚴。如是精進威神難量。明佛如來神通莊嚴。佛於彼土勤現化事。名為精進。化事眾多。是故名為威神難

量。此汎畢竟。令我作佛國第一者。於前所舉諸國土中。諸相莊嚴最為第一。現今所成彌陀國是。下有一偈。顯第一相。其眾奇妙。明眾第一。道場超絕。明處第一。國如泥洹而無等雙。明國第一。亦得名為樂第一也。泥洹涅槃。本是一名。傳之音異。故下文言。彌陀國中。眾生受樂。而次泥洹。上來自求。下有一偈半。求土攝物。我當愍哀度一切者。明已當來成佛道時度脫一切。十方來生心悅淨等。明於當來生我國者齊獲勝益。十方來生。生人多也。心悅清淨。歸心純也。已到我等。獲利勝也。上來十偈。正起願心。

△下有三偈。請佛證知。

幸佛信明 是我真證 發願於波 力精所欲



十方世尊 智慧無礙 常令此尊 知我心行
假令身止 諸苦毒中 我行精進 忍終不悔

於此文中。初有半偈。請世自在佛為已作證。次有半偈。更興願心。次有一偈。請十方佛為已作證。下有一偈。重起願心。初半偈中。幸猶願也。願佛信我所求不虛。明我當來定必得果。是故請言幸佛信明。佛證不虛。故說言是我真證。

其次半偈更興願中。發願於彼所求之事。力勵精勤修習所欲。

法身淨土。各顯於彼力精所欲。其次一偈。請十方佛作證可知。末後一偈重起願中。結誓自要。故云假令身止諸苦忍終不悔。上來明其世間之行。

佛說無量壽經義疏卷二

佛說無量壽經義疏卷三

曹魏天竺三藏康僧鎧譯經

隋京師淨影寺沙門慧遠撰疏

△下明出世。於中初略。如是修已詣彼佛下。廣明所行。略中有三。初法藏請。如來反答。彰彼先知。不為宣說。二法藏重請。如來為說。三法藏聞說。依之奉行。

佛告阿難。法藏比丘說此頌已。而白佛言。唯然世尊。我發無上正覺之心。願佛為我廣宣經法。我當修行。攝取佛國清淨莊嚴無量妙土。令我於世速成正覺。拔諸生死勤苦之本。佛語阿難。時世自在王佛。告法藏比丘。



如所修行。莊嚴佛土。汝自當知。

初中先請。後佛反答。請中法藏說此頌已。結前起後。而白佛下。彰彼請辭。我發無上正覺之心。牒前起後。向前偈中求身求土。名發無上正覺之心。心為行本。彰已有本。明堪起行。生彼請也。願佛為我廣說經法。正請宣說。我當修等。彰請所為。所為有三。一是所行。二是所成。三是所攝。我當修行。是其初門。修行法身淨土之因。攝取已下。是第二門。明已所成。攝取佛國清淨莊嚴等。是所成土。於世速成。是所成身。拔生死等。是第三門。明已所攝。攝取眾生。教化令出生死苦本。拔生死者。出生死果。拔慚苦本。離生死因。由因數受生死之苦。故名彼因為慚苦本。下佛返答。饒王佛者。世自在王之別名也。告法藏等。返答之辭。此初段竟。

比丘白佛。斯義弘深。非我境界。唯願世尊。廣為敷演
諸佛如來淨土之行。我聞此已。當如說修行。成滿所
願。爾時世自在王佛。知其高明。志願深廣。即為法藏
比丘而說經言。譬如大海。一人斗量。經歷劫數。尚可
窮底。得其妙寶。人有至心精進。求道不止。會當剋
果。何願不得。於是世自在王佛。即為廣說二百一十億
諸佛刹土。天人之善惡。國土之麤妙。應其心願。悉現
與之。

第二段中。初法藏請。斯義弘深非我境界。彰已不知。前佛
據其自分所修。道言自知。法藏今就勝進所習。言非已境。



不相乖違。斯謂此也。弘謂大也。此前所請出世之行。其義大深。非我境界。為是次請。唯願廣等。請佛宣說。文中偏求淨土之行。身行略無。我聞此下。彰請所為。下佛為說。知其高明志願深廣。知其心大。下佛授法。即為法藏而說經言。總明所說譬如下別。別中初先教其堅心。先喻。後合。於是世已下。正為宣說淨土之法。即為廣說二百一十億諸佛刹土。天人善惡。汎說一切諸土之因。國土龐妙。汎宣一切諸土之果。龐不精也。說惡說龐。令其捨遠。說善說妙。使其修習。於諸說中隨欲廣教。名應心願悉現與之。此第二竟。

時波比丘。聞佛所說嚴淨國土。皆悉覩見。超發無上殊勝之願。其心寂靜。志無所著。一切世間無能及者。具

足五劫。思惟攝取莊嚴佛國清淨之行。阿難白佛。波佛國土。壽量幾何。佛言。其佛壽命四十二劫。時法藏比丘。攝取二百一十億諸佛妙土清淨之行。

第三法藏聞說依法修行。於中初別。法藏比丘攝取下結。別中初先見上所說淨土之果。超發已下。修上所說淨土之因。因中初先更發勝願。其心寂下。依願起行。其心寂靜志無所著。世無及者。明修證行。理絕眾相。故無所著。求入名志。

證深離相。故世無及。具五劫下。明修教行。於中初明法藏比丘五劫起行。阿難白下。彰彼如來壽命長久。成前法藏於彼佛所五劫修行。阿難先問。後佛答之。彼佛壽命四十二劫。法藏壽命亦應如是。故彼法藏於一身中在彼佛所五劫修行。



問曰。若彼得壽多劫。劫盡之時。居住何處。而得修行。釋言。餘人見其劫盡。其法藏等。見彼國土安隱不動。故得起修。與法華中。眾生見劫盡。大火所燒時。我此土安隱。天人常充滿。其義相似。上來別竟。法藏比丘攝取下結。一人具修無量土行。未來還得無量種土。隨人異現。上來略竟。

△自下第二廣明所修。於中初先廣前大願。時彼比丘於其佛所諸天魔下。廣前所行。就前廣願中。文別有六。一法藏詣佛所彰已行。二如來遣說。三法藏自宣已所發願。四我建下。說已重復立誓自要。五法藏比丘說此頌下。如要相現。六於是法藏具足修下。總以結歎。

如是修已。詣波佛所。稽首禮足。遶佛三匝。合掌而住。

。白佛言。世尊。我已攝取莊嚴佛土清淨之行。

就初段中。如是修已。結前生後。詣彼佛等。啟白方便。而白佛等。申己所修。我已於前五劫之中。攝取嚴土清淨行矣。

佛告比丘。汝今可說。宜知是時。發起悅可一切大衆。
菩薩聞已。修行此法。緣致滿足無量大願。

第二段中。佛告比丘。汝今可說。正勸宣說。宜知是時。催令速說。發起悅等。明說所為。為益諸眾。故須宣說。發起悅可一切大眾。為益凡夫二乘故說。由彼法藏自說已願。令眾同喜願生其國。名發起悅可一切眾矣。菩薩聞下。為益菩薩。由彼法藏自說已願。令諸菩薩學之同發。故云聞已修行。

此法滿足大願。聞已修行。起願始也。緣致滿等。願心成也。

比丘白佛。唯垂聽察。如我所願當具說之。

第三法藏比丘自宣己願。唯垂聽察。請佛得說。如我所願當具足說。總許宣說。

△下正說之。於中合有四十八願。義要唯三。文別有七。義要三者。一攝法身願。二攝淨土願。三攝眾生願。四十八中。十二。十三。及第十七。是攝法身。第三十一。第三十二。是攝淨土。餘四十三。是攝眾生。文別七者。初十一願。為攝眾生。次有兩願。是其第二。為攝法身。初十一願。為攝眾生。次有兩願。是其第五。為攝眾生。次有兩願。是其第六。為攝淨土。

第三。重攝眾生。次有一願。是其第四。重攝法身。次有十

下有十六。是其第七。重攝眾生。

第一願國無惡道

以下四十八願標目
會刻經疏時增添

設我得佛。國有地獄餓鬼畜生者。不取正覺。

第二願不更惡道

設我得佛。國中天人壽終之後。復更三惡道者。不取正

覺。

第三願身真金色

設我得佛。國中天人不悉真金色者。不取正覺。

第四願形色相同



佛說

無量壽經義疏

設我得佛。國中天人形色不同。有好醜者。不取正覺。

第五願宿命智通

設我得佛。國中天人不識宿命。下至知百千億那由他諸劫事者。不取正覺。

第六願天眼普見

設我得佛。國中天人不得天眼。下至見百千億那由他諸佛國者。不取正覺。

第七願天耳普聞

設我得佛。國中天人不得天耳。下至聞百千億那由他諸

佛所說。不悉受持者。不取正覺。

第八願他心悉知

設我得佛。國中天人不得見他心智。下至知百千億那由他諸佛國中衆生心念者。不取正覺。

第九願神足無礙

設我得佛。國中天人不得神足。於一念頃。下至不能超過百千億那由他諸佛國者。不取正覺。

第十願不貪計身

設我得佛。國中天人若起想念貪計身者。不取正覺。



第十一願住定證滅

設我得佛。國中天人不住定聚必至滅度者。不取正覺。

就初段中。初有兩願。願生無苦。後之九願。願生得樂。無苦中。

初一願其自國無苦。設我得佛。國有地獄餓鬼畜生。

不取正覺。不取正覺者。諸願不滿。終不成佛。假設所願不滿得成。誓終不取。是故說言。設我得佛。國有地獄畜生餓鬼。不取正覺。餘亦如是。言地獄者。地下牢獄。是其苦處。

故云地獄。言餓鬼者。饑渴名餓。恐怯多畏。故名為鬼。言畜生者。此乃從生畜養為名。一切世人或為噉食。或為驅使。

畜養此生。故云畜生。後之一願。願己國中有眾生命終。不向他國受苦。此之兩願。願生無苦。後九願生得樂之中。初

之兩願。願生身樂。後之七願。願生心樂。心中五通各別為一。漏盡分二。故有七願。

第十二願光明無量

設我得佛。光明有能限量。下至不照百千億那由他諸佛國者。不取正覺。

第十三願壽命無量

設我得佛。壽命有能限量。下至百千億那由他劫者。不取正覺。

第二段中。明攝法身。文相易知。

第十四願聲聞無數



設我得佛。國中聲聞有能計量。乃至三千大千世界衆生。

悉成緣覺。於百千劫悉共計校。知其數者。不取正覺。

第十五願隨願脩短

設我得佛。國中天人壽命無能限量。除其本願脩短自在

。若不爾者。不取正覺。

第十六願不聞惡名

設我得佛。國中天人乃至聞有不善名者。不取正覺。

第三段中。明攝眾生。文相易知。

第十七願諸佛稱歎

設我得佛。十方世界無量諸佛不悉咨嗟稱我名者。不取正覺。

第四段中。明攝法身。文相易知。

第十八願十念必生

設我得佛。十方衆生至心信樂欲生我國。乃至十念若不生者。不取正覺。唯除五逆誹謗正法。

第十九願臨終接引

設我得佛。十方衆生發菩提心。修諸功德。至心發願欲生我國。臨壽終時。假令不與大眾圍遶現其人前者。不取正覺。



第二十願欲生果遂

設我得佛。十方衆生聞我名號。繫念我國。植衆德本。
至心迴向欲生我國。不果遂者。不取正覺。

第二十一願三十二相

設我得佛。國中天人不悉成滿三十二大人相者。不取正
覺。

第二十二願一生補處

設我得佛。他方佛土諸菩薩衆來生我國。究竟必至一生
補處。除其本願自在所化。為衆生故。被弘誓鎧。積累
德本。度脫一切。遊諸佛國。修菩薩行。供養十方諸佛。

如來。開化恆沙無量衆生。使立無上正真之道。超出常
倫諸地之行。現前修習普賢之德。若不爾者。不取正
覺。

第二十三願供養諸佛

設我得佛。國中菩薩承佛神力供養諸佛。一食之頃。不
能漏至無量無數億那由他諸佛國者。不取正覺。

第二十四願供具隨意

設我得佛。國中菩薩在諸佛前。現其德本。諸所求欲供
養之具。若不如意者。不取正覺。

第二十五願演說妙智



設我得佛。國中菩薩不能演說一切智者。不取正覺。

第二十六願那羅延身

設我得佛。國中菩薩不得金剛那羅延身者。不取正覺。

第二十七願一切嚴淨

設我得佛。國中天人一切萬物。嚴淨光麗形色殊特。窮微極妙無能稱量。其諸衆生。乃至逮得天眼。有能明了辨其名數者。不取正覺。

第二十八願道樹高顯

設我得佛。國中菩薩乃至少功德者。不能知見其道場樹

無量光色高四百萬里者。不取正覺。

第二十九願誦經得慧

設我得佛。國中菩薩。若受讀經法諷誦持說。而不得辯才智慧者。不取正覺。

第三十願慧辯無限

設我得佛。國中菩薩智慧辯才若可限量者。不取正覺。

第五段中。初三願。攝他國眾生。次一願。攝自國眾生。次一還攝他國眾生。後八還攝自國眾生。

第三十一願照見十方

設我得佛。國土清淨。皆悉照見十方一切無量無數不可思



議諸佛世界。猶如明鏡覩其面像。若不爾者。不取正覺。

第三十二願寶香妙嚴

設我得佛。自地已上至於虛空。宮殿樓觀。池流華樹。國中所有一切萬物。皆以無量雜寶百千種香而共合成。嚴飾奇妙。超諸天人。其香普熏十方世界。菩薩聞者皆修佛行。若不爾者。不取正覺。

第六段中。明攝淨土。文顯可知。

第三十三願蒙光柔軟

設我得佛。十方無量不可思議諸佛世界衆生之類。蒙我光明觸其體者。身心柔軟。超過天人。若不爾者。不取

正覺。

第三十四願聞名得忍

設我得佛。十方無量不可思議諸佛世界衆生之類。聞我名字。不得菩薩無生法忍諸深總持者。不取正覺。

第三十五願脫離女身

設我得佛。十方無量不可思議諸佛世界。其有女人聞我名字。歡喜信樂。發菩提心。厭惡女身。壽終之後復為女像者。不取正覺。

第三十六願常修梵行



設我得佛。十方無量不可思議諸佛世界諸菩薩衆。聞我名字。壽終之後。常修梵行。至成佛道。若不爾者。不取正覺。

第三十七願天人致敬

設我得佛。十方無量不可思議諸佛世界諸天人民。聞我名字。五體投地。稽首作禮。歡喜信樂。修菩薩行。諸天世人莫不致敬。若不爾者。不取正覺。

第三十八願衣服隨念

設我得佛。國中天人欲得衣服。隨念即至。如佛所讚應法妙服。自然在身。若有裁縫染治浣濯者。不取正覺。

第三十九願樂如漏盡

設我得佛。國中天人所受快樂。不如漏盡比丘者。不取正覺。

第四十願樹中現刹

設我得佛。國中菩薩隨意欲見十方無量嚴淨佛土。應時如願。於寶樹中皆悉照見。猶如明鏡覩其面像。若不爾者。不取正覺。

第四十一願諸根無缺

設我得佛。他方國土諸菩薩衆。聞我名字。至於得佛。諸根缺陋不具足者。不取正覺。



第四十二願清淨解脫

設我得佛。他方國土諸菩薩衆。聞我名字。皆悉逮得清淨解脫三昧。住是三昧。一發意頃。供養無量不可思議諸佛世尊。而不失定意。若不爾者。不取正覺。

第四十三願聞名得福

設我得佛。他方國土諸菩薩衆。聞我名字。壽終之後。生尊貴家。若不爾者。不取正覺。

第四十四願修行具德

設我得佛。他方國土諸菩薩衆。聞我名字。歡喜踊躍。修菩薩行。具足德本。若不爾者。不取正覺。

第四十五願普等三昧

設我得佛。他方國土諸菩薩衆。聞我名字。皆悉逮得普等三昧。住是三昧。至於成佛。常見無量不可思議一切如來。若不爾者。不取正覺。

第四十六願隨願聞法

設我得佛。國中菩薩。隨其志願所欲聞法。自然得聞。若不爾者。不取正覺。

第四十七願聞名不退

設我得佛。他方國土諸菩薩衆。聞我名字。不即得至不退轉者。不取正覺。



第四十八願得三法忍

設我得佛。他方國土諸菩薩衆。聞我名字。不即得至第一第二第三法忍。於諸佛法不能即得不退轉者。不取正覺。

第七段中。初五攝取他國眾生。次次次三攝取自國眾生。次五還攝他國眾生。次一還攝自國眾生。後二復攝他國眾生。此第三竟。

佛告阿難。爾時法藏比丘說此願已。以偈頌曰。

自下第四約前所願立誓自要。於中合有十一偈文。前之十偈。立誓自要。後一請證。就前十中。初三自要。後七順求。

我建超世願。必至無上道。斯願不滿足。誓不成等覺。
我於無量劫。不為大施主。普濟諸貧苦。誓不成等覺。
我至成佛道。名聲超十方。究竟靡所聞。誓不成等覺。

前自要中。初偈約佛自德自要。前所發中。求法身願。求淨土願。名超世願。興心名建。得果決定。故云必至無上道矣。

此言順舉。斯願不滿誓不成者。是自要也。後二約就化德自要。於中初偈舉佛法施化益自要。後偈舉佛名聞普周化德自要。靡猶無也。我成佛時名聞十方。有人究竟於我名字無所聞者。不取正覺。

離欲深正念。淨慧修梵行。志求無上尊。為諸天人師。
神力演大光。普照無際土。消除三垢冥。明濟衆厄難。



開波智慧眼。滅此昏盲暗。閉塞諸惡道。通達善趣門。
功祚成滿足。威曜朗十方。日月戢重暉。天光隱不現。
爲衆開法藏。廣施功德寶。常於大衆中。說法師子吼。
供養一切佛。具足衆德本。願慧悉成滿。得爲三界雄。
如佛無礙智。通達靡不照。願我功德力。等此最勝尊。

就順求中。初偈是略。離欲深正念。淨慧修梵行。舉己善因。
下用求果。無上尊。求佛自德。為天人師。求利他德。餘六
偈廣。於中初有五偈半文。廣舉佛德。末後半偈。發願求同。
前舉德中。初有兩偈。舉佛化德。次有一偈。舉佛自德。次
有一偈。復舉化德。後一偈半。重舉自德。就初兩偈化德中。
神力演光。照無際土。身業化也。消除已下。口業化也。消

除三垢。濟眾厄難。小乘法化。教斷三毒。名除三垢。開彼慧眼。滅昏盲闇。大乘法化。閉塞惡道。通善趣門。人天法化。功祚一偈。舉佛自德。功祚成滿。是佛德洪。功果福祚。皆悉成滿。威曜朗等。是佛德用。且舉光用。餘略不論。威曜十方。光之廣也。日月戢輝。天光不現。光之勝也。佛光映蔽。日月攝光。不能外照。名戢重輝。為眾一偈。重舉化德。文顯可知。後一偈半。重明自德。初偈明佛因成得果。供一切佛。具眾德本。福因成也。願慧悉滿。智因成也。為三界雄。明因得果。下有半偈。彰用自在。佛無礙智。達無不照。上來一段。廣舉佛德。願我功慧等此勝等。發願求同。功是福因。慧是智因。願我以此福智之力。等佛如來最勝之尊。上來十偈。立誓自要。



斯願若剋果。大千應感動。虛空諸天神。當雨珍妙華。

斯願一偈。請證要瑞。若定剋果。大千應動。空雨妙華。

佛語阿難。法藏比丘說此頌已。應時普地六種震動天雨妙華以散其上。自然音樂空中讚言。決定必成無上正覺。

第五如要相現。法藏說已。應時地動。應前所要。雨華散上。

應後所要。自然已下。出聲記歎。

於是法藏比丘。具足修滿如是大願。誠諦不虛。超出世間。深樂寂滅。

第六總以結歎。初先結之。超出下歎。上來明願。

△下次明行。於中有二。一明修具。二隨生下。明報殊勝。前中復二。一修淨土行。二從不生欲覺已下。修法身行。

阿難。法藏比丘於其佛所。諸天魔梵龍神八部大衆之中。發斯弘誓。建此願已。一向專志莊嚴妙土。所修佛國。開廓廣大。超勝獨妙。建立當然。無衰無變。於不可思議兆載永劫。積植菩薩無量德行。

修土行中。時彼比丘。於其佛所大眾之中。發斯弘誓。建此願已。牒前起後。牒前願心。起於後行。龍神夜叉乾闥婆等。是其八部。發斯弘誓。牒前所發四十八願而起於後。建此願已。牒前我建超世願等而起於後。下明起行。一向專志莊嚴妙土。總明起行。所修佛下。別明起行。別中先舉淨土之果。



佛說

無量壽經義疏

於不可下。對之修因。前舉果中。所修佛國恢廓廣大。明土廣也。超勝獨妙。明土勝也。建立當然無衰無變。明土常也。修因可知。

△法身行中。初別。後總。別中有四。一離煩惱。二勇猛下。明修善法。三遠離下。明離惡業。四棄國下。重明修善。

不生欲覺。瞋覺。害覺。不起欲想。瞋想。害想。不著色聲香味觸法。忍力成就。不計衆苦。少欲知足。無染恚癡。三昧常寂。智慧無礙。無有虛偽詔曲之心。和顏愛語。先意承問。

離煩惱中。初就自行明離煩惱。無有虛下。就利他行明離煩惱。前自行中。文曲有四。第一明離煩惱因緣。二忍力下。

明修對治。三無染下。離煩惱體。四三昧下。復明修治。就初段中。先離惑因。不著色等。明離惑緣。前離因中。不生欲覺瞋覺害覺。正明所離。覺有八種。如地持說。一是欲覺。思財思色。二是瞋覺。亦名恚覺。思欲瞋他。三者害覺。亦名惱覺。於他人所念欲加害。四者親覺。追憶親緣。五國土覺。念世安危。六不死覺。謂身不死。廣集資生。七族姓覺。念氏族高下。八輕誣覺。念陵他人。此八種中。初三過重。為是偏舉。不起欲想瞋想害想。重復顯之。不起欲想。名離欲覺。不起瞋想。名離瞋覺。不起害想。名離害覺。亦可前言不生三覺。就始彰離。不起欲想瞋想害想。據終明離。未對境界。預起邪思。名之為覺。對緣生心。說為三想。此皆離之。下離惑緣。不著色聲香味觸等。此初段竟。次明修治。

忍力成就。不計眾苦。能忍違緣。故離三覺不起三想。少欲知足。能忍順緣。故離色聲香味觸等。此兩段竟。次離惑體。無染恚癡。染猶貪也。此三段竟。下復修治。三昧常寂。止行深也。智慧無礙。觀行勝也。上來四段。合為自利。下就利他明離煩惱。無有虛偽詭曲之心。明離心過。言和顏者。明離身過。愛語先問。明離口過。由無煩惱。故身口意中不起過矣。上來第一明離煩惱。

勇猛精進。志願無倦。專求清白之法。以惠利群生。恭敬三寶。奉事師長。以大莊嚴具足衆行。令諸衆生功德成就。住空無相無願之法。無作無起。觀法如化。

第二明其修善。於中有三。一起願心。二恭敬下。依願起行。

三住空下。行成入證。初起願中。勇猛精進志願無倦。求清白法。自利願也。惠利群生。利他願也。第二行中。先明自利。後明利他。前自利中。恭敬三寶奉事師長。攝行方便。恭敬三寶。攝福方便。奉事師長。攝智方便。以大嚴等。彰行成就。以大嚴者。謂以福智二種莊嚴而自嚴也。具眾行者。隨別以分。謂具檀等一切行也。下明利他。以行教他。故令眾生功德成就。第三證中。住空無相無願之法。無作無起。證法非有。人法無性。名之為空。假人假法。相亦不有。名為無相。於此二中。無有希求願樂之心。名為無願。又離妄想。亦名無願。於此三中。無果可為。名為無作。故維摩云。雖行無作而現受身。故知無作約果以論。於前三中。無因可生。名為無起。故維摩云。雖行無起而起善行。故知無起約

因以說。然諸經中說理不定。或說一空。如大品中所說獨空。

辨一不多。故名為獨。或說二種。謂二無我。或說三種。空無相無願。或說四種。如維摩說。謂空無作無相無起。又大品說。有法空。無法空。自法空。化法空。亦是四種。別章廣釋。或說五種。如此中說。空無相無願無作無起。備如向釋。或說七空。如大品說。或說九空。如毗曇說。或說十一。如涅槃說。或說十四。如大品說。或說十八。如大品說。或說二十五空。如涅槃說。廣則無量。今據一門。且說五種。於此理法證會。名為觀法如化。證法非無。此第二竟。

遠離麤言。自害害波。波此俱害。修習善語。自利利人。
○人我兼利。

第三明離惡業。於中初先明其離過。修習善下。彰其攝治。
前離過中。遠離麤言。明離口惡。遠離自害害他俱害。明離
身惡。下攝治中。修習善語。治前口惡。自利利人。人我俱
利。治前身惡。此第三竟。

棄國捐王。絕去財色。自行六波羅密。教人令行。

第四重明修善。於中初先明其自利。棄國捐王。絕去財色。
明其所捨。自行六度。彰其所修。下明利他。以前六度教人
令行。上來四段。別明身因。

無央數劫積功累德。

總以結之。上來第一明修具。



隨其生處。在意所欲。無量寶藏。自然發應。教化安立。無數衆生。住於無上正真之道。或為長者居士豪姓尊貴。或為刹利國君轉輪聖帝。或為六欲天主乃至梵王。常以四事供養恭敬一切諸佛。如是功德不可稱說。口氣香潔。如優鉢羅華。身諸毛孔出栴檀香。其香普熏無量世界。容色端正。相好殊妙。其手常出無盡之寶。衣服飲食。珍妙華香。繒蓋幢幡。莊嚴之具。如是等事。超諸天人。於一切法而得自在。

第二彰報殊勝。於中有二。一對上所修淨土之因。明得報勝。即勝依果。二或為長者居士已下。對上所修法身之因。明得

報勝。得勝正果。前中初言隨其生處在意所欲。無量寶藏自然發應明得勝財。在猶任也。教化安立住於正道。以財攝他令歸正法。後中初明功德之果。次於一切法而得自在。明智慧果。功德果中。先別。後結。別中有四。一身報尊上。二常以四事供養已下。依身起行。三口氣下。身報微妙。於中三句。文相可知。四手出下。依身起用。手出供具供養諸佛。上來別竟。如是之等超諸天人。總以結歎。慧果可知。上明所行。

佛說無量壽經義疏卷三



佛說無量壽經義疏卷四

曹魏天竺三藏康僧鎧譯經

隋京師淨影寺沙門慧遠撰疏

△自下第二明其所成。謂成法身淨土之果。然此所成。遂前四

十八之大願。應別對之。文顯可知。文中又有二。一略明所成。

二佛告阿難無量壽佛威神已下。廣明所成。

阿難白佛。法藏菩薩。為已成佛而取滅度。為未成佛。
為今現在。佛告阿難。法藏菩薩。今已成佛。現在西方。
。去此十萬億刹。其佛世界。名曰安樂。阿難又問。其
佛成道已來。為經幾時。佛言。成佛已來。凡歷十劫。

其佛國土。自然七寶。金銀琉璃珊瑚琥珀硃磧瑪瑙。合
成為地。恢廓曠蕩。不可限極。悉相雜廁。轉相間入。
光赫煜爍。微妙奇麗。清淨莊嚴。超踰十方一切世界衆
寶中精。其實猶如第六天寶。又其國土無湏彌山。及金
剛圍一切諸山。亦無大海小海溪渠井谷。佛神力故欲見
則見。亦無地獄餓鬼畜生諸難之趣。亦無四時。春秋冬
夏。不寒不熱。常和調適。爾時阿難白佛言。世尊。若
波國土無湏彌山。其四天王及忉利天依何而住。佛語阿
難。第三炎天乃至色究竟天皆依何而住。阿難白佛。行業
果報不可思議。佛語阿難。行業果報不可思議。諸佛世
界亦不可思議。其諸衆生功德善力。住行業之地。故能



爾耳。阿難白佛。我不疑此法。但為將來衆生。欲除其疑惑。故問斯義。

略中有四。第一阿難就身為問成佛已未。如來具答。二其佛界下。約之明土。三又問下。阿難重復就身為問成來久近。如來具答。四其國自然七寶已下。約之明土。就初段中。阿

難先問法藏比丘。為已成佛。為未為現。此約三世時別以問。

佛答可知。第二段中。直列彼佛國土名號。未辨其相。第三段中。先問後答。文顯可知。第四段中。先明所有。又其國土無須彌下。彰其所無。明所有中。自然寶成。明其體相。恢廓曠蕩。明其量相。悉相雜等。明莊嚴相。明所無中。初先正辨。阿難白下。問答重顯。前正辨中。初無山等。次無

四趣。後無四時春秋等別。後重顯中。文別有三。初阿難問。

若無須彌。四天王等依何而住。如來反質。二阿難正答。如來約之以顯彼事。三阿難彰已為他故問。非自不知。上來略竟。

△就下廣中。文別有四。一明佛身。二即約身明其徒眾。三明國土。四即約土明其人民。

佛告阿難。無量壽佛威神光明最尊第一。諸佛光明所不能及。或照百佛世界。或千佛世界。取要言之。乃照東方恆沙佛刹。南西北方四維上下亦復如是。或有佛光照於七尺。或一由旬。二三四五由旬。如是轉倍。乃至照一佛刹。是故無量壽佛。號無量光佛。無邊光佛。無礙光佛。無對光佛。炎王光佛。清淨光佛。歡喜光佛。智



慧光佛。不斷光佛。難思光佛。無稱光佛。超日月光佛。
。其有衆生遇斯光者。三垢消滅。身意柔軟。歡喜踴躍。
。善心生焉。若在三塗極苦之處。見此光明。皆得休息。
。無復苦惱。壽終之後。皆蒙解脫。無量壽佛光明顯赫。
。照曜十方。諸佛國土。莫不聞知。不但我今稱其光明。
。一切諸佛聲聞緣覺諸菩薩衆。咸共歎譽。亦復如是。
若有衆生。聞其光明威神功德。日夜稱說。至心不斷。
隨意所願。得生其國。為諸菩薩聲聞大衆所共歎譽。稱
其功德。至其最後得佛道時。普為十方諸佛菩薩歎其光
明。亦如今也。佛言。我說無量壽佛光明威神巍巍殊妙。
。晝夜一劫。尚不能盡。佛語阿難。無量壽佛壽命長久。

不可稱計。汝寧知乎。假使十方世界無量衆生。皆得人身。悉令成就聲聞緣覺。都共集會。禪思一心。竭其智力。於百千萬劫。悉共推算。計其壽命長遠劫數。不能窮盡知其限極。

就初段中。應先解釋三佛之義。然後釋文。義如別章。文中初先明佛光相。後顯壽命。前明光中。奇歎以顯。先別。後結。別中有四。一釋迦自歎。二其有眾生遇斯光下。明諸眾生見聞利益。三無量壽光顯赫已下。諸聖共歎。四若有眾生聞其光下。重明眾生見聞獲益。初中有三。一辨勝過劣。無量壽佛光明第一。二諸佛光明所不及下。舉劣顯勝。佛光實等。隨化故爾。三是故下。廣歎顯勝。有十二句。初無量光。



無邊。無礙。此之三種。當相以歎。無量。多也。無邊。廣也。無礙自在也。無對。炎王。此之兩種。寄對顯勝。他光不敵。名無對光。此光勝餘。名炎王光。清淨。歡喜智慧。不斷。此之四種。當相以歎。離垢稱淨。能令見者心悅。名喜。於法善照。名智慧光。常照不絕。名不斷光。難思。無稱。超日月光。此之三種。寄對顯勝。過世心想。故曰難思。過世言相。名無稱光。過世色相。名超日月。上來第一釋迦自歎。自下第二見聞獲益。初有遇者三垢消滅。明除障益。此名三毒為三垢耳。身意輕等。明生善益。若在三下。明滅苦益。壽終後下。明得樂益。第三共歎。文顯可知。第四重明獲益之中。初明稱說隨意往生。次為諸聖咸共歎譽。後明得佛一切共歎。上來別歎。佛言我說無量壽佛光明已下。總

以結歎。上來明光。下明佛壽。文顯可知。上來第一明其佛身。

聲聞菩薩。天人之衆。壽命長短亦復如是。非算數譬喻所能知也。又聲聞菩薩。其數難量。不可稱說。神智洞達。威力自在。能於掌中持一切世界。佛語阿難。波佛初會。聲聞衆數不可稱計。菩薩亦然。如大目犍連百千萬億無量無數。於阿僧祇那由他劫。乃至滅度。悉共計校。不能究了多少之數。譬如大海深廣無量。假使有人析其一毛以為百分。以一分毛沾取一滴。於意云何。其所滯者。於波大海。何所為多。阿難白佛。波所滯水。比於大海多少之量。非巧歷算數言辭譬類所能知也。佛



語阿難。如目連等。於百千萬億那由他劫。計波初會聲聞菩薩。所知數者。猶如一滴。其所不知。如大海水。

第二約身明眾。於中有四。一明其土人壽長遠。如無量壽。二又聲聞下。明其眾多。三神智洞下。彰其德勝。四重顯眾多。且就初會顯其多相。餘不可論。初會聲聞不可稱計。菩薩亦然。當不辨多相。就目連不知以顯。於中初明目連不知。

如大海下。借事顯之。佛先立喻反問阿難。次阿難答。下佛約之。彰顯目連所知多少。

△自下第三明其國土。是中應先解淨土義。然後釋文。義如別章。文中汎論。有三莊嚴。一事莊嚴。色香味等五欲精上。二法莊嚴。純論妙法。三人莊嚴。勝善眾生居住其中。今此

所明國土勝中。有事莊嚴及法莊嚴。下第四段人民殊勝。是人莊嚴。然彼土中莊嚴妙事。不可具辨。今此文中略舉四事。

一明寶樹。二明伎樂。三明講堂宮殿等事。四明寶池。

又其國土。七寶諸樹。周滿世界。金樹。銀樹。瑠璃樹。玻瓈樹。珊瑚樹。瑪瑙樹。碑礎之樹。或有二寶三寶。乃至七寶。轉共合成。或有金樹。銀葉華果。或有銀樹。金葉華果。或瑠璃樹。玻瓈為葉。華果亦然。或水精樹。琉璃為葉。華果亦然。或珊瑚樹。瑪瑙為葉。華果亦然。或瑪瑙樹。瑠璃為葉。華果亦然。或碑礎樹。衆寶為葉。華果亦然。或有寶樹。紫金為本。白銀為莖。瑠璃為枝。水精為條。珊瑚為葉。瑪瑙為華。碑礎為



佛說

無量壽經義疏

實。或有寶樹。白銀為本。瑠璃為莖。水精為枝。珊瑚
為條。瑪瑙為葉。碑碣為華。紫金為實。或有寶樹。瑠
璃為本。水精為莖。珊瑚為枝。瑪瑙為條。碑碣為葉。
紫金為華。白銀為實。或有寶樹。水精為本。珊瑚為莖。
瑪瑙為枝。碑碣為條。紫金為葉。白銀為華。瑠璃為實
。或有寶樹。珊瑚為本。瑪瑙為莖。碑碣為枝。紫金為
條。白銀為葉。珊瑚為本。水精為實。或有寶樹。瑪瑙
為本。碑碣為莖。紫金為枝。白銀為條。瑠璃為葉。水
精為華。珊瑚為實。或有寶樹。碑碣為本。紫金為莖。
白銀為枝。珊瑚為條。水精為葉。珊瑚為華。瑪瑙為實
。行行相值。莖莖相望。枝枝相準。葉葉相向。華華相

順。實實相當。榮色光曜。不可勝視。清風時發。出五音聲。微妙宮商。自然相和。又無量壽佛。其道場樹高四百萬里。其本周圍五千由旬。枝葉四布二十萬里。一切衆寶自然合成。以月光摩尼持海輪寶。衆寶之王而莊嚴之。周匝條間垂寶瓔珞。百千萬色種種異變。無量光炎照曜無極。珍妙寶網羅覆其上。一切莊嚴隨應而現。微風涂動。出妙法音。普流十方一切佛國。其聞音者。得深法忍。住不退轉。至成佛道。不遭苦患。目覩其色。耳聞其音。鼻知其香。舌嘗其味。身觸其光。心以法緣。一切皆得甚深法忍。住不退轉。至成佛道。六根清澈。無諸惱患。阿難。若波國土天人。見此樹者得三法。



忍。一者音響忍。二者柔順忍。三者無生法忍。此皆無量壽佛威神力故。本願力故。滿足願故。明了願故。堅固願故。究竟願故。佛告阿難。世間帝王。有百千音樂。自轉輪聖王。乃至第六天上。妓樂音聲。展轉相勝。千億萬倍。第六天上萬種樂音。不如無量壽國諸七寶樹一種音聲千億倍也。

樹中初先汎明諸樹。第二別明道場之樹。三總就之校量顯勝。前汎明中。先列其樹。後明出聲。就列樹中。其國寶樹周滿世界。總以標舉。金銀樹等。明純寶樹。或二寶下。明雜寶樹。所出聲中出五音者。所謂宮商角徵羽等五種音也。第二所明道場樹中。先明樹相。次明出聲。下明眾生見聞獲益。

前明樹中。先明量相。一切眾寶自然合成。明其體相。以月光等。明莊嚴相。出聲可知。就明見聞獲益之中。初明六根見聞覺知悉得利益。下明得忍差別不同。彼國天人皆得三忍。總以標舉。慧心安法。名之為忍。忍隨淺深差別為三。次列三名。尋聲悟解。知聲如響。名音響忍。三地已還。捨詮趣實。名柔順忍。四五六地。證實離相。名無生忍。七地已上。下明眾生得忍所由。皆無量壽威神力者。由彼如來現在威力。故獲三忍。本願力等。由其過去本願之力。故獲三忍。本願是總。餘四是別。滿足願者。願心圓備。明了願者。求心顯著。堅固願者。緣不能壞。究竟願者。終成不退。以此願故。生彼國者悉得三忍。前明諸樹。次別明其道場之樹。下通就之格量顯勝。偏顯樹中音聲勝矣。文顯可知。上來明樹。



亦有自然萬種妓樂。又其樂聲。無非法音。清暢哀亮。
微妙和雅。十方世界音聲之中。最為第一。

第二明其伎樂。亦有自然萬種伎樂。總以標舉。又其樂聲無
非法等。顯其聲妙。十方界等。彰其聲勝。勝十方界一切音聲。

其講堂精舍宮殿樓觀。皆七寶莊嚴自然化成。復以真珠
明月摩尼衆寶以為交絡。覆蓋其上。

第三明其講堂宮殿等事。講堂精舍宮殿樓觀皆七寶成。明其
體相。復真珠等。明莊嚴相。

內外左右有諸浴池。或十由旬。或二十三十。乃至百千

由旬。縱廣深淺。皆各一等。八功德水湛然盈滿。清淨
香潔。味如甘露。黃金池者。底白銀沙。白銀池者。底
黃金沙。水精池者。底琉璃沙。琉璃池者。底水精沙。
珊瑚池者。底琥珀沙。琥珀池者。底珊瑚沙。碑礫池者
。底瑪瑙沙。瑪瑙池者。底碑礫沙。白玉池者。底紫金
沙。紫金池者。底白玉沙。或有二寶三寶。乃至七寶。
轉共合成。其池岸上有栴檀樹。華葉垂布。香氣普熏。
天優鉢羅華。鉢曇摩華。拘物頭華。分陀利華。雜色光
茂。彌覆水上。波諸菩薩及聲聞衆。若入寶池。意欲令
水沒足。水即沒足。欲令至膝。即至於膝。欲令至腰。
水即至腰。欲令至頸。水即至頸。欲令灌身。自然灌身



佛說無量壽經義疏

。欲令還復。水輒還復。調和冷暖。自然隨意。開神悅體。蕩除心垢。清明澄潔。淨若無形。寶沙映澈。無深不照。微瀾迴流。轉相灌注。安詳流逝。不遲不疾。波揚無量自然妙聲。隨其所應。莫不聞者。或聞佛聲。或聞法聲。或聞僧聲。或寂靜聲。空無我聲。大慈悲聲。波羅密聲。或十力無畏不共法聲。諸通慧聲。無所作聲。不起滅聲。無生忍聲。乃至甘露灌頂衆妙法聲。如是等聲。稱其所聞。歡喜無量。隨順清淨離欲寂滅真實之義。隨順三寶力無所畏不共之法。隨順通慧菩薩聲聞所行之道。無有三塗苦難之名。但有自然快樂之音。是故其國名曰極樂。

第四明其池相。於中初先辨其池相。後明出聲。辨池相中。
文曲有四。一明量相。彼國諸池。或十由旬。二十三十。乃至縱廣百千由旬。二明水相。具八功德。清淨。不臭。輕。
冷。軟。美。飲時調適。飲已無患。是其八也。清淨。色入。
不臭。香入。輕。冷。及軟。此三觸入。美。是味入。飲時
調適。飲已無患。此二法入。此八是其水家功能。故名為功。
水家之德。故名為德。文中初言八功德水湛然盈滿。總以標
舉。言清淨者。八中淨也。言香潔者。八中香也。味如甘露。
八中美也。三黃金下。明諸寶等莊嚴之相。四彼菩薩聲聞入
下。彰其資用無礙之相。於中五句。一淺深無礙。二冷軟得
中。三釋神除垢。四淨無瑕穢。五迴流相注遲疾得所。上來
明池。下明出聲。於中有四。初演無量自然妙聲。正明出聲。



二隨所應下。善應物聞。於中初總。次別。後結。三隨順清淨離欲已下。明能起善。隨順清淨離欲寂滅真實之義。順涅槃也。隨順三寶力無畏等。順菩提也。此前順果。隨順通慧菩薩聲聞所行之道。隨順其因。四無三途下。明能生樂。無三途等。明無苦也。但有自等。明有樂也。是故已下。結歎顯勝。上來四段。合為第三明其國土。

△自下第四辨其人民。於中有四。一明他方新往生者正報微妙。二所處宮下。依報殊勝。三其諸聲聞菩薩已下。明舊住者正報微妙。四其諸天人衣服以下。依報殊勝。

阿難。波佛國土諸注生者。具足如是清淨色身。諸妙音聲。神通功德。

初中具足清淨色身。明身勝也。諸妙音聲。明口勝也。神通功德。明意勝也。

所處宮殿。衣服飲食。衆妙華香。莊嚴之具。猶第六天自然之物。若欲食時。七寶應器自然在前。金銀瑠璃磚礫瑪瑙珊瑚琥珀明月真珠如是諸鉢。隨意而至。百味飲食。自然盈滿。雖有此食實無食者。但見色聞香。意以爲食。自然飽足。身心柔軟。無所味著。事已化去。時至復現。波佛國土清淨安隱微妙快樂。次於無爲泥洹之道。

第二段中。所處宮殿衣服等事。猶第六天。資具勝也。若欲



食等。資用勝也。且就食論。彼佛國土清淨安等。總歎顯勝。

次於無為泥洹之道。泥洹。涅槃。本是一名。傳之音異。

其諸聲聞菩薩天人。智慧高明。神通洞達。咸同一類。
形無異狀。但因順餘方。故有天人之名。顏貌端正。超
世希有。容色微妙。非天非人。皆受自然虛無之身。無
極之體。佛告阿難。譬如世間貧窮乞人在帝王邊。形貌
容狀寧可類乎。阿難白佛。假令此人在帝王邊。羸陋醜
惡無以為喻。百千萬億不可計倍。所以然者。貧窮乞人
。底極廝下。衣不蔽形。食趣支命。飢寒困苦。人理殆
盡。皆坐前世不植德本。積財不施。富有益慳。但欲唐
得。貪求無厭。不信修善。犯惡山積。如是壽終。財寶

消散。苦身積聚。為之憂惱。於己無益。徒為他有。無
善可怙。無德可恃。是故死墮惡趣。受此長苦。罪畢得
出。生為下賤。愚鄙斯極。示同人類。所以世間帝王人
中獨尊。皆由宿世積德所致。慈惠博施。仁愛兼濟。履
信修善。無所違諍。是以壽終福應。得升善道。上生天
上享茲福樂。積善餘慶。今得為人。乃生王家。自然尊
貴。儀容端正。衆所敬事。妙衣珍饈。隨心服御。宿福
所追。故能致此。佛告阿難。汝言是也。計如帝王。雖
人中尊貴。形色端正。比之轉輪聖王。甚為鄙陋。猶波
乞人在帝王邊也。轉輪聖王。威相殊妙。天下第一。比
之物利天王。又復醜惡。不得相喻。萬億倍也。假令天



佛說

無量壽經義疏

帝比第六天王。百千億倍不相類也。設第六天王。比無量壽佛國菩薩聲聞。光顏容色不相及逮。百千萬億不可計倍。

第三舊住眾生勝中。其諸聲聞菩薩天人。智慧高明。神通洞達。明其德勝。咸同一下。彰其身勝。於中初言咸同一類無有異狀。但順餘方故有天人名。明身齊等。顏貌端正。明身殊勝。顏貌端正超世希有。當相辨勝。佛告已下。校量顯勝。

校中有五。一將貧人比粟散王。二將粟散王比轉輪王。三將輪王比忉利王。四將忉利王比他化王。五將他化自在天王。比無量壽一切天人。畢竟不及。初校量中。文曲有三。一佛將貧人對粟散王。反問阿難。二阿難正答。假令此人在帝王。

邊。無以為喻。百千萬億不可計倍。正明貧人不及帝王。所
以然者下。明彼貧人不及所由。由其先世無善故爾。文顯可
知。所以世間帝王已下。釋彼帝王勝過所以。以其宿世修善
故爾。文亦可知。三如來述可。餘四校量。文顯易解。

佛告阿難。無量壽國。其諸天人。衣服飲食。華香瓔珞。
繒蓋幢幡。微妙音聲。所居舍宅宮殿樓閣。稱其形色
高下大小。或一寶二寶。乃至無量衆寶。隨意所欲。應
念即至。又以衆寶妙衣。遍布其地。一切天人踐之而行
。無量寶網彌覆佛土。皆以金縷真珠。百千雜寶。奇妙
珍異。莊嚴校飾。周匝四面。垂以寶鈴。光色晃曜。盡
極嚴麗。自然德風。徐起微動。其風調和。不寒不暑。



溫涼柔軟。不遲不疾。吹諸羅網及衆寶樹。演發無量微妙法音。流布萬種溫雅德香。其有聞者。塵勞垢習。自然不起。風觸其身。皆得快樂。譬如比丘。得滅盡三昧。又風吹散華。遍滿佛土。隨色次第而不雜亂。柔軟光澤。馨香芬烈。足履其上。陷下四寸。隨舉足已還復如故。華用已訖。地輒開裂。以次化沒。清淨無遺。隨其時節。風吹散華。如是六反。又衆寶蓮華。周滿世界。一一寶華。百千億葉。其華光明。無量種色。青色青光。白色白光。玄黃朱紫。光色赫然。煥爍煥爛。明曜日月。一一華中。出三十六百千億光。一一光中。出三百六十千億佛。身色紫金。相好殊特。一一諸佛。又放百

千光明。普為十方說微妙法。如是諸佛。各各安立無量衆生於佛正道。

第四重明依報勝中。初明其國一切衣服飲食等事與身相稱。或一寶下。就別顯勝。於中有五。一明諸寶隨心現前。二寶衣布地。三寶網羅覆。四自然下。德風吹鼓。五又眾下。寶華充滿。第四風中。自然德風徐起微動。總以標舉。下別顯之。別中有四。一風體調和遲疾得所。二吹網動樹發微妙聲。三觸身生樂。四吹散眾華遍滿其國。第五華中。句別有四。一明寶華周遍世界。二明諸華各具多葉。三明諸華各出多光。四一一華中出三十下。明諸華中各出多佛。於中復四。第一明前一一華中各出多光。出三十六百千億光。第二明前一一



佛說無量壽經義疏

華中各出多佛。出三十六百千億佛。第三明前一一諸佛各放多光。第四明前一一諸佛普為十方說微妙法。於中初先明其所說。如是諸佛各各已下。彰說利益。

△自下第三明其所攝。攝取十方有緣眾生同往彼國。以法化益。然下所攝。遂上所發四十八願。一一別對。相顯可知。文中
有四。一攝下人同生彼國。二無量壽佛威德無極下。攝取上
人同往彼國。三彼國菩薩皆當究竟一生已下。重攝下人同生
彼國。四彌勒白佛於此世界幾許菩薩生彼已下。重攝上人同
生彼國。第一第三有何差別。前初段中具辨生業教修往生。
第三段中舉得舉失勸人往生。義有此別。故須分別。第二第
四有何差別。前第二中攝人同往。第四段中攝人同生。有斯
不同。故須別說。攝取下人。正明所答。攝取上人。顯彼土

勝。增人慕求。

△初中有三。一彰生彼住正定聚。令人慕求。二十方佛皆共讚下。舉聞名者。皆得往生。增人去心。三佛告阿難下。正辨生業。教修往生。

佛告阿難。其有衆生生波國者。皆悉住於正定之聚。所以者何。波佛國中。無諸邪聚。及不定聚。

初中其有生彼國者皆住正定。正明所成。人有三聚。一者邪定。二者正定。三者不定。小乘法中論說不同。若依毗曇。外凡常沒。名為邪定。五停心觀。總別念處。輒頂二心。名為不定。此等有退。故名不定。忍心已上。堅固不退。名為正定。若依成實。外凡常沒。名為邪定。聞思二慧。行有退



轉。說為不定。五停心觀。名為聞慧。總別念處。名為思慧。軟頂已上。說名修慧。現見法空。永不退轉。悉為正定。大乘法中。善趣已前。名為邪定。善趣位中。數進數退。說為不定。習種已去。位分不退。說為正定。莫問大乘小乘眾生。生彼國者皆住正定。所以下。釋彼無邪定及不定聚。故皆正定。

十方恆沙諸佛如來。皆共讚歎無量壽佛威神功德不可思議。諸有衆生聞其名號。信心歡喜。乃至一念至心迴向。願生彼國。即得往生。住不退轉。唯除五逆誹謗正法。

第二段中。初明十方恒沙諸佛。皆共讚歎無量壽佛。次明眾生聞名信心回向發願皆得往生。下彰分者。唯除五逆誹謗正

法。餘皆得生。言五逆者。殺父。殺母。殺阿羅漢。破和合僧。出佛身血。此是其五也。此五皆恩。及違福田。故名為逆。前二皆恩。後之三種。違於福田。立邪毀正。名為謗法。此等障重。所以除之。問曰。於彼觀經之中。說五逆等皆得往生。今此經中言不得生。此言何論。釋有兩義。一約人分別。人有二種。一者久發大乘心人。遇緣造逆。如闍王等。此雖造逆。必有重悔。發心求出。能滅重罪。為是得生。觀經據此。二者先來不發大心。現造逆罪。多無重悔。不能決定發菩提心。為是不生。此經據此。二約行分別。行有定散。有人雖復造作逆罪。能修十六正觀善根。深觀佛德。除滅重罪。則得往生。觀經據此。若人造逆。不能修習觀佛三昧。雖作餘善。不能滅罪。故不往生。此經據此。



佛告阿難。十方世界諸天人民。其有至心願生波國。凡有三輩。

第三正辨生業。教修往生。於中初言十方世界諸天人民願生彼國。凡有三輩。總以標舉。如觀經中。麤分為三。細分為九。麤分三者。謂上中下。大乘人中。習種已上。名為上品。小乘人中。外凡持戒。乃至那含。以為中品。大乘人中。外凡善趣。名為下品。細分九者。前上品中。細分為三。所謂上上。上中。上下。四地已上。名為上上。生彼國即得無生忍故。初二三地。名為上中。生彼國已。過一小劫得無生忍。彼國日長。故一小劫得無生忍。若於此界。經無量劫方得無生忍。種性解行。名為上下。生彼國已。過三小劫得百法明門。住

於初地。故知地前。亦以彼國時日長遠。故經三小劫得到初

地。若於此界。經無量劫。

此處判位太高。與攝下人之意不符。考觀經上品文內。亦是大心凡夫乘願往生。應依圓教。十信滿心。生上上品。到時即入初住。如華嚴

經一證一切證。所謂初發心時便成正覺。方合此經微妙之旨。疏主依漸教判作地上生品。恐致後人生疑。以為凡夫無分。故略辨之。中品之人。亦分為三。所謂

中上。中中。中下。見道已上。名為中上。生彼即得羅漢果故。內凡之人。名為中中。生彼即得須陀洹故。轉等四心。

名為內凡。外凡持戒。名為中下。生彼國已。經一小劫得羅漢故。下品人中。亦分為三。所謂下上。下中。下下。彼約作罪輕重以分。不隨位分。彼中九品。今合為三。上品三人。合為上輩。中品三人。合為中輩。下品三人。合為下輩。然此三輩。人位雖殊。至欲往生。齊須發心求大菩提。專念彼佛。迴向發願。方得往生。故此論之間曰。天親作往生偈。

女人根缺及二乘種。皆不得生。觀經宣說小乘眾生亦得往生。



佛說

無量壽經義疏

其義云何。釋言。彼說女人根缺不得生者。就彼國中受報時說。彼無女人及根缺故。言二乘種不得生者。就此國中往去時說。小乘眾生先雖習得。臨欲去時。要發大心方得往生。

若用小心求生彼國無得去理。為是天親言二乘種不得往生。問曰。若言去用大心。何故至彼證入小果。釋言。由其本習小乘多故。本在此處多學觀察苦無常等。至彼聞說苦無常等。即便悟解故證小果。以本垂終發大乘心求生彼故。在彼國中得羅漢已。即便求大。上來總舉。下別顯之。

其上輩者。捨家棄欲而作沙門。發菩提心。一向專念無量壽佛。修諸功德。願生波國。此等衆生臨壽終時。無量壽佛與諸大衆現其人前。即隨波佛往生其國。便於七

寶華中自然化生。住不退轉。智慧勇猛。神通自在。是故阿難。其有衆生欲於今世見無量壽佛。應發無上菩提之心。修行功德。願生波國。

就上輩中。初舉。次辨。後總結歎。辨中有三。第一明其所修行因。二此等下同成往生。三住不退下。生彼得益。初修因中。句別有五。一捨俗出家。二發菩提心。三一向專心念無量壽佛。四修諸功德。五用前諸善願生彼國。就往生中。初彼迎此。即隨已下。此往生彼。就得益中。住不退轉。位分堅固。智慧勇等。成德殊勝。前舉次辨。是故已下。結歎修習。

佛告阿難。其中輩者。十方世界諸天人民。其有至心願



生波國。雖不能行作沙門。大修功德。當發無上菩提之心。一向專念無量壽佛多少修善。奉持齋戒。起立塔像。飯食沙門。懸縉然燈。散華燒香。以此迴向。願生波國。其人臨終。無量壽佛化現其身。光明相好具如真佛。與諸大眾現其人前。即隨化佛往生其國。住不退轉。功德智慧。次如上輩者也。

就中輩中。初舉。後辨。辨中還初明其行因。次明往生。後彰得益。前明因中。十方天人其有至心願生彼國。總以標舉。雖不能行作沙門等。簡異上輩。依彼觀經。此小乘人。是故不能大修功德。當發已下。正辨其因。於中四句。一發菩提心。二專心念彼無量壽佛。三少修福善。四迴向願生。此人

雖復先學小乘。正欲往生。必須修習如此四行。方得往生。
就往生中。初彼迎此。後此生彼。得益可知。

佛告阿難。其下輩者。十方世界諸天人民。其有至心欲
生波國。假使不能作諸功德。當發無上菩提之心。一向
專意。乃至十念。念無量壽佛。願生其國。若聞深法。
歡喜信樂。不生疑惑。乃至一念念於波佛。以至誠心願
生其國。此人臨終。夢見波佛。亦得注生。功德智慧。
次如中輩者也。

就下輩中。初舉。後辨。辨中還初明其行因。次明往生。後
彰得益。前明因中。十方天人其有至心欲生彼國。總以標舉。



假使不能作諸功德。簡異中輩。如觀經中。舉罪以別。今此略無。當發已下。正辨其因。於中四句。一發菩提心。二專心念彼無量壽佛。乃至十念願生其國。三聞深法。歡喜信樂。不生疑惑。四至誠心。乃至一念念於彼佛。願生彼國。就往生中。明於夢中夢見彼佛。亦得往生。得益可知。上來第一明攝下人。

△自下第二明攝上人同往彼國。舉此為顯彌陀國勝。增前下人求生心矣。於中初先長行略辨。後偈廣論。

佛告阿難。無量壽佛威神無極。十方世界無量無邊不可思議諸佛如來。莫不稱歎。於波東方恆沙佛國。無量無數諸菩薩衆。皆悉注詣無量壽佛所。恭敬供養。及諸菩

薩聲聞之衆。聽受經法。宣布道化。南西北方四維上下
亦復如是。

前長行中。文別有二。一諸佛共歎。二於東方下。菩薩共往。
後偈中別頌。宜審記知。前佛歎中。初佛告阿難。無量壽佛
威神無極。釋迦自歎。十方界下。餘佛共歎。此下別頌。亦
須記知。下同往中。先列東方。後類餘方。列東方中。於彼
東方恒沙佛國無數菩薩。皆悉往詣無量壽佛。是其始也。恭
敬供養。及諸菩薩聲聞之眾。是其次也。聽受經法。宣佈道
化。是其終也。東方既然。餘方亦爾。此初中後。下偈別頌
亦須記知。下偈頌之。

爾時世尊而說頌曰。



佛說無量壽經義疏

世尊頌曰。經家序列。下正頌之。有三十偈。初十五偈。頌

上後段菩薩共往。後十五頌。頌上初段諸佛同歎。

△前十五中。初有兩偈。頌前同往。次有五偈。頌前文中恭敬供養。下有八偈。頌前聽法宣布道化。

東方諸佛國。其數如恆沙。波土菩薩衆。注觀無量覺。

南西北四維。上下亦復然。波土菩薩衆。注觀無量覺。

前兩偈中。初偈頌前東方同往。後偈頌上餘方共往。至彼禮敬無量壽佛。是故名觀無量覺矣。

一切諸菩薩。各賚天妙華。寶香無價衣。供養無量覺。
咸然奏天樂。暢發和雅音。歌歎最勝尊。供養無量覺。

究達神通慧。遊入深法門。具足功德藏。妙智無等倫。
慧日朗世間。消除生死雲。恭敬遶三匝。稽首無上尊。
見波嚴淨土。微妙難思議。因發無量心。願我國亦然。

次五偈中。前之四偈。見佛供養。後之一偈。見土願求。前
四偈中。初之兩偈。外事供養。後之兩偈。內事供養。前外
事中。各賚妙華。華供養也。寶者。寶供。香者。香供。無
價衣者。以衣供養。奏天樂等。伎樂供養。伎樂音中。歌歎
佛德。後內事中。初一偈半。口歎供養。後之半偈。身敬供
養。就口歎中。前之一偈。歎佛自德。後之半偈。歎佛利他。
歎自德中。究達通慧。遊入深法。歎佛智通二種德也。智是
通本。通是智用。是二相須。故並歎之。通慧究滿。究竟名



究。洞達名達。此通與慧。皆依法成。故復明其遊入深法。倚觀曰遊。窮本稱入。證入法界緣起通門。能現勝通。證入法界緣起智門。能起勝慧。具功德藏。妙智無等。歎佛福智二種行也。福是慧資。慧是福導。是二相須故並歎之。福行圓備。名具功德。慧行殊勝。名智無等。倫謂匹倫。役伴之謂。佛無倫匹。名無等倫。下利他中。慧日朗世。化人生智慧能開曉。照世如日。教人生解。名朗世間。消除生死。化人離障。生死覆障。從喻名雲。身敬可知。上來四偈。見佛供養。下之一偈。見土願求。文顯可知。

應時無量尊。動容發欣笑。口出無數光。遍照十方國。
迴光圍繞身。三匝從頂入。一切天人衆。踊躍皆歡喜。

大士觀世音。整服稽首問。白佛何緣笑。唯然願說意。
梵聲猶雷震。八音暢妙響。當授菩薩記。今說仁諦聽。
十方來正士。吾悉知波願。志求嚴淨土。受決當作佛。
覺了一切法。猶如夢幻響。滿足諸妙願。必成如是刹。
知法如電影。究竟菩薩道。具諸功德本。受決當作佛。
通達諸法性。一切空無我。專求淨佛土。必成如是刹。

此八偈中。頌上聽法宣佈道化。就此文中。初之兩偈。彌陀
如來現相發起。次有一偈。觀音怪問。後之五偈。彼佛具答。

梵聲猶雷。八音暢妙。答聲妙也。八種梵音。如彼梵摩喻經
中說。一最妙聲。其聲哀妙。二易了聲。言辭辨了。三調和
聲。大小得中。四柔軟聲。其聲柔軟。五不悞聲。言無錯失。



佛說

無量壽經義疏

六不女聲。其聲雄朗。七尊慧聲。言有威肅。如世尊重有慧人聲。八深遠聲。其聲深遠猶如雷震。以此妙音酬答觀音。

當受菩薩記。今說仁諦聽。勅聽許說。授記之言。義如上解。

今當說此。仁等諦聽。自下四偈。正明所說。於中初偈。舉彼願心。記必成佛。第二一偈。舉彼智願記必得土。覺了一切如夢幻等。是舉智也。滿足諸願。是舉願也。成如是剝。記得土也。第三一偈。舉彼智行。記必成佛。知法如電。舉彼智也。究菩薩道具諸德本。舉彼行也。受決作佛。記成佛也。第四一偈。舉彼智願。記必得土。通達法性一切空無。是舉智也。前覺一切如夢幻等。是世諦智。此通法性一切空無。是真諦智。專求淨土。是舉願也。必成是刹。記得土也。

△下十五偈。頌上文中諸佛共歎。初有五偈。頌前十方諸佛共

歎。後之十偈。頌前文中釋迦自歎。

諸佛告菩薩。令觀安養佛。聞法樂受行。疾得清淨處。
至波嚴淨國。便速得神通。必於無量尊。受記成等覺。
其佛本願力。聞名欲往生。皆悉到波國。自致不退轉。
菩薩興志願。願己國無異。普念度一切。名顯達十方。
奉事憶如來。飛化遍諸刹。恭敬歡喜去。還到安養國。

前五偈中。諸佛告菩薩。令觀安養佛。正勸令往。聞法受行。
明往所作。疾得以下。明作利益。疾得淨處。明前聞法受行之
益。自於當來得妙淨土。名得淨處。下之四偈。彰前往觀安
養之益。益有五種。第一往彼得神通益。初半偈是。第二往



彼得授記益。次半偈是。前明彼佛授菩薩記即其事也。第三

往彼得不退益。次一偈是。前言生彼住正定聚。即其事也。

第四往彼起願之益。次一偈是。菩薩興願。是總舉也。下別
歎之。別中願己國無異者。求淨土願。願已得土同彌陀佛。

名國無異。普度一切。化眾生願。名顯十方。求佛身願。願

得佛時名達十方。第五往彼廣供多佛起行之益。後一偈是。

△自下十偈。釋迦自歎。令人同往。於中三分。初有三偈。舉
經難聞。歡喜修行。次有四偈。歎彌陀佛授菩薩記。即佛智
德殊勝。令人歸趣。後之三偈。以理教勸。

若人無善本。不得聞此經。清淨有戒者。乃獲聞正法。

曾更見世尊。則能信此事。謙敬聞奉行。踊躍大歡喜。

憍慢弊懈怠。難以信此法。宿世見諸佛。樂聽如是教。

前三偈中。初有半偈。舉無善人不聞此經。彰經深重。次有偈半。舉有善人方乃得聞。顯經微妙。於中光明有善之人。方聞此經。曾更見下。明見佛者方乃信敬。歡喜奉行。次有半偈。舉有惡人不信此法。彰經深重。下之半偈。舉有善者樂聞是教。顯經微妙。舉惡不聞。令人捨遠。舉善得聞。使人慕修。又此文中。彰經深重。去人輕謗。顯經微妙。生人信敬。聲聞或菩薩。莫能究聖心。譬如從生盲。欲行開導人。如來智慧海。深廣無涯底。二乘非所測。唯佛獨明了。假使一切人。具足皆得道。淨慧知本空。億劫思佛智。窮力極講說。盡壽猶不知。佛慧無邊際。如是致清淨。



此之四偈。歎彌陀佛智德殊勝。令人歸趣。於中初有七句之文。明諸聲聞菩薩不測。初法。次喻。後合。可知。次有一句。明佛獨了。次有六句。明一切人悉得聖道。共思不知。假使一切。人之多也。具皆得道。行德勝也。淨慧達本。空解深也。億劫思佛。觀之久也。窮力講說。言之極也。雖復如此。盡壽不知。下有半偈。結歎顯勝。佛慧無邊。歎佛智廣。如是致淨。歎佛德淨。致謂至也。窮至清淨法性涅槃。故難測知。

壽命甚難得。佛世亦難值。人有信慧難。若聞精進求。
聞法能不忘。見敬得大慶。則我善親友。是故當發意。
設滿世界火。必過要聞法。會當成佛道。廣濟生死流。

此之三偈。以理教勸。於中初偈。舉彼三難。勸人勤求。壽命難得。是初難也。佛世難值。第二難也。有信慧難。第三難也。此三種難。今已得之。故聞此經。應當勤求。次第二偈。舉彼見聞。能獲大益。勸人發心。聞不忘者。彌陀佛所聞法不忘。言見敬者。見彌陀佛心生重敬。得大慶者。明前聞法見佛恭敬。得善利也。得善可喜。名得大慶。則我善友。為佛攝也。行順釋迦。名我善友。是故當發。結勸發心。末後一偈。教令定去。設滿世界火。必過要聞法。決意定去。會當成佛。廣濟生死。明去所為。會當成佛。求自利果。廣濟生死。求利他果。

佛說無量壽經義疏卷四



佛說無量壽經義疏卷五

曹魏天竺三藏康僧鎧譯經

隋京師淨影寺沙門慧遠撰疏

△自下第三重攝下人同生彼國。於中有三。第一廣舉無量壽國勝妙之事。令人願求。二從世人薄俗已下。明娑婆界穢惡充滿。使人厭捨。三從禮無量壽佛下。就彌陀國辨得彰失。令人修捨。

△初中有二。第一廣舉無量壽國勝樂之事。二佛告彌勒諸天人下。勸人往生。前中有八。一彰彼國壽命長遠。二彰彼眾光明殊妙。三彰彼眾身相具足。四彰彼眾智德殊勝。五彰彼生永離惡趣。六彰彼土興供養多。七彰彼生聞法不絕。八彰彼

菩薩行德圓備。

佛告阿難。波國菩薩。皆當究竟一生補處。除其本願為衆生故。以弘誓功德而自莊嚴。普欲度脫一切衆生。

就初段中。彰彼菩薩皆當究竟一生補處。明壽長遠。無有中夭。除願為物。餘國受身。

阿難。波佛國中諸聲聞衆身光一尋。菩薩光明照百由旬。有二菩薩最尊第一。威神光明普照三千大千世界。阿難白佛。波二菩薩。其號云何。佛言。一名觀世音。二名大勢至。是二菩薩。於此國土修菩薩行。命終轉化。生波佛國。



第二段中。初彰彼國諸聲聞人身光一尋。次彰彼國餘菩薩光明觀音及大勢至。光徧三千大千世界。於中初辨其光。阿難白佛下。辨其名諱。是二菩薩於此國下。彰此生彼。

阿難。其有衆生生波國者。皆悉具足三十二相。

第三段中。彰彼眾生身相具足。三十二相。如經廣辨。

智慧成滿。深入諸法。究暢要妙。神通無礙。諸根明利。其鈍根者。成就二忍。其利根者。得阿僧祇無生法忍。

第四段中。彰彼眾生智德殊勝。句別有四。一智慧成滿。深入諸法。證會法性。究暢要妙。窮達教詮。二神通無礙。三

諸根明利。四得忍不同。其鈍根者成就二忍。謂音響忍及柔順忍。其利根者乃至成佛。得阿僧祇無生法忍。

又波菩薩。乃至成佛。不更惡趣。神通自在。常識宿命。除生他方五濁惡世。示現同波。如我國也。

第五段中。彰彼生者永離惡趣。於中初明彼國生者。乃至成佛。不更惡趣。神通自在。常識宿命。後除為物他方現生。釋迦自說如我國中諸菩薩也。

佛語阿難。波國菩薩承佛威神。一食之頃。往詣十方無量世界。恭敬供養諸佛世尊。隨心所念。華香妓樂。繒蓋幢幡。無數無量供養之具。自然化生。應念即至。珍



妙殊特。非世所有。轉以奉散諸佛菩薩聲聞大衆。在虛空中化成華蓋。光色昱爍。香氣普熏。其華周圓四百里者。如是轉倍。乃覆三千大千世界。隨其前後。以次化沒。其諸菩薩僉然欣悅。於虛空中共奏天樂。以微妙音歌歎佛德。聽受經法。歡喜無量。供養佛已。未食之前。忽然輕舉還其本國。

第六段中。彰彼生者能興廣供。於中初明往十方界。廣供多佛。次從受法。後明供已未食之頃還歸本國。前中四句。一彰彼國諸菩薩等。於一食頃。往十方界。徧供諸佛。二隨心下。明諸供具隨心化現。三在虛空下。明於空中化成華蓋。四其諸菩薩下。明諸菩薩共奏天樂歌歎佛德。僉謂皆也。眾

皆喜躍。名僉欣悅。後供佛已。未食之前還歸本國。

佛語阿難。無量壽佛。為諸聲聞菩薩大眾頒宣法時。都悉集會七寶講堂。廣宣道教。演暢妙法。莫不歡喜心解得道。即時四方自然風起。吹七寶樹出五音聲。無量妙華隨風四散。自然供養如是不絕。一切諸天。皆賚天上百千華香。萬種妓樂。供養其佛及諸菩薩聲聞之衆。普散華香。奏諸音樂。前後來往。更相開避。當斯之時。熙怡快樂。不可勝言。

第七段中。彰彼生者聞法不絕。於中初明說法之時。眾集講堂。如來為說。莫不已下。明說利益。心解得道。即時已下。



設供奉佛。於中初先風搖樹音。次吹妙華。後諸天等。持華
香樂。供養奉獻。娛樂無極。

△自下第八。彰彼菩薩行德圓備。於中初別。後總結之。別中
有七。一行修離過。二具足下。成德圓備。三等觀三界空無
有下。行修具足。四究竟一乘下。成德殊勝。五摧滅嫉下。
行修增進。六因力下。諸力具足。七身色相好功德已下。通
就諸德總歎顯勝。

佛語阿難。生波佛國諸菩薩等。所可講說。常宣正法。
隨順智慧。無違無失。於其國土所有萬物。無我所心。
無染著心。去來進止。情無所係。隨意自在。無所適莫
。無波無我。無競無訟。於諸衆生。得大慈悲饒益之心。

。柔軟調伏。無忿恨心。離蓋清淨。無厭怠心。等心。
勝心。深心。定心。愛法樂法喜法之心。滅諸煩惱離惡
趣心。究竟一切菩薩所行。

初中先別。後總結之。別中初言所可講說常宣正等。化行離
過。於其國下。自行無失。於中初先明攝對治。滅煩惱下。
明離諸過。前攝治中。明修六度而為對治。初修捨行。捨猶
檀矣。於其國土所有萬物無我所心。明其離見。無染著心。
彰其離愛。除捨此二。名為捨行。次修戒行。去來進止情無
所係隨意自在。明離身過。無所適莫無彼無我。明離意過。
於眾生所。無適適之親。無莫莫之疏。名無適莫。無競無訟。
明離口過。次修忍行。於諸眾生得大慈悲饒益之心柔軟調伏。



正明能忍。無忿恨等。離於忍障。次修精進。求善不息。名無厭怠。諸行齊修。故曰等心。所修務上。名為勝心。求心殷重。故曰深心。次修禪行。遠離亂意。故曰定心。下修慧行。得法愛著。名為愛法。此據終也。聞時耳樂。名為樂法。此據次也。求時心喜。名為喜法。此據始也。上來修治。下明離過。滅諸煩惱。離煩惱也。離惡趣心。除惡業也。上來別竟。究竟一切菩薩所行。總以結之。上來第一行修離過。

具足成就無量功德。得深禪定諸通明慧。遊志七覺。修心佛法。肉眼清澈靡不分了。天眼通達無量無限。法眼觀察究竟諸道。慧眼見真能度波岸。佛眼具足覺了法性。以無礙智為人演說。

第二成德圓備。具無量德。總以標舉。下別顯之。別中初明
自利功德。以無礙下。明利他德。前自利中。得深禪定諸通
明慧。遊志七覺。自分功德。禪謂四禪。定者。所謂四空定
等。諸通。六通。明謂三明。宿命。天眼。及漏盡。慧謂三
慧。聞思修等。言七覺者。念。慧。精進。輕安。喜。定。
捨。是其七也。修心已下。勝進功德。修心佛法。上求佛德。
肉眼已下。成就功德無量。且舉五眼之義。廣如別章。此應
具論。今且釋文。肉眼清徹靡不分了。肉眼勝也。形膚曰肉。
淨肉之根。能有照矚。目之為眼。於彼國中。報得肉眼徹見
無數世界之事。名為清徹。所見明審。故無不了。斯乃照矚
現在色像。名為肉眼。天眼通達無量無限。天眼勝也。一切
禪定。名為天住。依禪得眼。故名天眼。能見眾生死此生彼。



所見寬多。故曰無量。所見長遠故曰無限。法眼觀察究竟諸道。法眼勝也。智能照法。故名法眼。能見一切眾生根欲性心。辨知一切化眾生法。所知窮極。名為究竟。了知三乘道法差別。名究竟諸道。慧眼見真能度彼岸。慧眼勝也。照空實慧。見理名眼。能見真空。故名見真。除捨有相。達到平等無相彼岸。名度彼岸。佛眼具足覺了法性。佛眼勝也。前四。是別。佛眼是總。見境周盡。故云具足。又復佛眼能見真實如來藏中不空實性。名了法性。上來自德。以無礙智為人演說。是利他德。此第二竟。

等觀三界空無所有。志求佛法。具諸辯才。除滅衆生煩惱之患。從如來生。解法如如。善知習滅音聲方便。不

欣世語。樂在正論。修諸善本。志崇佛道。知一切法皆悉寂滅。生身煩惱二餘具盡。聞甚深法心不疑懼。常能修行。其大悲者。深遠微妙。靡不覆載。

第三明修具足。於中兩對自利利他。初對修始。後對修終。從初乃至除滅煩惱。悉是初對也。從如來下。是後對也。前中初言等觀三界空無所有。志求佛法。是其自利。等觀三界空無所有。離生死行。志求佛法。趣菩提行。具諸辯下。明其利他。具諸辯才。明化他德。除滅眾生煩惱之患。明化他益。就後對中。初明自利。其大悲下。明其利他。就自利中。文別有四。一自分之解。二修諸善下。自分之行。三聞甚深下。勝進之解。四常能修下。勝進之行。自分解中。從如來



生解法如如。是其理解。解由如來教化出生。是故說之從如來生。空同曰如。解知一切萬法皆如。名解如如。善知習等。是其教解。習善之教。名習音聲。滅惡之教。名滅音聲。菩薩於此悉能善解。故名善知。於中巧知。故曰方便。由於聖教能善知故。不欣世語樂在正論。自分行中。修諸善本。志崇佛道。趣菩提行。知一切法皆悉寂滅。觀空修治。生身煩惱二餘俱盡。滅生死行。知一切法皆悉寂滅。觀空修治。生身煩惱二餘俱盡。治成離障。生身苦報。煩惱惑因。此二殘餘皆悉滅盡。勝進解中。聞甚深法不疑懼者。於深能解。所以不疑。於深能入。為是不懼。勝進行中。常能修者。於佛深法行不息也。上來自利。下明利他。其大悲者。總以標舉。下別顯之。深遠微妙。悲心深也。靡不覆載。悲物廣也。此第三竟。

究竟一乘。至於波岸。決斷疑網。慧由心出。於佛教法。
。該羅無外。智慧如大海。三昧如山王。慧光明淨。超
踰日月。清白之法。具足圓滿。猶如雪山。照諸功德等
一淨故。猶如大地。淨穢好惡無異心故。猶如淨水。洗
除塵勞諸垢染故。猶如大王。燒滅一切煩惱薪故。猶如
大風。行諸世界無障礙故。猶如虛空。於一切有無所著
故。猶如蓮華。於諸世間無染汙故。猶如大乘。運載群
萌出生死故。猶如重雲。震大法雷覺未覺故。猶如大雨
。雨甘露法潤衆生故。如金剛山。衆魔外道不能動故。
如梵天王。於諸善法最上首故。如尼拘類樹。普覆一切
故。如優曇鉢華。希有難遇故。如金翅鳥。威伏外道故。



。如衆遊禽。無所藏積故。猶如牛王。無能勝故。猶如象王。善調伏故。如師子王。無所畏故。曠若虛空。大慈等故。

第四成德殊勝。於中初先明自利德。如大乘下。明利他德。就自德中。初攝善勝。照功德下。明離過勝。攝善勝中。究竟一乘。菩提德滿。乘是行用。行能運通。故名為乘。隨化多乘。就實不殊。是以言一。一義不同。汎解有四。一簡別名一。如來於彼三藏教中。隨化分三。求聲聞者。為說四諦。求緣覺者。為說因緣。求大乘者。為說六度。宣說菩薩三阿僧祇。修行有漏六波羅蜜。於最後生一身之中。斷結成佛。簡別彼三。是以言一。二破別名一。如來隨化宣說三乘。世

人定執以為真實。破別彼三。是以言一。故經說言。唯一是實。餘悉非真。猶如化城。非真息處。三會別名一。如來根本分一為三。會之歸本。是以言一。如勝鬘說。四無別名一。就實論實。由來無別。故名為一。於此一乘。窮名究竟。至於彼岸。涅槃果極。此二一對。決斷疑網。慧由心出。是其證知。除妄顯真。名斷疑網。真解發中。名慧心出。於佛教法該羅無外。是其教知。窮解無餘。名該無外。此證與教。共為一對。智慧如海。明慧深廣。三昧如山。彰定高勝。慧光明淨超踰日月。彰其慧明。清白之法具足圓滿。猶如雪山。顯其定淨。此定與慧。復為一對。上來攝善。下顯離過。照諸功德等一淨者。是其法說。諸德皆淨。名等一淨。下以喻顯。喻別有六。文喻可知。上來自利。下明利他。有十三句。



皆約喻顯。猶如大乘載群萌者。名世大車以為大乘。彼諸菩薩利他之德。如世大車。名為大乘運載群萌出生死矣。餘皆可知。此第四竟。

摧滅嫉心。不忌勝故。專樂求法。心無厭足。常欲廣說。
志無疲倦。擊法鼓。建法幢。曜慧日。除癡闇。修六
和敬。常行法施。志勇精進。心不退弱。為世燈明。最
勝福田。常為師導。等無憎愛。唯樂正道。無餘欣戚。
拔諸欲刺。以安群生。功慧殊勝。莫不尊敬。滅三垢障。
遊諸神通。

第五行修增進。於中五對。皆初利他。後明自利。五對何別。

前二自分。後三勝進。就自分中。初之一對。起修方便。摧滅嫉心。不忌勝故。利他方便。心有嫉忌。不能利他。故須除滅。專樂求法心無厭足。自利方便。後對正修。常欲廣說志無疲等。正明利他。常欲廣說志無疲倦。起說心勝。擊法鼓等。所說法勝。言擊法鼓。喻聞慧法。教聲遠被。名擊法鼓。建法幢者。喻思慧法。立義稱建。義出名幢。言曜慧日。除癡闇者。說修慧法。開眾生也。修六和敬。正明自利。行成同他。情無乖異。名六和敬。身口意同。是其三和。同戒同施及與同見。是其六和。此六和同。便相親敬。名六和敬。下勝進中。初對修始。第二修次。第三修成。就初對中。常行法施。利他始也。志勇精進心不退弱。自行始也。第二對中。為世燈明最勝田等。利他次也。為世燈明最勝福田。明化德勝。



自具智慧。能生物解。名世燈明。自具功德。能生物善。名勝福田。常為導師。等無憎愛。明化益勝。以慧開人。名為導師。福善濟潤。故無增愛。唯樂正道。無餘欣戚。自行次也。樂道修善。無餘離過。第三對中。拔欲刺等。利他成也。拔諸欲刺以安群生。化人離過。功慧殊勝。莫不尊敬。化人從善。滅三垢等。自行成也。滅三垢障。成就斷德。貪瞋癡等。是三垢障。遊諸神通。成就行德。此第五竟。

因力。緣力。意力。願力。方便之力。常力。善力。定力。慧力。多聞之力。施戒忍辱精進禪定智慧之力。正念正觀諸通明力。如法調伏諸衆生力。如是等力。一切具足。

第六諸力具足。初別。後結。別中初明白力具足。如法調下。
化他力足。自中相從以為七門。因力緣力為第一門。起修所
依。過去所修一切善行。能生今善。名為因力。近善知識。
聽聞正法。名為緣力。意力願力為第二門。起修方便。求佛
之心。名為意力。起行之願。名為願力。方便之力常力善力
為第三門。起行正修。依法巧修。名方便力。依法恆修。名
為常力。依法正修。名為善力。定力慧力為第四門。修心成
就。修止成就。名為定力。修觀成就。名為慧力。此前四門
約修分別。多聞之力為第五門。起行之解。施戒忍進定慧之
力為第六門。明所起行。行謂六度。此之兩門就行分別。正
念正觀諸通明力為第七門。依行成德。捨相入實。名為正念。
離癡見法。說為正觀。依此二種。成就六通及得三明。名通

明力。此後一門就德分別。上來自利。如法成就諸眾生力。
明其利他。上來別竟。如是等力一切具足。總以結之。此第
六竟。

身色相好。功德辯才。具足莊嚴。無與等者。恭敬供養
無量諸佛。常為諸佛所共稱歎。究竟菩薩諸波羅密。修
空無相無願三昧。不生不滅諸三昧門。遠離聲聞緣覺之
地。

第七通就諸德總歎顯勝。於中有四。一自德殊勝。二為佛共
歎。三究竟大乘。四超出小乘。初中身色相好功德辯才具足
無與等者。自分所成。身色相好無與等者。明其身勝。功德

辯才無與等者。明其德勝。言具足者。明德具足。言莊嚴者。

明身莊嚴。恭敬供養無量諸佛。勝進所起。第二佛歎。相顯可知。第三段中。究竟菩薩諸波羅蜜。教行成滿。修空無相無願三昧不生滅等。證行成滿。第四段中。超出二乘。文顯可知。上來別歎。

阿難。波諸菩薩成就如是無量功德。我但為汝略言之耳。若廣說者。百千萬劫不能窮盡。

總以結歎。

上來八段。合為第一舉彌陀國勝樂之事。

佛告彌勒菩薩諸天人等。無量壽國。聲聞菩薩功德智慧。



。不可稱說。又其國土微妙安樂清淨若此。何不力為善。
。念道之自然。著於無上下。洞達無邊際。宜各勤精進。
。努力自求之。必得超絕去。往生安養國。橫截五惡趣。
。惡趣自然閑。昇道無窮極。易往而無人。其國不逆違。
。自然之所牽。何不棄世事。勤行求道德。可獲極長生。
。壽樂無有極。

第二勸人往生。佛告彌勒。告其所對。諸天人等。舉其所為。

無量壽國聲聞菩薩功德智慧不可稱等。牒上所辨。聲聞菩薩
功德智慧不可稱說。牒前文中所辨之人。又其國土微妙安樂
清淨若此。牒前文中所辨之土。何不力下。正勸往生。於中
有三。一正勸往生。二易往下。如來傷歎。三何不棄下。重

勸往生。前正勸中。何不力為善。正勸修因。何不力勵為善。求生。名力為善。念道已下。明修利益。念道之者。自然往生。名念自然。但能念道。行德顯著。不簡上下。同得往生。故言著於無上下也。若得生彼。神通洞達。無有邊際。故云洞達無邊際耳。宜各精進努力求之。重勸修因。必得超下。重明修益。必得超絕。明其所出。往生安養。彰其所至。橫截五惡。惡趣自閉。明其所離。三途人天。是其五趣。於此分別。下三惡道。名為惡趣。人天二道。名為善趣。今此約對彌陀淨刹。娑婆五道。齊名惡趣。人天二道。名為善趣。是其純惡所向。名為惡趣。娑婆人天。雜惡所向。亦名惡趣。若依此方修習斷除。先斷見惑離三途因。滅三途果。後斷修惑。離人天因。絕人天果。漸除不名橫截。若得往生彌陀淨土。



娑婆五道一時頓捨。故名橫截。截五惡趣。截其果也。惡趣自閉。閉其因也。此明所離。昇道無極。彰其所得。得道深廣。故無窮極。上來第一正勸往生。自下第二如來傷歎。欲使世人力勵往生。初言易往而無人者。正為傷歎。修因即去。名為易往。無人修因。往生者少。故曰無人。其國不逆違。彰前易往。自然所牽。顯前無人。娑婆眾生。久習蓋纏。自然為之牽縛不去。故彼無人。自下第三重勸往生何不棄世事。勤求道德。勸其修因。可獲長生。壽樂無極。明修得果。上來第一舉彌陀國勝樂之事。令人願求。

△自下第二彰娑婆界穢惡充滿。令人厭捨。於中有四。一舉三毒煩惱之過。二勸人修捨。三舉五惡五痛五燒業苦之過。四勸人修捨。

△就初段中。先明貪過。世間人民父子已下。明其瞋過。如是世人不信已下。明其癡過。

然世人薄俗。共諍不急之事。於此劇惡極苦之中。勤身營務。以自給濟。無尊無卑。無貧無富。少長男女。共憂錢財。有無同然。憂思適等。屏營愁苦。累念積慮。為心走使。無有安時。有田憂田。有宅憂宅。牛馬六畜。奴婢錢財。衣食什物。復共憂之重思累息。憂念愁怖。橫為非常水火盜賊。怨家債主。焚漂劫奪。消散磨滅。憂毒忪忪。無有解時。結幘心中。不離憂惱。心堅意固。適無縱捨。或坐摧碎。身亡命終。棄捐之去。莫誰



隨者。尊貴豪富。亦有斯患。憂懼萬端。勤苦若此。結衆寒熱與痛共俱。貧窮下劣。困乏常無。無田亦憂欲有田。無宅亦憂欲有宅。無牛馬六畜奴婢錢財衣食什物。亦憂欲有之。適有一。復少一。有是少是。思有齊等。適欲具有。便復糜散。如是憂苦。當復求索。不能時得。思想無益。身心俱勞。坐起不安。憂念相隨。勤苦若此。亦結衆寒熱。與痛共俱。或時坐之終身夭命。不肯為善行道進德。壽終身死。當獨遠去。有所趣向。善惡之道。莫能知者。

貪中有三。一通就世人以明貪過。二尊貴下。偏就富貴以明

貪過。三貧窮下。偏就貧賤以明貪過。就初段中。世人薄俗。諍不急事。明其有惡。謂此世人薄於風俗。共諍世間不急之事。於此劇下。彰其有苦。苦中有三。一求財苦。二有田下。明守護苦。三橫為下。明散失苦。初求苦中。於此劇苦。勤身營務以自給濟。為身故求。無尊卑等。為他故求。無尊無卑無貧無富。舉能求人。少長男等。舉其所為。下明有苦。共憂財等。明心苦也。為心走等。明身苦也。守護苦中。有田憂田。有宅憂宅。如是等事。別明其苦。重思下結。散失苦中。橫為非常水火盜等。明失財苦。或坐摧等。明失身苦。次就富貴以明貪過。文顯可知。下就貧賤明貪過中。文別有三。一求財苦。二或時坐下。明失身苦。三不肯下。明未來苦。求財苦中。文別有五。一今無事中。憂之生苦。二適有



一下。少有事中。明不足苦。三適欲具下。已得事中。明散
失苦。四當復求下。明進求時有不得苦。五亦結眾下。明追
求時寒熱等苦。此五合為求財苦也。失身之苦。及未來苦。
文顯可知。

世間人民。父子兄弟。夫婦家室。中外親屬。當相敬
愛。無相憎嫉。有無相通。無得貪惜。言色常和。莫相
違戾。或時心諍。有所恚怒。今世恨意。微相憎嫉。後
世轉劇。至成大怨。所以者何。世間之事。更相患害。
雖不即時。應急相破。然含毒畜怒。結憤精神。自然剋
識。不得相離。皆當對生。更相報復。人在世間愛欲之
中。獨生獨死。獨去獨來。當行至趣。苦樂之地。身自

當之。無有代者。善惡變化。殃福異處。宿豫嚴詩。當獨趣入。遠到他所。莫能見者。善惡自然追行。所生窈冥冥。別離久長。道路不同。會見無期。甚難甚難。復得相值。何不棄衆事。各遇強健時。努力勤修善。精進願度世。可得極長生。如何不求道。安所湏詩。欲何樂乎。

明瞋過中。文別有三。一以理教勸。當相親愛。無相憎嫉。有無相通。不得貪惜。言色常和。莫相違戾。二或心諍下。廣明瞋過。三何不棄下。勸修捨離。第二過中。別有三種。一明未來怨害之過。二人在世下。明有未來惡道之過。三所生窈冥已下。明別離難聚之過。第三段中。勸捨可知。



佛

說無量壽經義疏

如是世人。不信作善得善為道得道。不信人死更生。惠施得福。善惡之事。都不信之。謂之不然。終無有是。但坐此故。且自見之。更相瞻視。先後同然。轉相承受父餘教令。先人祖父。素不為善。不識道德。身愚神闇。心塞意閑。死生之趣。善惡之道。自不能見。無有語者。吉凶禍福。競各作之。無一怪也。生死常道。轉相嗣立。或父哭子。或子哭父。兄弟夫婦。更相哭泣。顛倒上下。無常根本。皆當過去。不可常保。教語開導。信之者少。是以生死流轉。無有休止。如此之人。矇冥抵突。不信經法。心無遠慮。各欲快意。癡惑於愛欲。不達於道德。迷沒於瞋怒。貪狼於財色。坐之不得道。

當更惡趣苦。生死無窮已。哀哉甚可傷。或時室家父子
兄弟夫婦。一死一生。更相哀愍。恩愛思慕。憂念結縛。
心意痛著。迭相顧戀。窮日卒歲。無有解已。教語道
德。心不開明。思想恩好。不離情欲。昏蒙闇塞。愚惑
所覆。不能深思熟計。心自端正。專精行道。決斷世事
。便旋至竟。年壽終盡。不能得道。無可奈何。總猥幟
擾。皆貪愛欲。惑道者衆。悟之者寡。世間忽忽。無可
聊賴。尊卑上下。貧富貴賤。勤苦忽務。各懷殺毒。惡
氣窈冥。為妄興事。違逆天地。不從人心。自然非惡。
先隨與之。恣聽所為。詩其罪極。其壽未盡。便頓奪之。
下入惡道。累世勤苦。展轉其中。數千億劫。無有出



佛說

無量壽經義疏

期。痛不可言。甚可哀愍。

明癡過中。文別有二。一明有癡。二生死常道。轉相嗣下。
明其癡過。前中有二。一明癡人自無正信。二更相瞻下。專受
他語。自無信中。初先別論。但坐是下總結顯過。坐不信故。
專執自見。是其過也。受他語中。更相瞻視。先後同然。效
習他人。轉相承下。承習父祖。於中初言轉相承受父餘教令。
明子無知受父邪言。先人祖下。舉父癡頑成子無知。於中四
句。初言祖父素不為善。明其無行。二不識道德。彰其無解。
三身愚神闇。心塞意閑。生死善惡自不能見。無有語者。重
明無解。前句無解。不識出道。此句無解。不知世間善惡因
果。生死之趣不能自見。不識果也。善惡之道不能自見。不

知因也。於因於果。自心不識。他無語者。故永不解。四吉凶禍福。競各作之。無一怪者。重明無行。前句無行。彰不作善。此句無行。明其造惡。自己為惡。他無語者。故永不離。

上來一段明其有癡。下明癡過。於中有四。一由癡故父子相哭。二如此人下。明由癡故造惡受苦。三或室家下。明由癡故親戚相憶。四總猥下。明由癡故造惡受苦。初中先明父子相哭。教語已下。明難開曉。是以生死流轉無已。為之輪轉。

第二段中。句別有五。一明此癡人。矇冥抵突。不信經法。各用快意。二惑於愛欲。不達道德。三迷於瞋怒。貪狼財色。四坐前三種。不得正道。多受諸苦。當更惡趣。明有重苦。生死無窮。明有深苦。五哀哉下。如來傷歎。令人厭捨。第三段中。句別有三。一由癡故親戚相憶不可開解。二思想下。



明由相憶不能修善。三便旋下。由不修善不能得道。第四段
中。句別有四。一癡故起貪。追求世事。總猥憒擾。貪欲愛
等。二各懷殺下。癡故起瞋。共相殘害。各懷殺毒。惡氣窈
冥。為妄事等。三自然下。明由前惡。受苦難出。造罪之人。

宿罪之力。自然招集非法惡緣。隨而與之。恣其作罪。待其
罪極。頓奪令盡。將入惡道。受苦無極。四痛不可下。如來
傷歎。令人生厭。上來廣舉三毒之過。

△自下第二勸人修捨。於中有四。一正勸修捨。二彌勒領解。
三重勸修捨。四彌勒領行。

佛告彌勒菩薩諸天人等。我今語汝世間之事。人用是故
。坐不得道。當熟思計。遠離衆惡。擇其善者。勤而行

之。愛欲榮華不可常保。皆當別離。無可樂者。遇佛在世。當勤精進。其有至願生安樂國者。可得智慧明達。功德殊勝。勿得隨心所欲。虧負經戒。在人後也。儻有疑意不解經者。可具問佛。當為說之。

初中有二。一勸人修行。二儻有疑下。勸人請問勸修有三。一舉前過勸人修斷。佛告彌勒世間之事。用是事故坐不得道。

舉前過也。世間事者。牒舉向前三毒之事。用是以也。坐是由也。世人以是三毒事故。由不得道。當熟下勸。當熟思計。遠離眾惡。勸人捨過。謂離向前三毒眾惡。擇善行之。勸修對治。二愛欲下。舉世五欲無常之過。勸人修捨。三遇佛在下。舉佛現在。勸人勤修。於中初先舉佛現在。正勸修行。



佛

說無量壽經義疏

其有願下。彰益勸為。智慧明達。得智勝也。功德殊勝。得福勝也。勿得已下。舉損誠約。上來勸行。勸問可知。

彌勒菩薩長跪白言。佛威神尊重。所說快善。聽佛經語。貫心思之。世人實爾。如佛所言。今佛慈愍。顯示大道。耳目開明。長得度脫。聞佛所說。莫不歡喜。諸天人民蠕動之類。皆蒙慈恩解脫憂苦。佛語教誡。甚深甚善。智慧明見八方上下去來今事。莫不究竟。今我衆等。所以蒙得度脫。皆佛前世求道之時。謙苦所致。恩德普覆。福祿巍巍。光明澈照。達空無極。開入泥洹。教授典攬。威制消化。感動十方。無窮無極。佛為法王。

尊超衆聖。普為一切天人之師。隨心所願。皆令得道。

今得值佛。復聞無量壽聲。靡不歡喜。心得開明。

第二彌勒領解。於中有二。一正領解。二今得值下。歡喜自慶。前中有四。一歎佛說快。貫心思之。世人實爾。成前說快。貫謂通也。通心思之。世人實隨三毒之事。坐不得道。名為實也。二佛言下。領佛慈化。三佛語教下。重歎佛說為深為善。於中初先歎說深善。智慧明等。舉智成說。四今我眾等所以蒙下。重頌佛恩。今我眾等。所以蒙得度脫所由。下正出之。由佛前世勤苦修道。今得佛果。化導我等。故得解脫。皆佛前世求道之時謙苦所致。舉佛因也。恩德普等。彰佛果也。恩德普覆。總舉佛德。福祿巍等。別以顯之。佛



為法王尊超聖等。總以結歎。別中初言福祿巍巍光明徹照。

自福殊勝。達空無極。自智殊勝。開入泥洹。教授典攬以智化益。開入泥洹。化人證滅。教授典攬。教人趨道。道法訓世。名為教授。以此經典要攬眾義。令其習學。故曰典攬。

威制消等。以福化益。剛強眾生。威德制卻。令其消伏。歸從聖化。是故名為威制消化。善軟眾生。慈力攝取。名感十方。有緣斯攝。名無窮極。結歎可知。上來領解。今得值佛。聞無量壽。靡不歡喜。心得開明。歡喜自慶。此第二段彌勒領解。

△自下第三重勸修捨。於中有四。一歎前彌勒領荷佛恩。二彌勒當知汝從無數劫來已下。慶前彌勒值佛聞法。並得聞於無量壽名。三汝今亦可自厭已下。正勸修行。四汝等宜各精進

已下。勸捨疑惑。

佛告彌勒。汝言是也。若有慈敬於佛者。實為大善。天下久久。乃復有佛。今我於此世作佛。演說經法。宣布道教。斷諸疑網。拔愛欲之本。杜衆惡之源。遊步三界。無所拘礙。典攬智慧。衆道之要。執持綱維。昭然分明。開示五趣。度未度者。決正生死泥洹之道。

初中佛告汝言是也。印其前言。彌勒向前歎佛說快甚深甚善。

此言當理。故曰是也。若有慈下。歎前彌勒領荷佛恩。彌勒向者。憐佛前世勤苦為物志求佛道。名為慈佛。敬荷佛恩。名為敬佛。此實大善。天下久久乃有佛下。舉佛化益。述前



所說。天下久久乃復有佛。彰佛難值。今我已下。明已化益。

於中有四。一彰已作佛。以法化世。二斷諸下。由佛現化。
教諸眾生斷生死因。斷諸疑網。拔愛欲本。令離煩惱。杜眾
惡源。令離惡業。杜猶塞也。惡業是其惡道家本。名眾惡源。
教令斷塞。自之為杜。三遊步下。彰已作佛。以法化世。遊
步三界。無所拘礙。身業化也。身化自在。故無拘礙。典攬
智慧。眾道之要。意業化也。善解經典。攬知眾義。名典攬
智。善知三乘所行之要。名眾道要。執持綱維。照然分明。
開示五趣。口業化也。執法持眾。名執綱維。辨正異邪。名
照分明。用化群品。名開五趣。四度未度下。由佛化世。教
諸眾生出生死果。度未度者。決正生死。令出生死。泥洹之
道。使得涅槃。舉此化益。述前彌勒所歎所領。此初段竟。

彌勒當知。汝從無數劫來。修菩薩行。欲度衆生。其已久遠。從沒得道至於泥洹。不可稱數。汝及十方諸天人民一切四衆。永劫已來。展轉五道。憂畏勤苦。不可具言。乃至今世。生死不絕。與佛相值。聽受經法。又復得聞無量壽佛。快哉甚善。吾助爾喜。

第二慶前彌勒值佛聞法聞無量壽。於中有三。一彰彌勒修來久遠。二乃至下。明今值佛聞無量壽。三快哉下。如來慶之。

前中初言汝從無數劫來修行。欲度眾生。其已久遠。修來久也。從汝得道至於泥洹不可稱數。聖來遠也。汝及十方諸天人等。永劫已來。憂畏勤苦不可具言。勤苦多也。永猶長也。藉此多因。今得值佛聞無量壽。是為可慶。此第二竟。



汝今亦可自厭生死老病痛苦。惡露不淨。無可樂者。宜自決斷。端身正行。益作諸善。修己潔體。洗除心垢。言行忠信。表裡相應。人能自度。轉相拯濟。精明求願。積累善本。雖一世勤苦。湏臾之間。後生無量壽國。快樂無極。長與道德合明。永拔生死根本。無復貪恚愚癡苦惱之患。欲壽一劫百劫千億萬劫。自在隨意皆可得之。無為自然。次於泥洹之道。

第三正勸修行。言對彌勒。意兼一切。於中初先正勸修行。

雖一世下。彰益勸物。前中有三。一勸捨過。二端身下。勸修善法。三人能自下。勸利眾生。勸捨過中。汝可自厭生老

病等。勸生厭心。生老病死。是其內苦。言痛苦者。是其外苦。惡露不淨無可樂者。宜自決斷。彰過令捨。勸修善中。端身正行。是其止善。益作眾善。是其作善。修己潔體。洗除心垢。勸修意行。修己作善。餘是止善。言行忠信。表裏相應。勸修口行。言行忠信。是其作善。表裏相應。是其止善。言表心裏。語不違心。故名相應。勸利他中。人能自度。牒前自德。轉相拯等。正勸利他。轉相拯濟。化人離過。精明求願。積累善本。化人成善。精明求願。化起願也。積累善本。化起行也。上來勸修。下舉明益。令人修學。雖一世勤苦須臾之間。修時促也。後生已下。得益長也。於中初明得益長遠。無為自然。次於泥洹。得益殊勝。得益長中。句別有四。初言後生無量壽國快樂無極。愛樂長也。第二長與



道德合明。成德長也。身與福俱。名道德合。心與智俱。名為合明。三永拔等。離過長也。於中永拔生死根本。長離業因。無復貪等。長離煩惱。無苦惱患。長離苦報四欲壽等。壽命長也。此第三竟。

汝等宜各精進。求心所願。無得疑惑中悔。自為過咎。

生波邊地七寶宮殿。五百歲中受諸厄也。

第四勸捨疑惑。汝等宜各精求所願。勸其專修。無得疑等。勸捨疑惑。生彼邊下。彰過勸捨。上來第三重勸修捨。

彌勒白言。受佛重誨。專精修學。如教奉行。不敢有疑。

第四彌勒領行。於中初言受佛重誨。專精修學。如教奉行。

領佛向前勸修之言。彰已奉行。不敢疑者。領佛向前勸捨疑
惑。彰已不疑。

佛說無量壽經義疏卷五



佛說無量壽經義疏卷六

曹魏天竺三藏康僧鎧譯經

隋京師淨影寺沙門慧遠撰疏

△自下第三廣舉五惡五痛五燒業苦之過。令人厭捨。於中初總。

何等下別。佛告彌勒吾語汝下。重復總辨。

佛告彌勒。汝等能於此世。端心正意。不作衆惡。甚爲至德。十方世界最無倫匹。所以者何。諸佛國土。天人之類。自然作善。不大爲惡。易可開化。今我於此世間。作佛。處於五惡五痛五燒之中。爲最劇苦。教化群生。

令捨五惡。令去五痛。令離五燒。降化其意。令持五善。
。獲其福德度世長壽涅洹之道。

就初總中。文別有二。一歎前起後。歎前彌勒領解奉行。二
今我下。彰已化意。為化眾生。令離五惡五痛五燒。令持五
善。獲五福德。前中初言於此惡世。端心正意不作眾惡。甚為
至德。當相正歎。十方世界最無倫匹。寄對顯勝。所以下釋。
先徵。後解。諸佛國土。自然作善。不大為惡。易可開化。
舉易顯難。成此為勝。就後段中。我今於此世間作佛。彰已
成佛。處於五惡等。顯已化處。令捨五等。明已化意。為化
眾生。令有所出。令有所得。令所出者。出離五惡五痛五燒。
五戒所防。殺。盜。邪淫。妄語。飲酒。是其五惡。造此五



惡。於現世中。王法治罪。身遭厄難。名為五痛。以此五惡。

於未來世。三途受報。說為五燒。此皆令出。令所得中。降化其意。伏令從法。令持五善。所謂五戒。翻前五惡。獲其福者。由持五戒。於現在世。身安無苦。翻前五痛。度世長壽泥洹道者。後生彌陀。終得涅槃。翻上五燒。

佛言。何等五惡。何等五痛。何等五燒。何等消化五惡。令持五善。獲其福德。度世長壽泥洹之道。

第二別中。何等五惡五痛燒等。問前起後。下對辨之。一一門中。皆初明惡。後翻明善。

其一惡者。諸天人民蠕動之類。欲為衆惡。莫不皆然。

強者伏弱。轉相剝賊。殘害殺戮。迭相吞噬。不知修善。
○惡逆無道。後受殃罰。自然趣向。神明記識。犯者不
赦。故有貧窮下賤。乞丐孤獨。聾盲瘡啞。愚癡弊惡。
至有庭狂不達之屬。又有尊貴豪富。高才明達。皆由宿
世慈孝。修善積德所致。世有常道。王法牢獄。不肯畏
慎。為惡入罪。受其殃罰。求望解脫。難得免出。世間
有此目前現事。壽終後世。尤深尤劇。入其幽冥。轉生
受身。譬如王法。痛苦極刑。故有自然三塗。無量苦惱
。轉貿其身。改形易道。所受壽命。或長或短。魂神精
識。自然趣之。當獨值向。相從共生。更相報復。無有
止已。殃惡未盡。不得相離。展轉其中。無有出期。難



得解脫。痛不可言。天地之間。自然有是。雖不即時卒暴應至。善惡之道會當歸之。是為一大惡一痛一燒。勤苦如是。譬如大火焚燒人身。人能於中一心剎意。端身正行。獨作諸善。不為衆惡者。身獨度脫。獲其福德度世上天泥洹之道。是為一大善也。

就初門中。先明其惡。下翻明善。惡中初言其一惡者。總以標舉。次辨。後結。下喻顯過。辨中初先明其殺惡。世有常道王法已下。約殺明痛。壽終已下。就殺明燒。前明惡中。諸天人等。明造惡人。欲為惡等。正明造惡。不知修下。明造惡過。於中初先正明其過。又尊貴下。舉得顯失。痛燒可知。是為下結。譬如已下。喻顯燒相。就明善中。先辨後結。

辨中初言人能於中一心制等。正明作善。翻對前惡。身獨度
脫獲其福者。翻對前痛。翻對前燒。是為下結。

佛言。其二惡者。世間人民。父子兄弟。室家夫婦。都
無義理。不順法度。奢姪惰縱。各欲快意。任心自恣。
更相欺惑。心口各異。言念無實。佞諂不忠。巧言誤媚
。嫉賢謗善。陷入怨枉。主上不明。任用臣下。臣下自
在。機偽多端。踐度能行。知其形勢。在位不正。為其
所欺。妄損忠良。不當天心。臣欺其君。子欺其父。兄
弟夫婦。中外知識。更相欺誑。各懷貪欲瞋恚愚癡。欲
自厚己。欲貪多有。尊卑上下。心俱同然。破家亡身。



不顧前後。親屬内外。坐之滅族。或時室家知識。鄉黨
市里。愚民野人。轉共從事。更相剝害。忿成怨結。富
有慳惜。不肯施與。愛保貪重。心勞身苦。如是至竟。
無所恃怙。獨來獨去。無一隨者。善惡禍福。追命所生
。或在樂處。或入苦毒。然後乃悔。當復何及。世間人
民。心愚少智。見善憎謗。不思慕及。但欲為惡。妄作
非法。常懷盜心。希望他利。消散磨盡。而復求索。邪
心不正。懼人有色。不豫思計。事至乃悔。今世現有王
法牢獄。隨罪趣向。受其殃罰。因其前世不信道德。不
修善本。今復為惡。天神剋識。別其名籍。壽終神逝。

下入惡道。故有自然三塗無量苦惱。展轉其中。世世累
劫。無有出期。難得解脫。痛不可言。是為二大惡二痛
二燒。勤苦如是。譬如大火焚燒人身。人能於中一心制
意。端身正行。獨作諸善。不為衆惡者。身獨度脫。獲
其福德度世上天泥洹之道。是為二大善也。

第二門中。先惡後善。惡中先舉。次辨。後結。下喻顯之。

辨中初惡。今世現有王法已下。第二明痛。因其前世不信已
下。第三明燒。惡中還初明造惡人。都無義下。正明造惡。
破家已下。明造惡過。正造惡中。都無義理。不順法度。明
其無善。奢淫慳等。明其造惡。奢淫慳縱。各欲快意。興盜
所為。任心自恣。更相欺等。正明劫盜。餘文可知。



佛言。其三惡者。世間人民。相因寄生。共居天地之間。處年壽命。無能幾何。上有賢明長者尊貴豪富。下有貧窮廝賤。尪劣愚夫。中有不善之人。常懷邪惡。但念姪汚。煩滿胸中。愛欲交亂。坐起不安。貪意守惜。但欲唐得。眄睐細色。邪態外逸。自妻厭憎。私妄出入。費損家財。事為非法。交結聚會。興師相伐。攻劫殺戮。強奪無道。惡心在外。不自修業。盜竊趣得。欲擊成事。恐勢迫脅。歸給妻子。恣心快意。極身作樂。或於親屬。不避尊卑。家室中外。患而苦之。亦復不畏王法禁令。如是之惡。著於人鬼。日月照見。神明記識。故有自然三塗無量苦惱。展轉其中。世世累劫。無有出期。

。難得解脫痛不可言。是為三大惡三痛三燒。勤苦如是。譬如大火焚燒人身。人能於中一心制意。端身正行。獨作諸善。不為衆惡者。身獨度脫。獲其福德度世上天泥洹之道。是為三大善也。

第三門中。先惡後善。惡中初舉。次辨。後結。下喻顯之。
辨中初惡。亦復不畏王法下痛。如是之惡著於下燒。惡中初明造惡之人。常懷邪下。正明造作邪淫之惡。交結聚下。明造惡過。為淫造作殺盜等事。是其過也。餘文可解。

佛言。其四惡者。世間人民。不念修善。轉相教令。共為衆惡。兩舌惡口。妄言綺語。讒賊鬥亂。憎嫉善人。



敗壞賢明。於傍快喜。不孝二親。輕慢師長。朋友無信。難得誠實。尊貴自大。謂己有道。橫行威勢。侵易於人。不能自知。爲惡無恥。自以強健。欲人敬難。不畏天地神明日月。不肯作善。難可降化。自用偃蹇。謂可常爾。無所憂懼。常懷憍慢。如是衆惡。天神記識。賴其前世頗作福德。小善扶接。營護助之。今世爲惡。福德盡滅。諸善鬼神。各去離之。身獨空立。無所依。壽命終盡。諸惡所歸。自然迫促。共趣奪之。又其名籍。記在神明。殃咎牽引。當注趣向。罪報自然。無從捨離。但得前行。入於火鑊。身心摧碎。精神痛苦。當斯之時。悔復何及。天道固然。不得蹉跌。故有自然三塗。

無量苦惱。展轉其中。世世累劫。無有出期。難得解脫。
○痛不可言。是為四大惡四痛四燒。勤苦如是。譬如大
火焚燒人身。人能於中一心荆意。端身正行。獨作諸善
○不為衆惡者。身獨度脫。獲其福德度世上天泥洹之道
○是為四大善也。

第四門中。先惡後善。惡中初舉。次辨。後結。下以喻顯。

辨中初惡。如是眾惡天神記下。是明其痛。壽命終下。是明
其燒。惡中初先明造惡人。不念修下。正明造作妄語之惡。
口之四過。不應法故。通名妄語。憎嫉善下。明造惡過。痛中
明其宿善滅盡。善神捨遠。身無依倚。多遭厄難。是其痛也。
燒中明其惡業所牽。鬼神攝錄。將入惡道。受苦燋焚。名之



為燒。餘文可知。

佛言。其五惡者。世間人民。徒倚懈惰。不肯作善。治身修業。家室眷屬。飢寒困苦。父母教誨。瞋目怒應。言令不和。違戾反逆。譬如怨家。不如無子。取與無節。衆共患厭。負恩違義。無有報償之心。貧窮困乏。不能復得。辜較縱奪。放恣遊散。串數唐得。用自賑給。耽酒嗜美。飲食無度。肆心蕩逸。魯扈抵突。不識人情。強欲抑制。見人有善。妬嫉惡之。無義無禮。無所顧錄。自用職當。不可諫曉。六親眷屬。所資有無。不能憂念。不惟父母之恩。不存師友之義。心常念惡。口常

言惡。身常行惡。曾無一善。不信先聖諸佛經法。不信
行道可得度世。不信死後神明更生。不信作善得善。為
惡得惡。欲殺真人。鬥亂衆僧。欲害父母兄弟眷屬。六
親憎惡。願令其死。如是世人。心意俱然。愚癡蒙昧。
而自以智慧。不知生所從來。死所趣向。不仁不順。惡
逆天地。而於其中慒望僥倖。欲求長生。會當歸死。慈
心教誨。令其念善。開示生死善惡之趣。自然有是。而
不信之。苦心與語。無益其人。心中閉塞。意不開解。
大命將終。悔懼交至。不豫修善。臨窮方悔。悔之於後
。將何及乎。天地之間。五道分明。恢廓窈冥。浩浩茫
茫。善惡報應。禍福相承。身自當之。無誰代者。數之



自然應其所行。殃咎追命。無得從捨。善人行善。從樂入樂。從明入明。惡人行惡。從苦入苦。從冥入冥。誰能知者。獨佛知耳。教語開示。信用者少。生死不休。惡道不絕。如是世人。難可具盡。故有自然三塗無量苦惱。展轉其中。世世累劫。無有出期。難得解脫。痛不可言。是為五大惡五痛五燒。勤苦如是。譬如大火焚燒人身。人能於中一心制意。端身正念。言行相副。所作至誠。所語如語。心口不轉。獨作諸善。不為衆惡者。身獨度脫。獲其福德度世上天泥洹之道。是為五大善也。

第五門中。初惡後善。惡中初舉。次辨。後結。下喻顯之。

辨中先惡。如是世人心意下痛。大命將終悔懼下燒。惡中初

明造惡之人。徙倚懈惰不肯已下。正明造作飲酒之惡飲酒之人。不修善行。不事家業。違反教令。瞋怒喜鬥。背恩忌義。欺陵抵抗。兼以論之。肆心蕩逸魯扈抵下。明造惡過。過相眾多。文中具顯。痛中明其現有愚癡。闇障覆心。無所知曉。以之為痛。亦應有其王法治罪。文略不說。燒等可知。上來別論。

佛告彌勒。吾語汝等。是世五惡勤苦若此。五痛五燒。展轉相生。但作衆惡。不修善本。皆悉自然入諸惡趣。或其今世先被殃病。求死不得。求生不得。罪惡所招。示衆見之。身死隨行。入三惡道。苦毒無量。自相燋然。至其久後。共作怨結。從小微起。遂成大惡。皆由貪



著財色。不能施惠。癡欲所迫。隨心思想。煩惱結縛。
無有解已。厚己諍利。無所省錄。富貴榮華。當時快意。
。不能忍辱。不務修善。威勢無幾。隨以磨滅。身坐勞
苦。久後大劇。天道施張。自然糺舉。綱紀羅網。上下
相應。煢煢忪忪。當入其中。古今有是。痛哉可傷。佛
語彌勒。世間如是。佛皆哀之。以威神力摧滅衆惡。悉
令就善。棄捐所思。奉持經戒。受行道法。無所違失。
終得度世泥洹之道。

此復總辨。於中還初明其五惡。佛語彌勒世間如是佛皆哀下。
翻惡明善。惡中初先總明五惡五痛五燒展轉相生。但作已下。

別以顯之。別中兩番。初明從惡生痛生燒。身死隨下。明其從燒生惡生痛。前中初言但作眾惡不修善本。明其惡也。皆悉自然入諸惡趣。明起燒也。或其今世先被殃等。明起痛也。後中初言身死隨行入三惡等。是明其燒。至其久下。從燒起惡。至其久後共作怨結。從小微起遂成大怨。起殺生惡。皆由貪著不能慧施。起劫盜惡。癡欲所迫隨心思等。起邪淫惡。厚已諍利無所省錄。起妄語惡。富貴榮華當時快意不能忍等。起飲酒惡。此等生惡。身坐已下。從惡起痛。坐前五惡。身受勞苦。苦增不息。名久大劇。下顯劇相。凡在世間。天下道理。自然施立。是故名為天道施張。造惡必彰。名自糾舉。身當法網。是故名為綱紀羅網。貴賤上下。莫不從法。是故名為上下相應。罪者歸之。無人伴匹。故云熒忪當入其中。

古今有下。結以顯過。上來明惡。下翻明善。佛語彌勒世間如是。牒舉前惡。佛皆哀之。彰已悲憐。以威神下。教滅前惡。化令從善。摧滅眾惡。悉令就善。教修世善。棄捐所思奉持經等。敎習出善。受道無失。明出世因。終得已下。成出世果。上來第三明五惡等業苦之過。

佛言。汝今諸天人民。及後世人。得佛經語。當熟思之。能於其中端心正行。主上為善。率化其下。轉相勅令。各自端守。尊聖敬善。仁慈博愛。佛語教誨。無敢虧負。當求度世拔斷生死衆惡之本。永離三塗無量憂畏苦痛之道。沒等於是廣植德本。布恩施惠。勿犯道禁。忍辱精進。一心智慧。轉相教化。為德立善。正心正意齋

戒清淨一日一夜。勝在無量壽國為善百歲。所以者何。
波佛國土。無為自然。皆積衆善。無毛髮之惡。於此修
善十日十夜。勝於他方諸佛國中為善千歲。所以者何。
他方佛國。為善者多。為惡者少。福德自然。無造惡之
地。唯此間多惡。無有自然。勤苦求欲。轉相欺殆。心
勞形困。飲苦食毒。如是惡務。未嘗寧息。吾哀汝等天
人之類。苦心誨喻。教令修善。隨宜開導。授與經法。
莫不承用。在意所願。皆令得道。佛所遊履國邑丘聚。
靡不蒙化。天下和順。日月清明。風雨以時。災厲不起。
。國豐民安。兵戈無用。崇德興仁。務修禮讓。佛言。
我哀愍汝等諸天人民。甚於父母念子。今我於此世作佛。



。降化五惡。消除五痛。絕滅五燒。以善攻惡。拔生死之苦。令獲五德。升無為之安。吾去世後。經道漸滅。人民詔偽。復為衆惡。五燒五痛。還如前法。久後轉虧。不可悉說。我但為汝略言之耳。佛語彌勒。汝等各善思之。轉相教誡。如佛經法。無得犯也。於是彌勒菩薩合掌白言。佛所說甚善。世人實爾。如來普慈哀愍。悉令度脫。受佛重誨。不敢違失。

第四勸人修捨。於中有二。一如來勸修。二彌勒領解。前中
有三。一以理正勸。二吾哀汝下。舉已現在化益以勸。三吾
去世下。舉已滅後衰損以勸。初中有二。一以理正勸。二汝
等於是廣植德下。彰此修勝。增人舉意。前正勸中。初勸自

行。得佛經語。當熟思之。端心正行。主上已下。勸其化他。
主上為善率化下等。化他修善。當求度世拔生死等。化他離
惡。彰此勝中。初明此界一日修善。勝無量壽為善百歲。所
以下釋。下明此界修善十日。勝餘佛國為善千歲。所以下釋。
就初段中。汝等於是廣植德本。總以標舉。布恩等別。別中
初舉六波羅蜜。是自利行。布恩檀度。勿犯戒度。忍辱忍度。
精進進度。一心禪度。智慧慧度。轉相教化。是利他行。為
德立善。總以結之。此前作善。正心正意齋戒清淨。是其止
善。以此修難。故於一日。勝無量壽為善百歲。就下第二舉
已現在化益勸中。初明化人修善得樂。佛言已下。明其化人
滅惡離苦。就下第三舉已滅後衰損勸中。初舉滅後衰損之事。
語彌勒下。勸人修斷。上來佛勸。自下彌勒領解奉行彌勒白

佛所說甚善。世人實爾。是領解也。如來慈等。彰已奉行。

上來四段。合為第二廣舉娑婆穢惡之事令人厭捨。

△自下第三就無量壽得失雙辨令人修捨。就中有五。一佛勸阿難禮無量壽。二阿難奉命敬禮彼佛並願求見。三由前啟請。無量壽佛放光普照。四因佛光照彼此相見。五因相見。具彰彼國得失之事。令人修捨。

佛告阿難。汝起更整衣服。合掌恭敬。禮無量壽佛。十方國土諸佛如來。常共稱揚讚歎彼佛無著無礙。

就初段中。初告阿難。令禮彼佛。十方國下。舉佛共歎。成其頂禮。

於是阿難起整衣服。正身西向。恭敬合掌。五體投地。

禮無量壽佛。白言。世尊。願見波佛安樂國土。及諸菩薩聲聞大眾。

第二段中。初明阿難奉命設禮。白言已下。啟請求見。願見彼佛。求見化主。安樂國土。求見其處。及菩薩等。求見彼眾。

說是語已。即時無量壽佛放大光明。普照一切諸佛世界。金剛圍山。須彌山王。大小諸山。一切所有。皆同一色。譬如劫水彌滿世界。其中萬物沈沒不現。滉瀆浩汗。唯見大水。波佛光明亦復如是。聲聞菩薩一切光明。皆悉隱蔽。唯見佛光明耀顯赫。

第三段中。初先法說佛放光明。普照一切。皆同一色。次以



喻顯。下合顯之。

爾時阿難。即見無量壽佛威德巍巍。如須彌山王。高出一切諸世界上。相好光明靡不照耀。此會四衆。一時悉見。波見此土亦復如是。

第四段中。初此見彼。後彼見此。此見彼中。初阿難見。後大眾見。

爾時。佛告阿難及慈氏菩薩。汝見波國從地已上至淨居天。其中所有微妙嚴淨自然之物。為悉見不。阿難對曰。唯然。已見。汝寧復聞無量壽佛大音宣布一切世界化衆生不。阿難對曰。唯然。已聞。波國人民乘百千由旬

七寶宮殿。無所障礙。遍至十方供養諸佛。沒復見不。
對曰。已見。波國人民有胎生者。沒復見不。對曰。已
見。其胎生者。所處宮殿。或百由旬。或五百由旬。各
於其中受諸快樂。如忉利天上亦皆自然。爾時慈氏菩薩
白佛言。世尊。何因何緣。波國人民。胎生化生。佛告
慈氏。若有衆生。以疑惑心修諸功德。願生波國。不了
佛智。不思議智。不可稱智。大乘廣智。無等無倫最上
勝智。於此諸智。疑惑不信。然猶信罪福修習善本。願
生其國。此諸衆生。生波宮殿。壽五百歲。常不見佛。
不聞經法。不見菩薩聲聞聖衆。是故於波國土。謂之胎
生。若有衆生。明信佛智。乃至勝智。作諸功德。信心

迴向。此諸衆生。於七寶華中。自然化生。跏趺而坐。湏臾之頃。身相光明。智慧功德。如諸菩薩具足成就。復次慈氏。他方諸大菩薩。發心欲見無量壽佛。恭敬供養。及諸菩薩聲聞聖衆。波菩薩等。命終得生無量壽國。於七寶華中。自然化生。彌勒當知。波化生者。智慧勝故。其胎生者。皆無智慧。於五百歲中。常不見佛。不聞經法。不見菩薩諸聲聞衆。無由供養於佛。不知菩薩法式。不得修習功德。當知此人宿世之時。無有智慧。疑惑所致。佛告彌勒。譬如轉輪聖王。別有宮室。七寶莊飾。張設牀帳。懸諸繪蓋。若有諸小王子。得罪於王。輒內波宮中。繫以金鎖。供給飲食。衣服牀蓐。華香。

妓樂。如轉輪王無所乏少。於意云何。此諸王子寧樂波處不。對曰。不也。但種種方便求諸大力。欲自勉出。佛告彌勒。此諸衆生亦復如是以疑惑佛智故。生波七寶宮殿。無有刑罰乃至一念惡事。但於五百歲中不見三寶。不得供養修諸善本。以此爲苦。雖有餘樂。猶不樂波處。若此衆生識其本罪。深自悔責求離波處。即得如意。注詣無量壽佛所。恭敬供養。亦得漏至無量無數諸如來所。修諸功德。彌勒當知。其有菩薩生疑惑者。爲失大利。是故應當明信諸佛無上智慧。

第五段中。初彰彼得。令人願求。後顯彼失。使人厭捨。彰



彼得中。如來三問。阿難三答。文顯可知。顯彼失中。初先彰彼胎生之失。若有眾生識本罪下。教人修捨。前明失中。文別有四。一彰彼國有胎生果。二慈氏白下。辨因顯果。三復慈氏下。對勝顯劣。四如輪王下。就之顯過。就初段中。如來初問。彼國人民有胎生者。汝復見不。阿難次答。彰已已見。如來下復為之具辨。第二段中。初彌勒問。何因何緣彼國人民胎生化生。正辨胎生。約化顯之。為是通問。下佛答之。於中先明胎生之因。若有眾生明信佛下。明化生因。胎生因中。先明其因。此諸眾生生彼已下。明因得果。就明因中。若有眾生以疑惑心。略明其失。修諸功德願生彼國略明其得。不了佛下。廣明其失。於彼佛智疑惑不信。是其失也。於中初言不了佛智。此句是總。不思等別。佛智淵深。

餘不能測。名不思智。佛智眾多。非言能盡。言不可稱。於諸法門。知之窮盡。名為廣智。位分高出。名無等倫。最上勝智。於此下結。然猶信下。廣明其德。下得果中。先辨後結。明化生中。先明其因。此諸生下。明因得果。自下第三對勝顯劣。於中先舉化生之勝。後對明其胎生之劣。文顯可知。自下第四明胎生過。約喻顯之。如來初先立喻反問。彌勒次答。不也。總答。但種種下。別以顯之。佛告已下。如來為辨。明胎生者無餘苦事。但五百歲不見三寶不得修善。用此為苦。以此苦故。雖樂不樂。上來四段。合為第一明胎生失。自下第二教人修捨。若此眾生識其本罪。深自悔責求離彼處。正教修捨。識本疑惑佛智之罪。深自悔責。即得已下。明其修得。彌勒當知其有已下。結勸修學。舉失顯得而為勸也。



上來第三明攝下人往生彼國。

彌勒菩薩白佛言。世尊。於此世界。有幾所不退菩薩。
生波佛國。佛告彌勒。於此世界。六十七億不退菩薩。
注生波國。一一菩薩。已曾供養無數諸佛。次如彌勒者
也。諸小行菩薩。及修習少功德者。不可稱計。皆當注
生。佛告彌勒。不但我刹諸菩薩等注生波國。他方佛土
亦復如是。其第一佛名曰遠照。波有百八十億菩薩。皆
當注生。其第二佛名曰寶藏。波有九十億菩薩。皆當注
生。其第三佛名曰無量音。波有二百二十億菩薩。皆當
注生。其第四佛名曰甘露味。波有二百五十億菩薩。皆

當注生。其第五佛名曰龍勝。波有十四億菩薩。皆當注生。其第六佛名曰勝力。波有萬四千菩薩。皆當注生。其第七佛名曰師子。波有五百億菩薩。皆當注生。其第八佛名曰離垢光。波有八十億菩薩。皆當注生。其第九佛名曰德首。波有六十億菩薩。皆當注生。其第十佛名曰妙德山。波有六十億菩薩。皆當注生。其第十一佛名曰人王。波有十億菩薩。皆當注生。其第十二佛名曰無上華。波有無數不可稱計諸菩薩衆。皆不退轉。智慧勇猛。已曾供養無量諸佛。於七日中。即能攝取百千億劫大士所修堅固之法。斯等菩薩。皆當注生。其第十三佛名曰無畏。波有七百九十億大菩薩衆。諸小菩薩及比丘。



等不可稱計。皆當注生。佛語彌勒。不但此十四佛國中諸菩薩等當注生也。十方世界無量佛國。其注生者亦復如是甚多無數。我但說十方諸佛名號。及菩薩比丘生波國者。晝夜一劫尚未能盡。我今為汝略說之耳。

第四重攝上人往生彼國。於中先明此土菩薩往生彼國。彌勒先問。如來後辨。佛告彌勒不但已下。廣明餘國菩薩往生。

於中初總。其第一下。別以列之。列十三國菩薩往生。通前娑婆。別列十四。不但此下。總舉餘國。明皆往生。甚多無量。不可具說。舉此令人求去專也。上來正宗。

△自下流通。於中有四。第一如來歎經勸學。二爾時世尊說此經下。彰說利益。諸人悟道。三動地放光。雨華作樂。增眾

深信。四明所說利益弘多。大眾同喜。

△初中有五。一舉聞益。勸人受行。二吾今為諸眾生已下。教

人請決。三當來之世經道滅下。彰此經法濟益之要獨留百歲。

四佛語彌勒下。舉經難聞生人重敬。五是故我法如是作下。
結勸修學。

佛告彌勒。其有得聞波佛名號。歡喜踊躍。乃至一念。
當知此人為得大利。則是具足無上功德。是故彌勒。設
有大火充滿三千大千世界。要當過此。聞是經法。歡喜
信樂。受持讀誦。如說修行。所以者何。多有菩薩欲聞
此經而不能得。若有衆生聞此經者。於無上道終不退轉
。是故應當專心信受。持誦說行。



佛說

無量壽經義疏

初中有二。一舉得聞無量壽名。獲利深廣。勸學此經。聞名依經。故勸學之。若有眾生聞此經下明聞此經得益廣大。勸人受行。前明聞佛得益之中。其有得聞彼佛名號歡喜踊躍。乃至一念為得大利。明聞佛名得益多也。是故已下。勸學此經。以此經中說無量壽。聞獲大利。故設大火滿三千界。亦須從過聽受此經。況餘小難。所以下釋。多有菩薩欲聞此經而不能得。故必須聽。後明聞經得益之中。若聞此經。於無上道終不退轉。舉聞經益。是故應當專心信等。勸人修學。上來第一舉聞利益勸人受行。

吾今為諸衆生說此經法。令見無量壽佛。及其國土一切所有。所當為者皆可求之。無得以我滅度之後。復生疑惑。

第二教人請決。吾為眾生說此經法。令見無量壽及其國土一切所有。彰已化意。所當為者皆可求之。正勸請決。無得已下。遮後人疑。

當來之世。經道滅盡。我以慈悲哀愍。特留此經。止住百歲。其有衆生值斯經者。隨意所願皆可得度。

第三明此經要獨留百歲。當來之世經道滅者。舉彼未來法滅盡事。釋迦正法有五百年。像法千歲。末法萬歲。一切皆過。名為滅盡。我以慈下。明已留意。佛以慈悲憐愍眾生。故法滅後。獨留此經百歲濟度。以此經中開示淨土令人求生。故偏留之。大涅槃經顯示佛性。教聖中深。聖人先隱。為是先滅。此經教人厭苦求樂。濟凡中要。為是後滅。法隨人別。

故滅不同。其有眾生值斯經者所願皆得。明留之益。法滅盡後。百年聞者。尚得利益。往生淨土。況今聞者。何有不生。

唯佛留意。明今聞經。有求去者。定得往生。莫自疑慮。

佛語彌勒。如來興世。難值難見。諸佛經道難得難聞。

菩薩勝法。諸波羅蜜。得聞亦難。遇善知識。聞法能行。此亦為難。若聞斯經信樂受持。難中之難。無過此難。

第四舉經難聞生人重敬。如來興世難值難見。明值佛難。生當佛時。名之為值。目覩稱見。此皆難也。諸佛經道難得難等。明法難聞。於中先明經教難聞。手得經卷。名之為得。耳聽曰聞。亦可領誦。名之為得。耳餐稱聞。此等皆難。菩薩

勝下。明其行法聞之甚難。遇善知識能行亦難。明修行難。

此前汎舉。若聞斯經信樂受持難中之難。約對前三。明此經中修學最難。餘義餘法。處處宣說。開顯淨土教人往生。獨此一經。為是最難。

是故我法。如是作。如是說。如是教。應當信順。如法修行。

第五結勸修學。言是故者。是此經法有多益故。於中修學最難得故。我今宣說。言我法者。舉此經法。如是作者。此經宣說彌陀如來修願修行得身得土。名如是作。如是說者。如來上來為眾宣說。名如是說。如是教者。如來上來教人往生。名如是教。此舉前法。應當信順如法修行。結勸修學。

上來五段。合為第一歎經勸學。

爾時世尊說此經法。無量衆生皆發無上正覺之心。萬二千那由他人。得清淨法眼。二十二億諸天人民。得阿那含果。八十萬比丘。漏盡意解。四十億菩薩。得不退轉。以弘誓功德而自莊嚴。於將來世當成正覺。

第二段中。明說利益。無量眾生發正覺心起願益也。聞彌陀佛發願修行得佛淨土攝化眾生。願與同之。名正覺心。下明得道。先小後大。小乘眾生。聞說娑婆穢惡可厭。深心厭離。故得小果。於中初言得淨法眼。成須陀洹。見四真諦。名淨法眼。次得那含。後得羅漢。大乘眾生。聞彌陀佛成德廣度。

堅心願求。故得不退。聞此多益。誓欲濟度。名誓自莊。由斯剋果。故於將來當成正覺。

爾時三千大千世界六種震動。大光普照十方國土。百千音樂。自然而作。無量妙華芬芳而降。

第三段中。如來化周。為增物敬。故以神力動地放光作樂雨華。六動如上。

佛說經已。彌勒菩薩。及十方來諸菩薩衆。長老阿難。諸大聲聞。一切大眾。靡不歡喜。

第四段中。明說廣益。教愔回群機。大眾同喜。

佛說無量壽經義疏卷六（終）



◎ 同音義字、古今字、本俗字、同義字對照參考表

(括號裡下為原字)

玉「琊、琊」經

精「慇、勤」除世貪愛
魔性「妬、妒」弊

知見明「了、瞭」

「汎、泛」論有四
亦用神「呪、咒」
獲諸豐「餧、膳」

悉「覩、睹」現無量諸佛

名無「蓋、蓋」悲

「瑠、琉璃」瑠妙華

「道、導」佛所說

木「义、義」是戒
大目「捷、捷」連

「踊、踴」如泉涌

於彼憐「愍、湣」

壞諸欲「漸、慙」

行因「剋、克」果

色無慘「憾、憾」

「栴、旃」檀香

右「遶、繞」三「匝、匝」

珠光「燄、焰」耀

經能持「縛、紬」

身心柔「軟、軟」

如優「鉢、鉢」羅華

底極「廝、廝」下

世間「忽忽、匆匆」

邪「姪、淫」

欺「陵、凌」抵抗

「芬芬、紛紛」而降

國土之「麤、粗」妙

「脩、修」短自在

滅「昏、昏」盲闇

「妓、伎」樂音聲

各「賚、齎」天妙華

「蟻、蠕」動

「憚、希」望他利

自然「糺、糾」舉

布||佈 裹||裡 勅||敕 盖||蓋
庭||庭 床||牀 慧||惠 軟||軟
增||憎 衛||衛 篷||幡

徧||遍 群||羣 辨||辯
蓋||蓋 增||憎 衛||衛 篷||幡

薩菩天尊馱韋法護無南



覺仁老和尚句

現在受委屈
消滅三塗苦
忍辱得解脫
速成無上覺

淨空口

開時鍊心靜
時驗時動心
說易行難心養
心制時時制心



是心是佛
是心作佛



南無阿彌陀佛

回向偈

願以此功德
莊嚴佛淨土
上報四重恩
下濟三途苦
若有見聞者
悉發菩提心
盡此一報身
同生極樂國

〈惜珍護愛請敬·緣結費免〉
〈量無德功·印翻迎歡〉

佛說無量壽經義疏

印贈者——香光淨宗學會

電話：(02) 85110955

傳真：(02) 85110953

地址：台北縣三重市中興北街179號1樓

淨空法師——淨空法師專集網站
影音網址：<http://www.amtb.org.tw>

淨空法師專集簡體網站 <http://www.amtb.cn>

淨空法師英文網站 <http://www.chinkung.org>

排版承印——和裕出版社

電話：(06) 24540131-7

中華民國九五年
佛曆二五五〇年九月恭印壹仟本結緣

真誠 清淨 平等 正覺 慈悲

看破 放下 自在 隨緣 念佛



本會法寶 · 免費結緣 · 絶無託人募款義賣 · 敬請明察 · 愛護珍惜

Printed in Taiwan (This book is not to be sold.)
FOR FREE DISTRIBUTION